

Is Meupiya He Tudtulanen Te Keagi ni Jesu Kristu Sumalà Is Keguguza ni Mateo

Is Mehitenged te Surat ni Mateo

Hein insurat ni Mateo heini is surat din subre en he heenem he gatus he tuig he wazà keugelingen he hadi te minge Hudiyu. Midaagdaag sikandan te zuma he minge nasud. Ne zuen neuget en he penaad te Megbevayà kandan pinaagi te ebpemeneuven din he iyan is: duen edsuguen din he egkehimu he hadi dan he iyan edlibri kandan.

Ne iyan insurata ni Mateo kayi te surat din is: ibpesavut din te minge Hudiyu is meupiya he tudtul he iyan is: Iyan en si Jesus sikan is hadi he impenaad te Megbevayà kandan su nepurung din memetmetahi si Jesus wey is minge vaal zin wey nezineg din daan is minge penurù ni Jesus.

Kayi te surat ni Mateo zuen mahabet he tagnà te ebpemeneuven te Megbevayà he impesavut din he nengetuman en pinaagi ki Jesus. (Iyan haazà tuus he iyan en sikandin kes hadi dan.) Penenglitan is egkehimuwa kandin he kevuwazan ni hadi David, is ked-enaka kandin diyà te Bitlihim wey is kebpekesolet din diyà te Ihiptu. Is kegkevantug din pinaagi te kebpmawì din wey is kebpaahaa zin te utew zekelà he hizu zin te minge etew. Iyan, wazè dan sikandin dewata, kekenà, impehimentayan dan. Ne is langun kayi, pudu neuget en is kedteгнаa zuen, ne pudu netuman pinaagi ki Jesus.

Pinaagi kayi te surat ni Mateo edhengyuan din is minge Hudiyu he tuuwi zan si Jesus he iyan hadi dan wey menluluwas dan ne mebpenggalen dan kandin.

Is Kepuun ni Jesu Kristu
(*Mateo 1:1-17; Lucas 3:23-38*)

1 ¹Iyan heini kes gugud te kepuun ni Jesu Kristu. Kevuwazan si Jesu Kristu ni Hadì David dengan. Ne si David, kevuwazan ni Abraham. ²Ne si Abraham, amey ni Isaak, ne si Isaak, amey sikandin ni Hakub. Ne si Hakub, anak din si Huda wey is menge suled din. ³Ne si Huda, iyan esawa zin si Tamar, ne iyan menge anak dan si Piris wey si Sara. Ne si Piris, amey ni Isrum, ne si Isrum, amey ni Aram, ⁴ne si Aram, amey ni Eminadab, ne si Eminadab, amey ni Nasun. Ne si Nasun, amey ni Salmun, ⁵ne si Salmun, iyan esawa zin si Rahab, ne iyan anak dan si Buus. Ne si Buus, ne amey ni Ubid. Ne iyan iney ni Ubid si Rut. Ne si Ubid, amey ni Isai. ⁶Ne si Isai, ne amey ni Hadì David.

Ne si David, amey ni Sulumun (iyan iney ni Sulumun kes esawa zengan ni Uriya). ⁷Ne si Sulumun, amey ni Rubuam, ne si Rubuam, amey ni Abyas. Ne si Abyas, amey ni Asa. ⁸Ne si Asa, amey ni Husepat. Ne si Husepat, amey ni Huram, ne si Huram, amey ni Usyas, ⁹ne si Usyas, amey ni Hutam. Ne si Hutam, ne amey ni Akas. Ne si Akas, amey ni Isikyas. ¹⁰Ne si Isikyas, ne amey ni Menasis. Ne si Menasis, ne amey ni Amun. Ne si Amun, iyan amey ni Husyas; ¹¹ne si Husyas, iyan anak din si Hikunyas wey is menge suled din. Iyan haazà timpu he mid-uwit te menge tigBebilunya is menge tig-Israyil pehendiyà te Bebilunya.

¹²Ne hein mid-uwit en is menge tig-Israyil ziyà te Bebilunya nevuwad si Hikunyas ne iyan anak din si Selatyil. Ne amey si Selatyil ni Surubebil. ¹³Ne si Surubebil, amey ni Abyud, ne si Abyud, ne amey ni Iliyakim. Ne si Iliyakim, amey ni Asur. ¹⁴Ne si Asur, amey sikandin ni Saduk. Ne si Saduk, amey ni Akim. Ne si Akim, amey ni Ilyud, ¹⁵ne si Ilyud, amey ni Iliasar. Ne si Iliasar, amey ni Matan, ne si Matan, iyan amey ni Hakub. ¹⁶Ne si Hakub, iyan amey ni Jose he iyan esawa ni Maria. Ne si Maria, iyan iney ni Jesus he migeraran he Misiyas, *he ke và dà egkegiya, kes mibpili te Megbevayà he ibpahadi.*

¹⁷Sepulù wey heepat he lapis te kevuwazan ebpuun dà te kegkevuwad ni Abraham taman ki David. Ne ebpuun maan te kegkevuwad ni David taman te ked-uwita te menge tig-Israyil pehendiyà te Bebilunya, sepulù wey heepat daan he lapis. Ne puun dutun taman te ked-enaka ki Jesu Kristu, sepulù ded daan wey heepat he lapis.

Is Ked-enaka ki Jesus
(*Mateo 1:18-25; Lucas 2:1-7*)

¹⁸Iyan heini gugud te keagi te ked-enaka ki Jesu Kristu. Nekegunan is iney zin si Maria te maama he egnezezanan ki Jose. Iyan, te wazè dan pa meked-esawa, netuenan ni Maria he megingey sikandin pinaagi te gehem

te Wagas he Mulin-ulin. ¹⁹Ne si Jose, kenà sikandin edsuwey te kesuguan he imbilinbilin ni Moises, ne tenged kayi, kenè din edleusen te ed-esawa si Maria, iyan, kenè din daan egkesuatan he meeled-eled si Maria, umba ed-isipen din he edhusayen dà heini te meeles. ²⁰Ne zutun te kemulu zin pa ed-isipa is iring kayi, mibpetegeinep kandin is belinsuguen te Nengazen. Ne ke sikandin te, “Sikew Jose, is kevuwazan ni Hadì David, kenè ka melenew he ebpengesawa ki Maria su megingey sikandin pinaagi te gehem te Wagas he Mulin-ulin. ²¹Maama is id-anak din ne ngezani nu ki Jesus, *he ke và dà egkegiya, Menluluwas, su iyan sikandin edlibri te menge etew he edsunud kandin wey kenè en sikandan siluti tenged te menge salè dan.*”

²²Umba nehitavù heini is langun diyà te ki Maria wey si Jose su egketuman is migkagi zengan te Nengazen pinaagi te ebpeneuven din he migkagi te, ²³“Ebmegingey is raga ne id-anak din is maama, ne iyan ngazan te vatà si Imanwil,” he ke và dà egkegiya, nekeamur is Megbevayà kenitew.

²⁴Ne zutun nepukew si Jose. Ne midtuman din haazà is sambag kandin te velinsuguen te Nengazen ne mid-esawa zin si Maria. ²⁵Iyan, wazè din si Maria uvayi taman te wazè pa mekeanak. Ne hein in-anak en haazà is batà, migngezanan ni Jose ki Jesus.

Is Menge Memimituen

2 ¹Diyà si Jesus ianak te inged he Bitlihim, te prubinsya he Hudiya zutun te timpu te kedhadì te aney en he hadì he egngezanan ki Hirudis. Ne zutun te vatè pa utew si Jesus, nekeuma ziyà te Hiruselim is menge memimituen. Diyà sikandan ebpuun te meziyù he inged diyà te edsilaan. ²Ne in-insè dan ke, “Hendei ianak kes midtagnà he vatà he ebpekehadì te menge etew he Hudiyu? Neehè dey is kedlepew te vituen he iyan tuus te ked-enaka kandin ne tenged kayi midhendini key su edezapen dey sikandin.” ³Ne hein nezineg heini ni Hadì Hirudis neemukan is gehinawa zin wey is tivuuk he tigHiruselim. ⁴Ne midtigum ni Hirudis is langun he pengulu te menge memumuhat wey is menge menunudlù te kesuguan. Ne mid-insaan din sikandan ke, “Hendei id-anak kes mibpilì te Megbevayà he ibpahadì sumalà is kedteгна zengan?” ⁵Ne midtavak dan te, “Diyà sikandin id-anak te inged he Bitlihim, te prubinsya he Hudiya. Egketuenan ta heini su zuen insurat he Lalag te Megbevayà pinaagi te ebpeneuven dengan he egkagi te,

⁶ ‘Sikiyu is menge tigBitlihim he ziyà ed-ubpà te prubinsya he Hudiya, egkevantug daan is inged niw iring te zuma he menge inged diyan te Hudiya
su ziyà te keniyu ebpuun is edhadì te menge sakup ku
he menge kevuwazan ni Israyil.’ ”

⁷Ne si Hirudis, hein nezineg din haazà midtawag din kes nemekeuma he memimituen. Ne hein iyan dà duma zin haazà is menge memimituen, mid-insaan din ke keenu medlepew is bituen he neehè dan. ⁸⁻¹⁰Ne hein netuenan ni Hirudis, midteleanan din te ibpeey-eyazan kandan te ebpenahà is batà ne ke sikandin te, “Emun egketuredu niw, ipetueni niw kediey su wey ku meturedu su ed-ezapan ku zaan.” Ne zutun, impelaus sikandan diyà te Bitlihim. Ne zutun migenat haazà is menge memimituen ne hein diyè dan en te zalan neehè dan en maan kes bituen he iyan kes bituen he neehè dan he midlepew ziyà te edsilaan. Ne nelipey zan utew hein neehè dan en maan. Ne mibpetundug kandan haazà is bituen, ne zutun medteren te renged te valey he zutun kes batà. ¹¹Ne hein midseled dan dutun te valey neehè dan haazà is batà wey is iney zin he si Maria. Ne midluhud dan su ed-ezapan dan haazà is batà. Ne zutun impelepew zan is menge kavan he zutun itagù is ketigeyunan dan ne mibegayan dan sikandin te vulawan wey menge mahal he mehemut he beyewà wey mira. ¹²Ne impesavut kandan te Megbevayà pinaagi te tegeinep he kenè dan en medlikù diyà te ki Hirudis. Ne tenged kayi, wazè dan en med-iklu zuen te imbayè dan dutun te ked-ulì dan.

Is Kebpelaguy Pehendiyà te Ihiptu

¹³Ne hein migenat en kes menge memimituen, mibpetegeinep en maan ki Jose is belinsuguen te Nengazen he egkagi te, “Enew kad, Jose. Ne uwita nu heeyan is batà wey iney zin ne pelaguy kew pehendiyà te Ihiptu. Ne zutun kew tagad taman te kenè ku pa sikew egkegiyan. Su ebpenahaan ni Hirudis heeyan is batà su edhimetayan din.” ¹⁴Ne zutun mid-enuw si Jose, ne mid-uwit din haazà is batà wey si Maria, ne migenat dan dutun te mezukilem pehendiyà te Ihiptu. ¹⁵Ne zutun dan med-ubpà taman te minatey en si Hirudis.

Egkeulaula zan heini su egketuman kes netagnà he migkagi te Nengazen pinaagi te ebpeneuven dengan he ke sikandin te, “Mid-umew ku is Anak ku he ibpaawà puun te Ihiptu.”

Is Kebpenhimetayi te Menge Vata

¹⁶Ne hein netuenan ni Hirudis he mid-akal zà kandin kes menge memimituen, nepauk utew. Ne insugù din he ibpepenhimetayan is langun he menge vata he maama he ebpenuigen te zezuwa he tuig wey minus pa zutun te tivuuk he inged te Bitlihim wey is menge siringan dutun he inged. Midhimu zin heini su wey mepatey si Jesus su zezuwa en he tuig is kelugayad puun te kegkeahaa te menge memimituen duen te vituen.

¹⁷Ne pinaagi zutun netuman kes netagnà dengan ni Jeremias, kes ebpeneuven te Megbevayà su migkagi si Jeremias te,

18 “Duen megurub he egkezineg ta ziyà te inged he Rama.
Egkezineg ta is edsinegew wey ebpemenderawit
su edlendagan ni Rakil is menge anak din.
Edsinegew ne wazè en ebpekelasan kandin
su is menge anak din naawè en.”

Is Ked-uli Diyà te Israyil

19 Ne hein minatey en si Hirudis, mibpeuman mebpetegeinep ki Jose is belinsuguen te Nengazen he migkagi te, 20 “Enew kad, Jose, ne uwita nu heeyan is batà wey is iney zin ne uli kew ziyà te tanà he Israyil su minatey en sikan is edhimatey pezem keninyan te vatà.” 21 Ne mid-enuw Jose ne miduma zin haazà is batà wey si Maria is iney te vatà ne mid-uli dan diyà te tanà he Israyil.

22 Ne hein netueanan ni Jose he iyan hadi diyà te Hudiya si Ergilau he nekesunud te amey zin he si Hirudis, midlevayan dan is prubinsya he Hudiya su nahandek dan. Ne tenged te mibpetegeinep is Megbevayà he edsambag ki Jose, midlaus dan diyà te prubinsya he Geliliya. 23 Ne ziyè dan med-uli te inged he egngezanan te Nesorit. Umba neulaula zan heini su egketuman is netagnà dengan te menge ebpeneuven te Megbevayà su nekagi zan he egngezanan si Jesus he tigNesorit.

Is Kebpenurù ni Juan Megbebewtismu

(*Mateo 3:1-12; Marcos 1:1-8; Lucas 3:1-18; Juan 1:19-28*)

3 1 Mibpenlavey is menge tuig dutun ne zuen etew he egngezanan ki Juan Megbebewtismu. Diyà sikandin te tanà he wazà duen ed-ubpà he etew seled te prubinsya he Hudiya. Ne impesavut din te menge etew is Lalag te Megbevayà. 2 Ke sikandin te, “Iniyugi niw is memezaat he ulaula su megaan en edhadì kenitew is Megbevayà he ziyà te langit.” 3 Ne si Juan, iyan sikan is netagnà dengan ni Esaias he migkagi zin he,

“Duen keuzemà etew
ziyà te tanà he wazà duen ed-ubpà he etew.
Ne zutun egkezineg sikandin
te menge etew he edangep kandin is egkagi te,
‘Megaan ebpekeuma is Nengazen.
Higewani niw is ibayè din;
tendanga niw is dalan he ed-ikulen din,
he ke vâ dà egkegiya,
endami niw is kebpekeuma zin.’ ”

4 Ne si Juan, kukumbalà te midhavel he vulvul te kemilyu ne vevakes te lundis he negangu. Ne terapan dà wey teneb is keuyagan din. 5 Ne mezakel he etew is midangep kandin he ebpemuun te inged he Hiruselim wey ziyà te zuma kayi he inged te tivuuk he prubinsya he Hudiya wey zuen daan

mezakel pa he etew he ziyà ebpememuun te minge inged he uvey te wahig he Hurdan. ⁶Ne haazà he minge etew, intangdù dan is minge salè dan ne mibewtismuwan din sikandan diyà te wahig he Hurdan.

⁷Ne naahà ni Juan is mezakel he etew he minge Perisiyu wey minge Sedusiyu he edhendiyà te kandin su ebpebewtismu. Ne migkegiyan din sikandan te, “Iring te ulaula te uled is ulaula niw su teruen kew. Maan is edhendini kew? Kunaan niw vuwa ke ebpekegawas kew te silut te Megbevayà. ⁸Emun tutuu he mid-iniyugan niw en is ulaula niw he mezaat, ipeehè niw pinaagi te minge meupiya he vaal niw. ⁹Ne kenè niw iyan serigi is kevuwazan kew ni Abraham su wazà dutun pulus diyà te Megbevayà. Su egkegiyan ku sikiyu he emun iyan egkinehnglanen te Megbevayà, egkehimu he ebeelan din heini is minge watu he kevuwazan ni Abraham. ¹⁰Is ebpiley te kayu, migkayew en su ebpemilayen din en is minsan hengkey he kayu he kenà meupiya is begas din su wey mevinsuli, *he ke và dà egkegiya, is etew he kenà meupiya is ulaula zin, edsilutan sikandin te Megbevayà.* ¹¹Wahig is ibewtismu ku keniyu,” ke si Juan, “he tuus te mid-iniyugan niw is mezaat he ulaula, iyan, duen etew he ed-ilis kediey ne iyan ibewtismu zin keniyu is Wagas he Mulin-ulin, ne emun kenà, ne hapuy. Lavew sikandin kedì, ne minsan is keduwit dà te sepatun din, kenè e pa zait he suluguen din. ¹²Geina te ibpedsivey zin te edtapid is minge metazeng wey is minge lalung he etew, iring sikandin te ebpalid te parey he id-awè din is ukap. Ne haazà is parey, ederengdengen, iyan, is ukap, edtutungen din diyà te hapuy he kenà egkeevukan,” ke si Juan.

Is Kebewtismuwi ki Jesus

(Mateo 3:13-17; Marcos 1:9-11; Lucas 3:21,22)

¹³Ne zutun te timpu te kebpemewtismu ni Juan, migenat si Jesus ebpuun diyà te prubinsya he Geliliya pehendiyà te wahig he Hurdan su ebpebewtismu ki Juan. ¹⁴Ne si Juan, kenà dutun egkesuat, ne ke sikandin te, “Iyan a zait he ebewtismuwan nu kenà te iyan ka ebpebewtismu kedì.” ¹⁵Ne midtavak si Jesus, ke sikandin te, “Kenà, su kinahanglan he ebeelan ta is iring kayi wey ta meveeli is langun he egkesuatan te Megbevayà.” Ne zutun human mebpezumazuma si Juan, ne mibewtismuwan din si Jesus.

¹⁶Ne si Jesus, hein nebewtismuwan en, migaun dutun te wahig. Ne zutun nepuwasan is langit ne naahà ni Jesus is Wagas he Mulin-ulin he Megbevayà he iring te merepatik he edlugtanà diyà te kandin ne midlatun diyà te kandin. ¹⁷Ne zutun nezineg is Megbevayà diyà te langit he egkagi, ke sikandin te, “Iyan heini Anak ku he utew ku minahal. Utew ku sikandin igkelipey.”

Is Kebpenulaya ki Jesus

(Mateo 4:1-11; Marcos 1:12,13; Lucas 4:1-13)

4 ¹Ne zutun mid-agak si Jesus te Wagas he Mulin-ulin pehendiyà te tanà he wazà duen ed-ubpà he etew wey sikandin megezami

ni Setanas. ²Ne hein kepatan en he andew ne wazà si Jesus mekekaan ne utew sikandin nevitil. ³Ne zutun mid-uvayan ni Setanas si Jesus ne mibpenuley zin he egkagi te, “Emun tutuu iyan he Anak ka te Megbevayà pengelinteuwi nu he mevaluy he egkeenen heini is menge watu.” ⁴Ne midtavak si Jesus te, “Duen insurat he Lalag te Megbevayà he edhenduen te, ‘Kenà iyan dà igkeuyag te menusiya is egkeenen, kekenà, elin daan egkinehenglanan din is minsan hengkey he lalag he egkegiyen te Megbevayà.’ ”

⁵Ne zutun mid-uwit si Jesus ni Setanas diyà te inged he Hiruselim ne miduma zin diyà te utew metikang he limbuvungan te simbahan he eggezanan te Valey te Megbevayà. ⁶Ne migkegiyan din te, “Emun tutuu iyan he Anak ka te Megbevayà, umpak ka su zuen insurat he Lalag te Megbevayà he edhenduen te,

‘Ebpetevangan ka te Megbevayà te menge velinsuguen din ne edtemukan ke zan su wey kenà egkerudruzan is minsan paa nu te watu.’ ”

⁷Ne midtavak si Jesus te, “Duen daan insurat he Lalag te Megbevayà he edhenduen te, ‘Kenè kew mebaal te paagi he igezam niw te gehem te Nengazen he iyan Megbevayè niw.’ ”

⁸Ne zutun mid-uwit en maan si Jesus ni Setanas diyà te metmetikang he vuntud ne impeehè din ki Jesus is langun he menge ginhedian dini te kelibutan wey ke sengemenu is kezekelà wey ketigeyunan te kada sevaha zutun. ⁹Ne migkegiyan ni Setanas te, “Is langun he egkeehè nu, kenikew en, su ibegey ku kenikew emun edluhuzan a wey ed-ezapan a kenikew.” ¹⁰Ne mibensagan ni Jesus te, “Setanas, ewai a kenikew! Duen insurat he Lalag te Megbevayà he edhenduen te, ‘Iyan niw zà ezapa is Nengazen he Megbevayè niw. Ne is дума pa he ngazan he megbevayà, kenè niw tumana is sugù din.’ ”

¹¹Ne zutun mid-awà si Setanas ne nekeuma is menge velinsuguen te Megbevayà ne imbegey zan ki Jesus is egkinehenglanan din.

Is Kebpuunà ni Jesus te Kebpenurù
(*Mateo 4:12-17; Marcos 1:14,15; Lucas 4:14,15*)

¹²Ne hein netueanan ni Jesus he nepirisu si Juan Megbebewtismu, mid-ulì diyà te prubinsya he Geliliya. ¹³Nekeuma sikandin diyà te Nesorit ne zutun diyà med-ulì te inged he Kepirnaum he ziyà te veyvey te ranew he Geliliya, he sakup te tanà he Sebulun wey Neptali. ¹⁴Neulaula zin heini su egketuman kes netagnà dengan ni Esaias he ke sikandin te,

¹⁵ “Is TigSebulun wey is tigNeptali he kenà menge Hudiyu he ziyà mekeubpà te uvey te ranew ziyà te zapit te edsenlepan te Wahig he Hurdan, sakup te tanà he Geliliya he ed-ubpaan te kenà menge Hudiyu.

16 Is langun kayi he menge etew,
 henduen be te ziyà mekeubpà te merusirem
 wey henduen be te ziyè dan en te Iveyaan
 su geine te nekesuwey zan te Megbevayà.
 Iyan, diyà te huziyan he timpu
 egketeyawan en sikandan
 su ebpekeuma ziyà te kandan
 is ebpeketayew te isip dan.”

17 Ne puun dutun midweliyan ni Jesus is menge etew. Ke sikandin te,
 “Iniyugi niw is memezaat he ulaula niw, su megaan en edhadì keniyu si
 Megbevayà he ziyà te langit.”

Is Kedtewaga Zuen te Heepat he Menlelaya
(Mateo 4:18-22; Marcos 1:16-20; Lucas 5:1-11)

18 Sevaha he andew te edhipanew si Jesus diyà te veyvey te ranew he
 Geliliya, neehè din is dezuwa he maama, si Simon (kes mid-umanan din
 ngezani ki Pedro) wey is hazi ni Simon he si Andres. Ebpenlaya sikandan
 diyà te ranew su menlelaya sikandan. 19 Ne migkegiyan sikandan ni
 Jesus te, “Menunuges kew ves te pait? Duma kew kedì ne etew mulà is
 egkekuwa niw wey zan mekesundan kedì.” 20 Ne zutundutun mid-engked
 dan is ebpenlaya ne miduma zan kandin.

21 Ne midlaus dan dutun ne neuma ni Jesus is selakew pa he zezuwa he
 telehazi zaan, si Santiago wey si Juan, he menge anak ni Sibidiyu. Diyà
 sikandan te avang duma te amey zan su ebpurangan dan is menge laya
 zan. Mid-umew sikandan ni Jesus ne 22 zutundutun mid-ewaan dan is
 amey zan dutun te avang ne miduma zan ki Jesus.

Is Kebewii Zuen te Mahabet he Egkengeruwan
(Mateo 4:23-25; Lucas 6:17-19)

23 Ne neeneb ni Jesus is tivuuk he prubinsya he Geliliya te ebpenurù
 te menge etew ziyà te menge simbahan dan. Impesavut din te menge
 etew is Meupiya he Tudtulanen te keagi te kedhadì te Megbevayà ne
 nengeulian din is egkengesekitan te migkelingulingu he varang te zaru.
 24 Ne nevantug si Jesus diyà te tivuuk he nasyun he Sirya. Ne tenged
 kayi mibpen-uwit dan diyà te kandin is langun he egkengeruwan wey
 is egkengesekitan te ebarangbarang en he egezamen, iring te menge
 edlelungen te mezaat he mulin-ulin, menge ebevuyen, wey menge etew
 he minatey is divaluy he lawa, ne nengeulian ni Jesus heini is langun.
 25 Ne tenged dutun mezakel utew he menge etew is ebpemenduma
 kandin. Duen dutun menge tigGeliliya, duen menge etew he ebpuun te
 prubinsya he Dikepulis, duen tigHiruselim, tigHudiya, wey menge etew
 he ziyà ebpemuun te tanà he ziyà te zapit te edsilaan te wahig he Hurdan.

Is Tutuu he Kegkezeyzey
(*Mateo 5:1-12; Lucas 6:20-23*)

- 5** ¹Ne naahà ni Jesus is mezakel he menge etew ne zutun midtekezeg sikandin te vuvungan ne zutun mebpinuu. Ne mid-uevey ziyà te kandin is menge sumusundan din, ²ne mibpenurù din sikandan.
- ³Ne ke sikandin te, “Utew zeyzey is nengesayud he kenà sikandan ebpekeulaula te meupiya ke kenà sikandan edtevang an te Megbevayà su iyan sikandan egkehedian te Megbevayà.
- ⁴Utew zeyzey sikandan is ibmesakit te gehinawa zan is mezaat he ulaula su edlenganen sikandan te Megbevayà.
- ⁵Utew zeyzey sikandan is kenà mepelevawen su egkezawat dan kes tuvad he impenaad te Megbevayà.
- ⁶Utew zeyzey sikandan is iyan dekelà te gehinawa zan is kedtumana zan te egkesuatan te Megbevayà su is Megbevayà edtavang kandan te kedtumana kayi.
- ⁷Utew zeyzey sikandan is hihizuwen te menge zuma zan su is Megbevayà egkehizu kandan.
- ⁸Utew zeyzey sikandan is kenà egkezuwazuwa is gehinawa zan te kedtumana zan te meupiya he ulaula su iyan sikandan ebpekeahà keuzemà te Megbevayà.
- ⁹Utew zeyzey sikandan is ebpen-ahà te melinew he kebpekesavuk te menge etew su ed-engkenen sikandan te Megbevayà he menge anak din.
- ¹⁰Utew zeyzey sikandan is ed-antus te kegkepeuki kandan te menge etew tenged te edtumanen dan is egkesuatan te Megbevayà su iyan sikandan egkehedian te Megbevayà.
- ¹¹Su utew kew zeyzey emun tenged te sumusundan ku sikiyu edsulaan kew wey ebpesipelahan kew te menge etew, ne ebpenudtul zan te tarù he mezaat is menge vaal niw. ¹²Iyan daan heini kes mid-ulaula te menge etew zengan diyà te menge ebpeneuven te Megbevayà. Medlipey kew utew su utew zekelà is idsuhul keniyu keuzemà diyà te langit.

Is Timus wey is Sulù
(*Mateo 5:13-16; Marcos 4:21; 9:50; Lucas 8:16; 14:34,35*)

¹³Sikiyu is menge sumusundan ku, iring kew te timus he ibmeupiya te egkeenen su iyan kew ibmeupiya te tivuuk he menusiya. Iyan, emun egkeawà diyà te timus is taam din wazè en paagi he egkehimu te kebbelikua te taam din. Ne wazè en pulus dutun te timus he wazà taam; idtimbang dà ne egketekutakan te menge etew.

¹⁴Iring kew te sulù he ebpeketayew te tivuuk he menusiyà. Is inged he ziyà benguna te puntur te vuvungan, kenà ebpekeeles. ¹⁵Ne wazà daan etew he edtemteman din is sulù ne ebpelengkevan din te vinevey, kekenà, idsavuk din diyà te sevukà wey meteyawi is tivuuk he seled te valey. ¹⁶Ne iring din ded daan is menge ulaula niw he meupiya; kinahanglan he kenè niw ieles. Ipeehè niw te menge etew is menge ulaula niw he meupiya ne tenged kayi ebpekezalig dan te Amey tew he Megbevayà he ziyà te langit.

Is Ketumana te Kesuguan

¹⁷Kenè niw isipa he iyan inhendini ku te kelibutan is id-awè ku kes kesuguan he imbegey kenitew pinaagi ki Moises wey kes menge penurù dengan he imbegey pinaagi te menge ebpeneuven te Megbevayà. Umba nekehendini a su wey mepurungi te edtuman. ¹⁸Su taman te kenè pa egkehanew is langit wey tanà, kenà egkehimu he id-awà is minsan sengetagè dà he lalag duen te kesuguan. Taman te kenè pa egketuman is langun, kenà daan egkeawà is kesuguan. Kenè niw lipati heini. ¹⁹Umba ke zuen minsan hentei he edlegkawen din is minsan utew zà deisey zuen te kesuguan ne ibpenurù din te zuma zin he kenà tumana haazà is midlagkew zin, iyan sikandin utew minus is pid-etawan din ke edhadì is Megbevayà he ziyà te langit. Ne iring din daan ke zuen etew he edtumanen din ebpurungi is kesuguan ne ibpenurù din diyà te zuma is kedtumana kayi, iyan sikandin lavew te langun he etew ke edhadì keuzemà is Megbevayà. ²⁰Egkegiyan ku sikiyu he wey kew zà egkehedi te Megbevayà ke edtumanen niw is egkesuatan te Megbevayà ne kinahanglan daan he lavew kew pa he metinumanen kenà is menge menunudlù te kesuguan wey is menge Perisiyu.

Is Ketudluanan Mehitenged te Kegkepauk

²¹Netuenan niw kes impenurù dengan diyà te menge lukes tew he indawey is kebpememunù; su is ebunù ne edhukuman te silut. ²²Ne iyan kedì he penurù is: minsan sikan is egkepauk dà te zuma zin, edhukuman daan sikandin te Megbevayà. Ne sikan is edsulà te zuma zin te, 'Wazè nu pulus he etew!' ne egkeuwit sikandin diyà te husayen. Ne sikan is edsulaan din is duma zin he egkagi te, 'Tulebung ka he wazè nu pulus,' ne zait sikandin he egkeuwit diyà te hapuy te Impirnu. ²³Umba ke ziyè ke en te lama te Valey te Megbevayà su ebpemuhat ka ziyà te Megbevayà ne egketenuzan nu he zuen salè nu te zuma nu, ²⁴itagak nu zè pa haazà is ibpemuhat nu ne beyai nu haazà is duma nu wey kew medhusey. Ne zutun ke ebpeked-uliey kew en te meupiya he gehinawa, likù ka human ne leusa nu haazà is kebpemuhat nu ziyà te Megbevayà.

Is Husayen

(Mateo 5:25,26; Lucas 12:57-59)

²⁵Ne emun duen etew he insumbung ke zin ne egkeuwit ka ziyà te hukmanan, meupiya ke ebpekidhusey ka kandin te kenè kew pa

ebpekeetuvang te huwes. Su emun ebpekeetuvang kew en te huwes kela ke ipalad ka zutun te huwes diyà te pulis ne egkepirisu ka. ²⁶Ne kenà duwazuwa he zutun ka ebpekeubpà taman te egkegempusan nu is multa kenikew.

Is Ketudluanan Mehitenged te Kedselselai te Esawa

²⁷Nezineg niw kes impenurù dengan he, ‘Kenè nu selselai is esawa nu.’ ²⁸Ne iyan kedì he penurù is: ke zuen minsan hentei he maama he edtengteng dà te vahi he kenè din esawa ne egkeerigan en dutun, ne haazà is maama, nekesalè en dutun te esawa zin. ²⁹Ne emun iyan nu igkepenulayi is kewanan he mata nu, lugita nu wey itimbag! Meupiya pa ke wazè nu mata, kenà ke igkeagbur ka ziyà te hapuy he Impirnu is tivuuk he lawa nu. ³⁰Emun iyan nu igkepenulayi is kewanan he velad nu ne tempeza nu wey itimbag. Meupiya pa ke wazè nu velad, kenà ke igkeagbur te Impirnu is tivuuk he lawa nu.

Is Ketudluanan Mehitenged te Kebpesuwayà

(Mateo 19:9; Marcos 10:11,12; Lucas 16:18)

³¹Impenurù daan dengan he emun duen maama he ed-engkezan din is esawa zin ne kinahanglan he vegayi zin haazà is bahi te kemetuuzan he iyan tuus te kebpesuwayè dan. ³²Ne iyan kedì he penurù is: emun ed-engkezan te maama is esawa zin he wazà sikandin is maama selselai zutun te esawa zin, heini he maama, ne ebpekesalà su pinaagi kayi ibpesavut din he nekesalà kandin is esawa zin. Ne ebpekesalà daan is maama he ebpegesawa zutun te vahi he mid-engkezan te esawa zin.

Is Ketudluanan Mehitenged te Kebpenaad

³³Netueanan niw zaan kes impenurù dengan diyà te minge lukes tew he emun duen ibpenaad niw ziyà te Nengazen kenà egkehimu he kenè niw edtumanen. Kinahanglan he tumana niw. ³⁴Ne iyan kedì he penurù is: emun duen ibpenaad niw ziyà te minsan hentei, kenè niw ipengeluambit he medlanggà is renged niw he langit wey tanà ke kenè niw egketuman is lalag niw su is langit, iyan pinuuwà te Megbevayà ³⁵ne is tanà, iyan nesevukan te paa zin. Ne kenè niw zaan ipengeluambit he mezeeti is inged he Hiruselim ke kenè niw egketuman is lalag niw su iyan ed-ubpaan te lavew he hadi. ³⁶Ne minsan is ulu niw, ke zuen ibpenaad niw, kenè niw kegiya he mebmeputi is bulvul niw ke kenè niw egketuman haazà is impenaad niw su wazè niw gehem wey mehimu is minsan sevaha zà he vulvul niw he mebmeputi, ne emun kenà, ne mebmeitem. ³⁷‘Uya’ zà ne emun kenà, ne ‘Wazà’ is kegiya niw. Su is minsan hengkey he lalag he egemiten niw te kedhegeta te minge penaad niw, diyà ebpuun te ki Setanas.

Is Ketudluanan Mehitenged te Kebales

(Mateo 5:38-42; Lucas 6:29,30)

³⁸Netuenan niw zaan kes penurù dengan he ke zuen etew he nezeetan din is mata te zuma zin egkehimu he edèdeetan daan is kandin he mata. Ne emun duen nekezezaat te ngipen te zuma zin, egkehimu he edèdeetan daan is kandin he ngipen. ³⁹Ne iyan kedì he penurù keniyu is: kenà egkehimu he ebelesan ta is ebpesipala kenita, kekenà, ebpurungan ta. Ne emun edtebprien din is kewanan he enaping ta, egkegiyan ta he egkehimu pa ke elin din edtebprien is divaluy. ⁴⁰Ne emun duen ebpenukut kenita ne edluwasen din is kemising ta, su iyan din ibpeveyad, elin ta ibegey kandin is kumbalè ta. ⁴¹Ne ke zuen sundaru he edtegelelen ki zin ibpeuwit te uwiten din te sengekilumitru, ed-uwiten ta te zezuwa he kilumitru. ⁴²Ke zuen ebuyù, ebegayan ta; ne ke zuen edsambey, edsembayan ta.

Is Ketudluanan Mehitenged te Kebpurungi te Zuma

(Mateo 5:43-48; Lucas 6:27,28,32-36)

⁴³Netuenan ta kes penurù dengan he is menge zuma ta, ebpurungan ta. Ne is menge kuntada ta, edtebeken ta. ⁴⁴Ne iyan mulà kediey he penurù is: ebpurungan ta is menge kuntada ta wey ebpenubtuvazan ta te meupiya is ebpesipala kenita. ⁴⁵Ne emun ebeelan niw heini ebpekeiring kew te Amey tew he Megbevayà he ziyà te langit. Su is Megbevayà, kenà iyan dà ebpesilaan din te andew is menge metazeng he menge etew, kekenà, elin daan is menge kenà metazeng. Ne kenà iyan dà is meupiya is ulaula zin ebegayan din te uzan, kekenà, elin daan is mezaat is ulaula zin. ⁴⁶Kenè niw isipa he edsuhulan kew te Megbevayà ke iyan dà ebpurungan niw is ebpurung daan keniyu; su minsan is menge menunukut te vuhis he limbung is ulaula zan, ebpurungan dan daan is ebpurung kandan. ⁴⁷Ne emun iyan niw zà idtetepian is menge emigu niw, hengkey is igkezeligi keniyu? Wazà, su minsan is menge etew he wazà med-azap te Megbevayà, ed-ul-ulahan dan is iring kayi. ⁴⁸Kinahanglan he meheget is kebpurungi niw te minsan hentei. Su kes Amey tew ziyà te langit, utew meheget is kebpurungi zin te menusiya.”

Is Ketudluanan Mehitenged te Kebegey

6 ¹“Kinahanglan he kenà iyan idsimbaha niw te Megbevayà su wey mezalig kew te menge etew. Su emun iyan heini ulaula niw, kenè kew edsuhulan keuzemà te Megbevayà he Amey tew ziyà te langit.

²Ne emun duen ibegey niw ziyà te egkeayuayu kinahanglan he kenà iyan id-ul-ulaha niw zutun su wey mezalig kew te menge etew. Su iyan haazà baal te menge etew he tarù is kedtuu zan. Ed-ul-ulahan dan haazà diyà te menge simbahan wey ziyà te kersada su wey mezalig sikandan

te minge etew. Kenè niw lipati he tenged te nezawat dan en is kedeliga kandan te minge etew, wazè en egkezawat dan he ebpuun diyà te Megbevayà. ³Iyan, sikiyu mulà, ke zuen idtavang niw ziyà te egkeayuayu kinahanglan he kenà egketuenan te minsan minge zuma niw. ⁴Kenè niw petueni te minge etew haazà is kebegey niw te tavang dutun te egkeayuayu, ne is Amey tew ziyà te langit, iyan dà ebpekeahà dutun ne iyan daan edsuhul keniyu.

Is Ketudluanan Mehitenged te Ked-ampù

(Mateo 6:5-15; Lucas 11:2-4)

⁵Ne emun ed-ampù kew kenè niw iringi is minge etew he tarù is kedtuu zan. Egkesuatan dan he mekehitudeng dan is ed-ampù diyà te minge simbahan wey ziyà te kersada wey maahà sikandan te minge etew. Egkegiyen ku keniyu he nezawat dan en is kedeliga kandan te minge etew. Ne wazè en дума pa he suhul he egkezawat dan he ebpuun te Megbevayà. ⁶Iyan, sikiyu, ke ed-ampù kew, med-ulì is kada sevaha ziyà te valey zin, ne medlelekeb wey kenà maahà, ne zutun med-ampù te Amey tew he Megbevayà he kenà egkeahà. Ne is Amey tew he Megbevayà, iyan dà ebpekeahà kandin ne iyan edsuhul kandin keuzemà.

⁷Emun ed-ampù kew kenè niw gemita is mezakel he minge lalag he wazà minge pulus su iyan heini ulaula te minge etew he wazà med-azap te tutuu he Megbevayà. Iyan diyà te gehinawa zan is: ebpeminegen te Megbevayà is ked-ampù dan emun utew melugayad. ⁸Kenè niw iringi sikandan su netuenan he zaan te Amey tew is egkinehenglanen te uman sevaha te sikitew te wazè tew pa vuyua. ⁹Iringi niw heini ke ed-ampù kew:

‘Amey zey ziyà te langit,
berakat he tehuza te menusiya
is ngazan nu,

¹⁰berakat he medhadì ka te menusiya,
berakat he tumana is egkesuatan nu
zini te tanà iring
te layun edtumana ziyà te langit.

¹¹Begayi key te egkeenen he egkinehenglanen dey guntaan;

¹²peseyluwa key te minge salè dey
iring te nekepesaylu key te nekesalà kenami.

¹³Ipekeziyù key kenikew te mezesen he penuley
ne ilikey key kenikew ki Setanas.’

¹⁴Su sikiyu is minge etew, ke ebpeseyluwen niw is nekesalà keniyu, ebpeseyluwen kew zaan te Amey tew he ziyà te langit. ¹⁵Iyan, emun kenè kew ebpesaylu te minge zuma niw he etew, kenè kew zaan ebpeseyluwen te Amey tew he ziyà te langit.

Is Ketudluanan Mehitenged te Kedsalang Kegkaan

¹⁶Ne emun edsalang kew egkaan su ebpengampù kew ziyà te Megbevayà, kenè niw ipetuusi pinaagi te kebuvuked niw iring te minge etew he egkesuat he mezalig sikandan te minge zuma he etew. Edrigurigu zan, ne kenè dan ebpendapug wey kenè dan ebnuwat su wey metueni te minge etew he edsalang dan egkaan. Egkegiyen ku keniyu he nezawat dan en is kedeliga kandan te minge etew. Ne wazè en дума pa he suhul he egkezawat dan he ebpuun te Megbevayà. ¹⁷Ne sikiyu mulà, emun edsalang kew egkaan, pendapug kew wey penuwat kew ¹⁸su wey kenà metueni te zuma he edsalang kew. Iyan dà egkesayud is Amey tew he Megbevayà he wazà duen ebpekeeles. Iyan sikandin ebpekehà te ulaula nu minsan sebsevaha nu, ne iyan daan sikandin edsuhul kenikew.

Is Minge Ketigeyunan

(Mateo 6:19-21; Lucas 12:33,34)

¹⁹Kenè niw tipigi is ketigeyunan dini te kelibutan su zini egkeketket te ipes wey edtengisen. Ne egketakew su egkselezan is baley niw te tekawen. ²⁰Tipigi niw ziyà te langit kes ketigeyunan he iyan kes idsuhul te Megbevayà keniyu su zutun kenà egkeketket te ipes, wey kenà edtengisen ne kenà daan egketakew. ²¹Ne zutun ke hendei is egketeguan te ketigeyunan niw, dutun daan is gehinawa niw.

Is Sulù

(Mateo 6:22,23; Lucas 11:34-36)

²²Is mata ta, ne iring te sulù kayi te lawa ta su emun merayag is ked-ehè ta, *he ke và dà egkegiya, metazeng is ulaula ta, ne henduen be te egketeyawan is tivuuk he lawa ta.* ²³Iyan, emun lakap ki, *he ke và dà egkegiya, emun lalung ki, ne henduen be te egkezukileman ki. Ne emun nelakap ki tenged te kelelalung ta ne utew merusirem iyan is ibayè ta.*

Is Minge Kinehnglanan

(Mateo 6:24-34; Lucas 16:13; 12:22-31)

²⁴Is uripen, kenà egkehimu he zezuwa is tegiuripen kandin. Su emun dezuwa is ebayàbayà kandin, edtehuzen din is sevaha ne egkepeukan din is sevaha. Ne emun kenà, ne egkeepesan din is sevaha, ne ebmahalen din is sevaha. Ne iring din ded daan emun iyan mahal ziyà te gehinawa nu is ketigeyunan, su kenà egkehimu he mahal zaan diyà te gehinawa nu is Megbevayà.

²⁵Ne tenged kayi, egkegiyen ku keniyu te minge sumusundan ku he kenè kew meseeng te egkeenen wey ed-inumen he igkeuyag niw. Kenè

kew zaan meseeng te ugelingen he idsun-ud te lawa niw. Su mibegayan kew te Megbevayà te gehinawa niw wey lawa niw he mahal utew; ne wey pe be kenà mehimu he ebegayan kew zin daan te egkeenen wey ugelingen? ²⁶Isipa niw is menge tagbis he ebpemenlayang. Kenè dan ebpemula; kenè dan edragun; kenè dan daan ederengdeng. Ne minsan pa zutun ebpengelintau is Megbevayà he ziyà te langit te egkekaan dan. Ne iyan kew pe be is etew he lavew pa he mahal ziyà te kandin kenà is menge tagbis. ²⁷Ne minsan sengemenu is kegkenuguni te etew te untung din, wazà minsan hengkey he paagi he egkesumpatan din te minsan deisey zà.

²⁸Ne maan is egkeseeng kew te ugelingen? Ahaa niw is menge kevukazan te sagbet. Kenè dan edterebahu; kenè dan daan ebpengavel. ²⁹Ne venar is egkegiyen ku keniyu he minsan pa si Hadì Sulumun dengan is sepian utew wey nevantug, ne wazà mekesusuluwan is kezagwey te menge bisti zin te kezagwey kayi te menge kevukazan. ³⁰Is sagbet, wazè din bali; egkeehè ta guntaan, ne kenè en utew egkeuget ne egkegangu ne ebinsulan. Iyan, ke edhimuwen te Megbevayà he mekempet minsan heini is menge sagbet, iyan kew pe be kenè din daan mevegayi te igkevisti. Maan is utew zeisek is kedsarig niw kandin. ³¹Ne tenged kayi, kenè kew meseeng wey megkagi te, 'Hengkey is egkekaan tew, ne hengkey is ed-inumen tew, ne hengkey zaan is igkevisti tew?' ³²Iyan heini igkeseeng te menge etew he wazà medtuu te tutuu he Megbevayà. Iyan, is Amey tew he Megbevayà he ziyà te langit, netuenan din he zaan he egkinehnglanan niw is iring kayi. ³³Iyan, sikiyu mulà, kinahnglan he iyan mahal ziyà te gehinawa niw is kebphadì niw kandin wey is metazeng he ulaula he ebpevelan din keniyu ne zutun ibegey zin keniyu is langun he egkinehnglanan niw. ³⁴Kenè kew meseeng ke hengkey is menge meregen he egkeulaula niw te huziyan he andew su wey niw en heeyan isipa zutun te andew he egkehita vù en. Iyan dà isipa niw is guntaan en he egkehita vù keniyu."

Is Ketudluanan Mehitenged te Kedsawey

(Mateo 7:1-5; Lucas 6:37,38,41,42)

7 ¹"Kenè kew medsawey te zuma niw ne kenè kew zaan edsewayen te Megbevayà. ²Su is idsawey niw te zuma niw ne iyan daan idsawey keniyu te Megbevayà. Is kezekelà te idsawey nu te zuma nu, iyan daan kezekelà te idsawey kenikew te Megbevayà. ³Sikew is layun edsawey te zuma nu, maan is edsawey ka te salà te zuma nu he iring dà te pesek he nekeahuk diyà te mata zin? Ne sikew, duen nu salà he iring kezekelà te vatang he nekevuta te mata nu ne ebpesegdanen nu. ⁴Ne egkegiyan nu pa sikandin he id-awè nu haazà is nekepesek kandin, iyan, nepesek mulà is kenikew he mata te vatang ne ebpesegdanen nu! ⁵Ute w tarù is ulaula nu!

Ihuna nu iawà is batang he nekepeseke kenikew ne human ka ebpekeahà. Ne zutun melemu nu zà igkeawà haazà is nekepeseke te zuma nu.”

⁶*Ne zutun insempità ni Jesus is minge etew he kenà egkesuat he ebpemineg te Lalag te Megbevayà. Ke sikandin te, “Kenè niw ivegey te asu is butang he mahal ziyà te Megbevayà su kela ke kegata kew zin. Ne kenè niw zaan isawed is minge mahal he ebeliegen diyà te etuvangan te minge vavuy su egketekutakan dan dà.*

Is Kebuyù Diyà te Megbevayà
(*Mateo 7:7-12; Lucas 11:9-13*)

⁷Penigudu kew vuyù diyà te Megbevayà ne ebegayan kew zin; penigudu kew pen-ahà ne ibpeturedu zin keniyu is ebpen-ahaan niw. Penigudu kew penelehuzan ne ebpuwasan kew zin. ⁸Su is langun he ebuyù diyà te Megbevayà ebpekezawat. Ne sikan is ebpen-ahà, ebpeketuredu; ne sikan is ebpenelehuzan, ne ebpuwasan daan te Megbevayà. ⁹Ne sikiyu is minge ginikanan, ke zuen ebuyuen te anak niw he egkeenen kenà egkehimu he watu is ibegey niw. ¹⁰Ne emun ebuyù keniyu te pait, kenà daan egkehimu he uled is ibegey niw. ¹¹Ne sikiyu is menusiya he kenà memetazeng, emun meupiya is ibegey niw ziyà te minge anak niw, iyan pe be is Amey tew he Megbevayà diyà te langit kenà meupiya is ibegey zin diyà te minsan hentei keniyu ke ebuyù ziyà te kandin.

¹²Is egkesuatan niw he ed-ul-ulahan te minge zuma niw ziyà te keniyu, iyan niw zaan ul-ulaha ziyà te kandan. Iyan heini hustu he kedtumana te kesuguan he imbilinbilin ni Moises. Iyan daan heini kes impenurù dengan te minge ebpeneuven te Megbevayà.

Is Dalan Pehendiyà te Langit wey Is Pehendiyà te Impirnu
(*Mateo 7:13,14; Lucas 13:24*)

¹³Diyè kew ikul te meliget he pultahan he idselang pehendiyà te untung he wazè din pidtemanan su meluag mulà is pultahan wey melemu he ed-ikulen is dalan he ibpehendiyà te Impirnu, ne mezakel he etew is ed-ikul zutun. ¹⁴Meliget mulà is pultahan wey meregen he ed-ikulen is dalan he ibpehendiyà te untung he wazè din pidtemanan ne mezelag dà is ed-ikul kayi.

Is Begas te Pinemula
(*Mateo 7:15-20; Lucas 6:43-44*)

¹⁵Likayi niw is minge ebpeneuven kun te Megbevayà he tarù is ibpenurù dan. Henduen be te hustu sikandan he tumutuu te Megbevayà, iyan, ebpekezezaat is ibpenurù dan. ¹⁶Egketuusan niw he teruen sikandan pinaagi te ulaula zan su is banag, kenà ebegas te paras ne

is segà, kenà ebegas te igira. ^{17,18}Is kayu he wazè din erat, meupiya is begas din; kenà ebpemegas te mezaat. Is kayu he zuen din erat, mezaat is begas din; kenà ebpemegas te meupiya. ¹⁹Is kayu he mezaat is begas din, ne ebpilayen ne ebinsulan. ²⁰Iring din ded daan is minge ebpeneuven kun te Megbevayà he tarù is ibpenurù dan su edsilutan sikandan te Megbevayà. Ne egketuasan niw he teruen sikandan tenged te minge ulaula zan he mezaat.

Is Kenà Ebpekeragkes te Edhedian te Megbevayà

(Mateo 7:21-23; Lucas 13:25-27)

²¹Su zuen minge etew he ebpengumew-umew kedì te, ‘Nengazen, he Nengazen!’ Iyan, kenà langun te sikandan ebmehimuwèn he mehedii te Amey ku he Megbevayà he ziyà te langit, kekenà, iyan dà sikan is edtuman te egkesuatan te Megbevayà. ²²Ne zutun keuzemà te andew te kedsilut, mezakel is ebpehizuhizu zini te kedìey he egkagi te, ‘He Nengazen, pinaagi te gehem nu neketagnè key, ne nengeulian dey is ebpenlelungen te mezaat he mulin-ulin, ne mezakel is minge egkein-inuwan he nengehimu zey.’ ²³Ne iyan tavak ku kandan dutun is: ‘Kenè ku sikiyu egkekilala. Sikiyu is memezaat is ulaula, awà kew kayi!’

Is Dezuwa he Mibevalley

(Mateo 7:24-27; Lucas 6:46-49)

²⁴Ne minsan hentei he nekezineg kayi te langun he sambag ku ne ebpezumdumahan din, iring sikandin te etew he uluwanen, su heini is uluwanen, diyà mebevalley te zivavew te zekelà he watu. ²⁵Ne mibegyuan. Mid-uzan te mereges ne midalem is minge wahig ne utew mevendes is keramag, iyan, wazà merundus haazà is baley su ziyà benguna te zivavew te zekelà he watu. ²⁶Ne is minsan hentei he ebpemineg dà kayi te sambag ku ne kenè din ebpezumdumahan, iring sikandin te etew he tulebung. Heini is tulebung, ne ziyà mebevalley te pantad. ²⁷Ne mibegyuan daan; ne midalem haazà is wahig ne mibpengeramag te mevendes ne nerundus haazà is baley zin ne nepurung mewagey.”

²⁸Ne nekepasad si Jesus te ebpenurù dutun. Ne neinuinu is mezakel he nengetigum dutun ²⁹su is kebpenurù din, kenà iring te kebpenurù te minge menunudlù te kesuguan su zuen gehem mulà te penurù din.

Is Kebewii te It-iten

(Mateo 8:1-4; Marcos 1:40-45; Lucas 5:12-16)

8 ¹Ne midtupang si Jesus ne utew mezakel he minge etew is nemenduma kandin. ²Ne zutun, duen it-iten he mid-uvey ziyà te kandin. Ne heini is it-iten, midluhuzan din si Jesus ne migkagi te, “He Zatù, emun meupiya zà te

gehinawa nu netuenan ku he egkeulian a kenikew kayi te utew meremerik he egezamen ku.” ³Ne midampà sikandin ni Jesus te egkagi te, “Uteu meupiya te gehinawa ku. Meulii ka.” Ne zutundutun nehanewhanew zutun te etew haazà is it-it din. ⁴Ne migkegiyan ni Jesus te, “Pemineg ka, Mama, kenè nu tudtula ziyà te minsan hentei, kekenà, pehendiyè ka guntaan te memumuhat he midhimu te Megbevayà wey zin maahà he neulian ka; ne tumana nu sikan is pemuhat he insugù dengan ni Moises te it-iten, su wey metueni te langun he neulian ka iyan.”

Is Kebewii Zuen te Suluguen te Kepitan

(Mateo 8:5-13; Lucas 7:1-10)

⁵Ne zutun midhendiyà si Jesus te inged he Kepirnaum. Ne te kedseled din dutun te inged, duen etew he kenà Hudiyu he kepitan te nenggatus he sundaru he mid-uevy ki Jesus ⁶he egkagi te, “Datù, diyà te valey ku egkezeruwan is suluguen ku. Minatey is divaluy he lawa zin ne merasey utew is egezamen din.” ⁷Ne migkagi si Jesus te, “Edhendiyàn a ne ebewian ku wey sikandin meulii.” ⁸Ne midtavak haazà is kepitan te, “Kenà, Datù, su,” ke sikandin, “tenged te lavew ka kedì, kenà a zait he ebigatbigat pa maan kenikew he edhendiyà te valey ku. Uteu ka mekegegehèm ne minsan ke egkagi ke zà te, ‘Meulii sikandin,’ ne egkeulian en is suluguen ku. ⁹Netuenan ku heini su iring te zuen ebayàbayà kedì, ne zuen daan menge sundaru he ebeyveyaan ku. Ne edsuguen ku is sevaha he medhipanew ne edhipanew en. Ne edtewagen ku is sevaha he medhendini ne edhendini en; ne edsuguen ku zaan is suluguen ku ke zuen ebpeveelan ku ne ebeelan din en. Ne iring din ded daan diyan te kenikew su is egkegiyan nu ne egkehimu en.” ¹⁰Ne te nezineg ni Jesus heini, ne utew neinuinu ne ke sikandin diyà te menge etew he nemenduma kandin te, “Wazè ku pa meuma is etew he kevuwazan ni Israyil he iring kayi he utew mezesen is kedtuu zin. ¹¹Ne kenè niw lipati heini is egkegiyan ku he mezakel he etew he kenà menge Hudiyu he ziyà ebpemuun te meziyù, diyà te zapit te edsilaan wey ziyà te zapit te edsenlepan, ne ebpekidugan dan keuzemà ki Abraham wey ki Isaak wey ki Hakub diyà te ginhedian te Megbevayà. ¹²Iyan, mezakel zaan he kevuwazan ni Israyil he midtegenahan pezem te Megbevayà te ginhedian din, iyan, igketimbag sikandan diyà te merusirem he utew meziyù te ed-ubpaan te Megbevayà. Ne ebpemekekulahì dan is ebpemekengingitel he utew zan ebpemekedsendit.” ¹³Ne zutun migkegiyan ni Jesus kes kepitan te, “Uli ka; ne sumalà is midtuuwan nu iyan daan ed-ul-olahan ku.” Ne zutundutun neulian haazà is suluguen kayi te kepitan.

Is Kebewii te Menge Eteu

(Mateo 8:14-17; Marcos 1:29-34; Lucas 4:38-41)

¹⁴Ne midhendiyà si Jesus te valey ni Pedro ne zutun neehè din is enugang he vahi ni Pedro he edetengen ne kenè en ebpekeeneu. ¹⁵Ne

midampà ni Jesus is belad dà dutun te meritan ne zutundutun neulian. Ne mid-enuw haazà is meritan ne midsuba sikandin te ibpekaan din engki Jesus.

¹⁶Ne hein mahapun dutun duen nemenelavuk ki Jesus he mezakel he menge etew he ebpen-uwit te mezakel he ebpenlungen te menge mezaat he mulin-ulin. Ne mibpemewian ni Jesus sikandan pinaagi zà te talag din ne nengeulian en sikandan. Ne mibpemewian din daan is langun he nengezeruwan ne nengeulian. ¹⁷Umba mid-ulaula zin heini su egketuman dutun kes netagnà dengan ni Esaias he ebpeneuven te Megbevayà, he egkagi te,

“In-awè din is menge zaru tew
ne mibewian din is menge ebpengezamen tew.”

Is Ebpemenduma Pezem ki Jesus

(Mateo 8:18-22; Lucas 9:57-62)

¹⁸Ne sevaha he andew zutun naahà ni Jesus is mezakel he menge etew he nengetigum. Ne migkegiyan din is menge sumusundan din te, “Edhendiyè kiw te zehipag.” ¹⁹Ne zutun mid-uvay kandin is sevaha he menunudlù te kesuguan. Ke sikandin diyà te ki Jesus te, “He Menunudlù, eduma a kenikew minsan hendei ka ebpeyayà.” ²⁰Ne migkagi si Jesus diyà te kandin te, “Is laku ne zuen surung he egkeubpaan din, ne is tagbis, duen din salag, iyan, siak is migeraran te Kakey te Menusiyà, minsan hendei e zà memekhezegà su wazà ed-ubpaan ku.” ²¹Ne zutun duen sevaha he sumusundan ni Jesus he migkagi te, “Datù, ed-uli e zè pa su kenè e pa ebpekezuma kenikew taman te kenè pa egketapus is umur te amey ku. Ne emun igkeleveng ku en ne human a eduma kenikew.” ²²Ne midtavak dutun si Jesus te, “Kenà, su iyan edleveng te menge minatey sikan is wazà mekezawat te untung he wazè din pidteman. Iyan, sikew mula, дума ka kediey.”

Is Kedewaya ni Jesus te Keramag

(Mateo 8:23-27; Marcos 4:35-41; Lucas 8:22-25)

²³Ne zutun, mid-untud si Jesus te zekelà he avang ne miduma kandin is menge sumusundan din. ²⁴Ne hein diyè dan en te lawed, ne midtekewtekew mebpengeramag te utew mevendes ne egkeselikuvungan en te vagel haazà is avang. Iyan, nekelipezeng dutun si Jesus. ²⁵Ne mid-uvayan sikandin te menge zuma zin su ebpu kawen dan. “Tevangi key, Datù,” ke sikandan, “su egkelavu en heini is avang ne egkengegerè kiw en.” ²⁶Ne migkagi si Jesus, “Maan is egkehandek kew? Maan is kenè kew ebpekesarig kediey?” Ne mid-enuw si Jesus ne migkegiyan din haazà is keramag wey haazà is menge vagel he med-engked dan. Ne zutun mibmelinew utew. ²⁷Nengeinuinu is langun he menge zuma zin.

“Hengkey he etawa heini?” ke sikandan, “su minsan is keramag wey menge vagel ne ebpemineg kandin!”

Is Kebewii Zuen te Menge Etew he Midsuukan te Menge Mezaat he Mulin-ulin

(Mateo 8:28-34; Marcos 5:1-20; Lucas 8:26-39)

²⁸Ne nekezunggù dan diyà te zehipag te ranew diyà te tanà he sakup te inged he Gedara. Ne zuen midsinugung ki Jesus dutun he zezuwa he etew he ziyà ebpuun te menge surung te pangpang he penlevengà. Midsuukan haazà is dezuwa te menge mezaat he mulin-ulin he ebpekekaid ne tenged kayi egkengehandek is menge etew he ebayà dutun. ²⁹Ne mibensagan dan si Jesus, ke sikandan te, “Sikew is Anak te Megbevayà, edsilutan key ve kenikew te wazè pa meuma is midtelaan he timpu?” ³⁰Ne zutun te uvey, duen mezakel he menge vavuy he ebpemenuwal. ³¹Midhangyù ki Jesus haazà is menge mezaat he mulin-ulin, ke sikandan te, “Emun edsegsegen key kenikew, tuguti key he mekesuuk key keniyà te menge vavuy.” ³²Ne midtavak si Jesus te, “Egkehimu.” Ne mid-awè dan ne midsuukan dan haazà is menge vavuy. Ne is langun he menge vavuy, nemelelaguy zan petupang dutun te utew mesilid he kelendigan ne mid-agbur zan diyà te ranew zutun ne nengelened dan maamin.

³³Ne zuen menge etew he ebpemen-elima zutun te menge vavuy, ne nemenhendiyè dan te inged is ebpemelelaguy ne midtutdulan dan is menge etew ke hengkey is nehítavù duen te midsuukan te mezaat he mulin-ulin wey kes menge vavuy. ³⁴Ne hein netuenan heini te menge meginged mibayaan dan si Jesus. Ne hein neuma zan, midhengyuan dan he med-awà sikandin dutun te inged dan.

Is Kebewii Zuen te Etew he Mibinting

(Mateo 9:1-8; Marcos 2:1-12; Lucas 5:17-26)

9 ¹Ne zutun mid-untud en maan ensi Jesus te avang ne midlikù diyà te zehipag. Ne mid-ulì diyà te inged din. ²Ne nemekeuma is menge etew he ed-uwit diyà te ki Jesus te minatey is divaluy he lawa zin he ziyà iphezegà te zuyanà he ebintingen. Hein nesavut ni Jesus he zekelà is kedsarig dan kandin, migkegiyan din haazà is minatey is divaluy he lawa te, “Mama, mebmeupiya is gehinawa nu, su nepesaylu en is menge salè nu.” ³Ne zuen dutun menge menunudlù te kesuguan; ne te kegkezinega zan dutun, neisip dan he utew zekelà is supak ni Jesus te Megbevayà. ⁴Ne nesavut ni Jesus is diyà te isip dan ne migkegiyan din sikandan te, “Maan is ed-isip kew te mezaat he iring keniyang? ⁵Hendei zapit is egkehimu te etew zà duen, iyan be is kebpesaylu te salè din wey ke iyan is kegkeulii kandin? ⁶Pinaagi te kebewii ku guntaan kayi te etew, ibpeehe ku keniyu he siak is Kakey te Menusiyà, duen ku kegehemi dini te lumpad te

kebpesaylu te salà.” Ne zutun migkegiyan din haazà is etew he minatey is divaluy he lawa te, “Sikew, Mama, enew ka; kuwaa nu heeyan is duyanè nu ne uli ka.” ⁷Ne zutundutun mid-enuw haazà is maama ne mid-uli. ⁸Hein naahà heini te minge etew zutun, nengehandek dan ne midalig dan is Megbevayà tenged te mibegayan din is menusiya te kegehem he iring kayi.

Is Kedtewaga ki Mateo

(Mateo 9:9-13; Marcos 2:13-17; Lucas 5:27-32)

⁹Ne mid-ewaan sikandan ni Jesus ne zutun te ibayè din neehè din is menunukut te vuhis he egngезanan ki Mateo he zutun he timpu ebpimpinuu ziyà te upisina zin. Migkegiyan ni Jesus te, “Sunud ka kedi.” Ne zutun midhitindeg si Mateo ne midsunud ki Jesus.

¹⁰Ne hein egkaan si Jesus wey is minge sumusundan din diyà te valey ni Mateo, mezakel is minge menunukut te vuhis wey minge etew he mesinupaken he nemekeuma ne nemegaan duma kandan. ¹¹Duen minge Perisiyu he nekeahà dutun te minge etew. Ne migkegiyan dan is minge sumusundan ni Jesus te, “Is egalen niw, maan is egkaan wey ed-inum duma te minge limbungan he menunukut te vuhis wey minge mesinupaken?” ¹²Nezineg haazà ni Jesus ne midtavak sikandin pinaagi te sempità, ke sikandin te, “Sikan is wazè din daru, ne kenà egkinahanglan he ebpewawì, kekenà, iyan dà sikan is duen din daru. ¹³Susiya niw ke hengkey is kehulugan duen te insurat he Lalag te Megbevayà he egkagi te, ‘Kenè ku iyan egkesuatan is kebpemuhat niw, kekenà, iyan egkesuatan ku is kebpekedhizuwè niw.’” Ne mid-uman mekgagi si Jesus te, “Siak, wazà a medhendini wey ku ikepeengked te ed-ulaula te mezaat is minge metazeng, kekenà, iyan is minge mesinupaken te Megbevayà.”

Is Insà Mehitenged te Kedsalang Egkaan

(Mateo 9:14-17; Marcos 2:18-22; Lucas 5:33-39)

¹⁴Ne zutun nekeuma ziyà te ki Jesus is minge sumusundan ni Juan Megbebewtismu. Ne mid-insè dan te, “Is minge sumusundan nu, maan is kenè dan ebentayan is betasan tew he edsalang egkaan? Sikami mulà wey is minge Perisiyu, layun key edsalang egkaan wey zey mepurungi is ked-azap dey te Megbevayà.” ¹⁵Ne migkagi si Jesus diyà te kandan te, “Penenglitan, ke zuen eseweey kenà egkehimu he kenà edlipey is minge zuma te ebpengesawa ke kemulu zan pa zuma haazà is ebpengesawa. Ne zutun te timpu he ibpaawè en diyà te kandan sikan is ebpengesawa, human sikandan edsalang egkaan. Iring din ded daan is minge sumusundan ku su te kemulu e pa zini te kandan, kenè dan edsalang egkaan.”

¹⁶Ne zutun insempità ni Jesus is kenà kebpeked-amur te vegu he penurù din wey te zaan he tulluwèn. Ke sikandin te, “Is begu he manggad he wazè

pa megkenseng, kenà meupiya he idapi te kumbalà he merunut en, su emun ebpiptian, ne egkenseng ne egkevindas haazà is daan tenged dutun te vegu ne tuwas pa he meluag is kegkevindas dutun te kumbalà. ¹⁷Iring din ded daan sikan is binu he sikan pa ebeeli he idtagù diyà te teleguey te vinu he lundis te kambing, su kenà egkehimu he ziyà idtagù te zaan he teleguey su ebetu haazà is teleguey ne egkeulaan is binu ne egkezeetan daan is teleguey. Kinahanglan he is binu he sikan pa ebeeli, ne ziyà idtagù te vegu he teleguey. Ne zutun kenà egkezeetan haazà is binu wey haazà is teleguey.”

Is Minatey he Vatà wey Sikan is Bahi he Zeruwanen

(Mateo 9:18-26; Marcos 5:21-43; Lucas 8:40-56)

¹⁸Ne te kemulu pa zutun egkagikagi si Jesus, duen nekeuma he sevaha he pengulu te minge Hudiyu. Ne zutun midluhud sikandin diyà te etuvangan ni Jesus ne midhangyù he ke sikandin te, “Minatey geina is anak ku he vahi, iyan, emun ebayaan nu ne edepenetan nu te velad nu ne egkevanhew sikandin.” ¹⁹Ne midhitindeg si Jesus ne miduma kandin, ne miduma zaan is minge sumusundan ni Jesus.

^{20,21}Ne hein diyè dan en te zalan duen mid-uvay he sevaha he vahi ziyà te iniyugan ni Jesus. Ne haazà is bahi, duen din daru. Sepulù en wey zezuwa he tuig is kegkevusbusi kandin ne kenà ed-engked. Ne egkeisip din he emun egkekevit din is minsan kumbalè dà ni Jesus, egkeulian en sikandin. Ne zutun nekevit din is sidsid te kumbalà ni Jesus. ²²Ne midlingi si Jesus ne neehè din haazà is bahi ne ke sikandin te, “Bayi, kenè ka mahandek; su umba neulian ka te zaru nu su midsarig ka kedì.” Ne zutundutun neulian haazà is bahi.

²³Ne midlaus dan is edhipanew ne midseled si Jesus diyà te valey zutun te pengulu. Ne hein neehè din is minge memumulalà wey nezineg din is megurub tenged te egkengegisaweg he minge etew, ²⁴ne migkegiyan ni Jesus sikandan te, “Pemen-awè kew is langun. Wazà mebpatey heeyan is batà, kekenà, midlpezeng.” Ne mid-engitan dutun te minge etew si Jesus. ²⁵Ne hein nemen-awè en haazà is minge etew, ne midseled si Jesus dutun te rugu te vatà. Ne migewezan din diyà te velad ne zutundutun mid-enuw haazà is batà. ²⁶Ne nevantug heini is neulaula ziyà te langun he minge siringan he minge inged dutun.

Is Kebewii Zuen te Zezuwa he Lakap

²⁷Ne zutun te ked-awà ni Jesus dutun, midtelukun kandin is dezuwa he lakap. Ne haazà is minge lakap, mid-umew zan ki Jesus is edhangyù te, “Kehizuwi key kenikew, su iyan ka kes kevuwanan te hadi dengan he si David!” ²⁸Ne hein mid-uli en si Jesus diyà te valey zin, nekeuma zaan haazà is dezuwa he lakap. Ne migkegiyan din sikandan te, “Eduu

kew ve he egkeulian ku is mata niw?” Ne midtavak dan te, “Uya, Datù, edtuu key.” ²⁹Ne zutun midampà ni Jesus is mata zan ne ke sikandin te, “Berakat he meulii kew tenged te kedtuu niw.” ³⁰Ne neulian is menge mata zan. Ne zutundutun nepuwasan is ked-ehè dan. Ne zutun migkegiyan sikandan ni Jesus he kenè dan penudtula. ³¹Iyan, te ked-awè dan dutun nasi dan mibantug si Jesus diyà te langun he menge siringan dutun he inged.

Is Kebewii te Emew

³²Ne zutun te wazè pa megenat haazà is menge lakap, nekeuma is menge etew he edumahan dan diyà te ki Jesus is maama he neemew su midsuukan te mezaat he mulin-ulin. ³³Ne mibewian heini ni Jesus, ne segugunà dutun nekekagi haazà is etew. Ne nengeinuinu is langun he menge etew zutun, ne ke sikandan te, “Sikitew is menge kevuwazan ni Israyil, sikan tew pa maahà is iring kayi!” ³⁴Iyan, migkagi is menge Perisiyu zutun te, “Is tekinan te menge mezaat he mulin-ulin, iyan mibegey kandin te gehem wey zin mevewii is edlelun te mezaat he mulin-ulin.”

Is Meluag he Legtayan

(Lucas 10:2)

³⁵Ne neeneb ni Jesus is langun he menge inged dutun wey menge unayan. Mibpenurù din is menge etew zutun diyà te seled te menge simbahan dan wey impesavut din diyà te kandan is Meupiya he Tudtulanen te keagi te kedhadì te Megbevayà. Nengeulian din is menge etew te minsan hengkey he zaru wey ebpengegezamen dan. ³⁶Ne kada zin egkeahà is mezakel he menge etew zutun, egkengehizuwan din sikandan su mezakel is menge seeng dan ne wazà ebpeketavang kandan. Iring sikandan te menge ayam he kerehidu he wazà ed-elima kandan. ³⁷Ne migkagi si Jesus diyà te menge sumusundan din te, “Mezakel pezem is edawat te Meupiya he Tudtulanen. Iring sikandan te kamet he nelutuan en. Meluag heini is kamet, iyan, deisey kiw zà is ebpemenlegtey. ³⁸Iampù niw ziyà te Nengazen he sugua zin pa zini te kamet din is duma pa he ebpekelegtey.”

Midsugù ni Jesus kes Menge Epustul

(Mateo 10:1-4; Marcos 3:13-19; Lucas 6:12-16)

10 ¹Ne midtigm ni Jesus diyà te kandin is menge sepulù wey zezuwa he sumusundan din, ne mibegayan din sikandan te gehem wey zan meulii is edlelun te mezaat he mulin-ulin, wey zan daan mevewii is minsan hengkey he zaru wey ebpengegezamen te menge etew. ²Iyan heini menge ngazan te sepulù wey zezuwa he sumusundan he migeraran

ni Jesus he epustul, *he ke và dà egkegiya, menge sugù din: iyan lavew kandan si Simon he migeraran ni Jesus ki Pedro; ne zutun daan si Andres he hazi ni Pedro wey is menge anak ni Sibidiyu he si Santiago wey si Juan is hazi ni Santiago.* ³Ne zutun daan si Felipe, si Bartolomeo, si Tomas, si Mateo he iyan kes menunukut te vuhis wey si Santiago he anak ni Alpiyu. Duen daan si Tediya, ⁴wey si Simon is sevaha he sakup te upakat he Kenenista wey si Hudas kes tigKeriyuti he iyan mibpalad ki Jesus diyà te menge Hudiyu.

Is Menge Telaan ni Jesus Duen te Menge Epustul

(Mateo 10:5-15; Marcos 6:7-13; Lucas 9:1-6)

⁵Impehipanew ni Jesus heini is sepulù wey zezuwa. Ke sikandin te, “Kenè kew hendiyà te menge inged te menge etew he kenà Hudiyu wey ziyà te menge inged te Semarya. ⁶Diyè kew zà penudtul te menge zuma tew he kevuwazan ni Israyil. Iring sikandan te menge kerehidu he nengetazin. ⁷Ipesavut niw kandan he megaan en edhadì te menusiya is Megbevayà. ⁸Bewii niw is egkengezeruwan, benhawa niw is ebpatay, bewii niw is menge it-iten wey is ebpenlungen te mezaat he mulin-ulin. Sikan is nezawat niw he ziyà ebpuun te Megbevayà ne wazè din peveyazi keniyu, ne kenè niw zaan peveyazi zuen te edtevangen niw. ⁹Kenè kew med-uwit te vulawan wey selapì wey minsan menge sintabus. ¹⁰Kenè kew zaan med-uwit te sundang. Is ed-ilisan he sepatus wey kumbalà wey minsan tuked, ne kenè kew med-uwit. Su is suluguen, ibegey ziyà te kandin is kinahanglan din.

¹¹Ne emun ebpekeuma kew ziyà te inged he zekelà wey minsan deisek he inged, ne pen-ahaa niw is etew he egkesuat he edawat keniyu,” ke si Jesus. “Ne ziyè kew pemenahik te valey zin. Ne zutun kew zà uliulì taman te kedawè niw zutun te inged. ¹²Ne emun ebpemenahik kew ziyà te sengevaley, ne penubtuvazi niw is ed-ubpà dutun te, “Tuvazi kew te Megbevayà,” ¹³su wey metuvazi sikandan te Megbevayà emun edewaten kew zan. Ne emun kenè kew zan igalewgalew, maambe en, su kenà sikandan edleusan edtuvazi te Megbevayà. ¹⁴Ne ke zuen inged he wazà dutun egalewgalew keniyu, wey ke wazà ebpeming te ibpesavut niw kandan, ewai niw sikandan wey tektaka niw is menge eliyavuk diyà te menge paa niw he tuus diyà te kandan he edsilutan sikandan te Megbevayà. ¹⁵Kenè niw lipati heini he lavew pa is idsilut te Megbevayà dutun te inged emun egkeuma keuzemà is andew te kedsilut, kenà te silut din dengan diyà te menge lalung he etew he meginged diyà te inged he Suduma wey te inged he Gumura.

Is Egkehitavù he Pesipala

(Mateo 10:16-25; Marcos 13:9-13; Lucas 21:12-17)

¹⁶Pemingew kew; edsuguen ku en sikiyu ziyà te menge etew he kumekaid. Iyan, sikiyu, kenè kew mulà ebpekekaid. Iring kew te menge

kerehidu ne sikandan iring te minge erimaung. Kinahanglan he med-andam kew, iyan, kenè kew mebpsipala te minsan hentei. ¹⁷Andam kew su edeopen kew zan, ne ed-uwiten kew zan diyà te hukmanan, ne ebugelen kew zan diyà te minge simbahan dan. ¹⁸Ebpegesen kew zan he mekeetuvang te minge gubirnedur wey minge hadi tenged te kedtuu niw kedì wey niw ikewali is Meupiya he Tudtulanen diyà te kandan wey ziyà daan te minge etew he kenà minge Hudiyu. ¹⁹Ne emun ed-uwiten kew zan diyà te hukmanan, kenè niw ikeseeng ke hengkey is egkegiyen niw wey ke hengkey is paagi te kegkagi niw, su wey niw en egketueanan ke ziyè kew en te etuvangan dan su zutun ibegey keniyu is hustu he egkegiyen niw. ²⁰Su is egkegiyen niw zutun, ne kenà minge lalag he ebpuun te keniyu he isip, kekenà, diyà ebpuun te Wagas he Mulin-ulin he midsugù te Amey tew he Megbevayà. Ne heini is Wagas he Mulin-ulin, iyan ebekà te minge vebè niw.

²¹Su zutun he timpu zuen minge etew he ibpehimentayan dan is minge suled dan. Ne zuen daan minge amey he ibpehimentayan dan is minge anak dan. Ne zuen minge etew he egkuntedahan dan wey ibpehimentayan dan is minge lukes dan. ²²Egkuntedahan kew te langun tenged te sumusundan ku sikiyu. Iyan, sikan is edhamen te kedtuu zin kedì taman te ketepusan dutun te minge kemeresayan, ebegayan te untung he wazè din pidtamanan. ²³Ne emun ebpesipelahan kew zan diyà te sengeinged, pelaguy kew pehendiyà te sevaha he inged. Ne venar is egkegiyen ku keniyu he te kenè niw pa egkepasad is ebpeveelan ku keniyu ziyà te langun he minge inged te nasud he Israyil ne edlikù e en is Kakey te Menusiyà.

²⁴Sikan is ebpepenurù, kenè din isipa he lavew sikandin he edtehuzen kenà te ebpenurù kandin. Ne iring din ded is suluguen su kenà sikandin egketahud he lavew te egalen din. ²⁵Umba, siak is egalen niw wey ebpenurù keniyu, kinahanglan he egkeiringan a keniyu. Su siak is egalen niw, emun egngezanan a te minge etew ki Endedaman, wey pe be kenà tuwas pa he mezaat is ignedan dan keniyu te minge sakup ku?

Is Ereg he Ighahandek te Etew
(*Mateo 10:26-31; Lucas 12:2-7*)

²⁶Iyan, kenè kew mahandek te minge etew su is ulaula zan he edtembunan dan, ebpekelepew zed su is minsan hengkey he kenè dan egkegiyen, ibpemegawagawa. ²⁷Is minge lalag ku he iyan kew zà nekezineg, ipenudtul niw ziyà te minsan hentei. Is idnaasnaas ku keniyu, isangyew niw ziyà te langun he minge etew. ²⁸Kenè kew mahandek te minge etew zà duen su iyan dà egkepatay zan is lawa niw; ne kenè dan egkepatay is gimukud niw. Iyan ikehandek niw is Megbevayà su egkepatay zin is lawa wey minsan is gimukud niw pinaagi te Impirnu.

²⁹Egkepemasa ta is dezuwa he zezeisey he tagbis te sengesintabus dà su utew minus is bali zan. Ne minsan pa zutun wazà minsan sevaha kandan he ebpatay ne egkeulug diyà te tanà emun kenà egkesuatan te Amey tew he Megbevayà. ³⁰Iyan, sikiyu, edlavew pa is ked-elimahi zin keniyu su minsan is menge bulvul te ulu niw, mibilang din en. ³¹Umba kenè kew mahandek su lavew kew pa he mahal ziyà te kandin, kenà te utew mezakel he menge tagbis.

Is Ed-engkenen ni Jesus

(Mateo 10:32-33; Lucas 12:8,9)

³²Sikan is egkagi ziyà te menge etew he iyan a egalen din, ed-engkenen ku zaan sikandin diyà te etuvangan te Amey ku he ziyà te langit. ³³Iyan, sikan is egkagi ziyà te menge etew he kenà a iyan egalen din, kenè ku zaan sikandin ed-engkenen diyà te etuvangan te Amey ku he ziyà te langit.

Is Kesamuk

(Mateo 10:34-36; Lucas 12:49-53)

³⁴Kenè niw isipa he midhendini a te kelibutan su wey wazè en kesamuk te menusiya. Wazà a medhendini wey zuen kelinew su tenged te kedhendini ku ebpekunkuntedahà is menusiya. ³⁵Su tenged te kedhendini ku, egkuntedahan is maama te anak din he maama. Ne egkuntedahan is bahi te anak din he vahi. Ne egkuntedahan daan is bahi te ambey zin. ³⁶Ne iyan egkekuntada te etew is menge megeget he kezuzumahi zin.

Is Hustu he Sumusundan ni Jesus

(Mateo 10:37-39; Lucas 14:26,27)

³⁷Ke zuen etew he iyan mahal ziyà te gehinawa zin is amey zin wey iney zin kenà siak, kenà dait sikandin he egngезanan he sumusundan ku. Ne ke iyan mahal ziyà te gehinawa zin is anak din kenà siak, kenà daan sikandin dait he egngезanan he sumusundan ku. ³⁸Minsan hentei he kenà edsundan kedì ne kenè din edtiangen is krus din, *he ke và dà egkegiya, kenè din edtumanen is menge sugù ku su kela ke iyan ibpatay zin, kenà dait sikandin he egngезanan he sumusundan ku.* ³⁹Sikan is egkenugunan din is untung din dini te kelibutan, nasi egkeawà diyà te kandin is untung din. Iyan, sikan is edtumanen din is menge sugù ku, minsan ke iyan ibpatay zin, ebegayan sikandin te untung he wazà din pidteman.

⁴⁰Is etew he edawat keniyu, edawat daan kediey; ne is edawat kediey, edawat daan te Megbevayà he midsugù kedì. ⁴¹Ke zuen etew he edawat te ebpeneuven te Megbevayà tenged te Megbevayà is ebpenaub dutun te

midawat din, ebpekeambit haazà is etew te suhul te Megbevayà dutun te ebpeneuven din. Ne ke zuen etew he edawat te metazeng he etew tenged te metazeng is ulaula zutun te etew, ebpekeambit sikandin te suhul te Megbevayà dutun te metazeng he etew. ⁴²Ne kenè niw lipati he ke zuen etew he minsan sengetasa zà he wahig is ibpeinum din te minsan hentei he sumusundan ku, ne iyan ibpeinuma zin dutun is tenged te sumusundan ku haazà is ebpekeinum, ne kenà egkehimu he kenà sikandin edsuhulan te Megbevayà. Ne minsan ke utew minus is pid-etawan dutun te sumusundan he ibpeinum din, kenà egkehimu he kenà sikandin edsuhulan.”

Si Jesus wey si Juan Megbebewtismu

(Mateo 11:1-19; Lucas 7:18-35)

11 ¹Ne hein nepasad ni Jesus heini is kedseyseya zin te minge sugù din dutun te sepulù wey zezuwa he sumusundan din, mid-awà sikandin dutun ne midhipanew su ibpenurù din wey ibpesavut din is Lalag te Megbevayà diyà te minge siringan dutun he inged.

²Ne ziyà te pirisuwan midtutulan si Juan Megbebewtismu mehitenged te minge egkein-inuwan he mibeelan ni Jesu Kristu, ne midsugù ni Juan is minge sumusundan din wey zan meinsai si Jesus. ³“Keleduwi key,” egkagi haazà is minge sugù ni Juan diyà te ki Jesus, “ke iyan ke ve kes migkagi ni Juan he netagnà is kebpekeuma zin dini te kelibutan wey ke zuen pe be ebpeebuten dey.” ⁴⁻⁶Ne midtavak si Jesus te, “Likù kew en ziyà te ki Juan ne tudtula niw ziyà te kandin is nengeehè niw he mid-ulaula ku wey is nengezineg niw he egkegiyen te minge etew. Iyan niw tudtula kandin he tenged kedì ebpeemekeehè en is minge lakap, ne ebpemekehipanew en is minge piang, nengeulian en is minge it-iten wey ebpemekezineg en is minge vengel. Mibanhew ku is nemematey wey impesavut ku ziyà te minge egkengeayuayu is Meupiya he Tutdulanen. Utew deyzey is etew he kenà eduwazuwa he iyan a sikan is midsugù te Megbevayà.”

⁷Ne hein nekegenat en haazà is minge sumusundan ni Juan, migkagi si Jesus diyà te mezakel he nengetigum he minge etew, ke sikandin te, “Hein midhilesung niw si Juan diyà te tanà he wazà duen ed-ubpà he etew, hengkey is inhilesunga niw kandin? Iyan be ed-ahaan niw is etew he iring te sagbet he egkengewaleng te keramag? Kenà iyan haazà su kenà egkehalinhalin is gehinawa ni Juan. ⁸Midhilesung niw ve is etew he utew meupiya is bisti zin? Kenà daan, su is minge etew he iring dutun, diyè dà egkaahà te turugan te hadi. ⁹Ne hengkey is inhilesunga niw? Ed-ehè kew ve te etew he ebpeneuven te Megbevayà? Iyan haazà tutuu he ed-ahaan niw su ebpeneuven iyan si Juan. Iyan, kenà te ebpeneuven dà ¹⁰su pinaagi ki Juan netuman en kes netagnà diyà te insurat he Lalag

te Megbevayà su migkagi zutun is Megbevayà te, ‘Iyan heini kes etew he edsuguen ku. Ibpehuna ku sikandin kenikew wey zin mehigewani is ibayè nu.’” ¹¹Ne mid-uman mekgagi si Jesus te, “Tentenuzi niw he si Juan Megbebewtismu, wazè pa etew he nekelaew kandin, iyan, ke edhadì keuzemà is Megbevayà he ziyà te langit, is minsan hentei he etew zutun he ebpezumazuma te Megbevayà, minsan utew minus is pid-etawan din, ne lavew pa kenà si Juan guntaan. ¹²Puun pa zutun te kebpesavut ni Juan taman en guntaan, is Megbevayà he ziyà te langit, edtegel he mekehadì, ne edtegel zaan is menge etew wey zan mekepehadì kandin. ¹³Su is kedhadì te Megbevayà, netagnà dengan te langun he ebpeneuven te Megbevayà wey netagnà daan ni Moises su egkeehè ta ziyà te kesuguan he imbilinbilin din. Ne netagnà daan ni Juan. ¹⁴Ne emun edtuu kew te impesavut dan, egketuenan niw he iyan en si Juan si Elias su midtagnè dan is kebpekelikù ni Elias. ¹⁵Heini is nezineg niw, sevuta niw.

¹⁶Sikiyu is menge etew guntaan, iyan ebpetug-iringan ku keniyu is menge vatà. Su is menge vatà, ne ebpememimpinuu zan diyà te tiyenggiyan is ebvaleyvaley. Ne ebpeum-umawè dan is egkagi te, ¹⁷‘Edtemburan dey sikiyu ne kenè kew edsayew, ne edlelendag key ne kenè kew zaan edtampu.’ ¹⁸Su hein neehè niw si Juan is edsalang egkaan ne kenà daan ed-inum te vinu, ne migkagi niw he midsuukan sikandin te mezaat he mulin-ulin. ¹⁹Ne siak is Kakey te Menusiyà, wazà a medsalang megkaan ne mid-inum a mulà te vinu ne neinuinu kew ne migkagi niw he vuleguk a wey pereinum te vinu. Ne ke sikiyu zaan he emigu a te menge lalung he etew iring te menunukut te vuhis wey menge mesinupaken. Iyan,” ke si Jesus, “egketuusan ta he utew metau is Megbevayà pinaagi te egkeveelan din.”

Is Kedhukumi te Kenà Edtuu
(*Mateo 11:20-24; Lucas 10:13-15*)

²⁰Ne zutun, is menge meginged kayi te menge inged he mibpaahaan ni Jesus te mezakel he egkengein-inuwan, midsawey zin su wazè dan iniyugi is memezaat he ulaula. ²¹Ne ke sikandin te, “Mekehizuhizu kew is menge tigKurasin! Mekehizuhizu kew zaan is menge tigBitsayda. Su is menge egkein-inuwan he impeehè ku ziyàn te inged niw te menge Hudiyu, angin ke midhimu ku heini ziyà te menge inged he Tiru wey Sidun he kenà menge Hudiyu is meginged dutun, su nekekukumbalè dan en pezem te saku ne nepen-evuwan dan is ulu zan he tuus te ed-iniyugan dan en is memezaat he ulaula. ²²Kenè niw lipati he zutun keuzemà te andew te kedsusi te Megbevayà te menusiyà, lavew is idsilut din keniyu kenà te menge etew ziyà te Tiru wey Sidun. ²³Ne sikiyu zaan,” ke si Jesus, “is menge tigKepirnaum, iyan egkesuatan niw pezem is deliga kew

te minsan hentei, iyan, igketimbag kew ziyà te Impirnu. Su is egkengein-inuwan he impeehè ku ziyàn te inged niw, angin ke ingkepaahà dengan diyà te menge tigSuduma su kenà egkezezeetan te Megbevayà is inged dan, ne kemulu pa pezem guntaan. ²⁴Kenè niw lipati he keuzemà te andew te kedsusi te Megbevayà te menusiyà, lavew is silut din keniyu kenà te menge tigSuduma.”

Is Kebpengumew ni Jesus

(*Mateo 11:25-30; Lucas 10:21,22*)

²⁵Ne zutun mid-ampù si Jesus he egkagi te, “Amey ku he Nengazen te langit wey tanà, dekelà is kebpeelemati ku kenikew su is in-eles nu wey kenà mesavut te menge uluwanen wey uvag en memetau, impesavut nu en diyà te menge etew he wazè dan menge hanew. ²⁶Umba ebpeelematan ku su midhimu nu heini te iring kayi tenged te iyan egkesuatan nu tenged te gagew nu.”

²⁷Ne mid-uman megkagi si Jesus diyà te menge etew te, “Is minsan hengkey, insarig kediey te Amey ku he Megbevayà. Wazà nesayud kedì te Anak te Megbevayà, kekenà, iyan dà is Amey ku he Megbevayà. Ne wazà daan nesayud te Amey ku he Megbevayà, kekenà, iyan e zà is Anak din wey sikan is menge etew he mibpengelinteuwan ku he mesayud dan kandin.

²⁸Hendini kew te kediey, sikiyu is langun he nengeveley tenged te keduwit te menge meveget he ulaula su ibpehimeley ku sikiyu. ²⁹Beeli niw is idsugù ku keniyu ne pepenurù kew kedì ne ebpekehimeley kew su kenà a eengeren ne kenà a ebpenlupig te minsan hentei. ³⁰Is kedì he idsugù keniyu, melemu; ne kenà meregen is ebpeveelan ku keniyu.”

Is Ebayàbayà te Andew te Kedhimeley

(*Mateo 12:1-8; Marcos 2:23-28; Lucas 6:1-5*)

12 ¹Ne wazà utew meugèt dutun, ne andew he Sebadu. Ne iyan haazà he andew, insugù dengan te Megbevayà te menge Hudiyu he wazà etew he ibpevaal zutun te andew su iyan Andew te Kedhimeley. Ne zutun he andew ingkevayà eni Jesus is pemuleey. Ne zutun egkengevitil is menge sumusundan din ne mibpengetu zan te menge trigu ne migkaan dan is begas dutun. ²Ne naahà haazà te menge Perisiyu ne migkegiyan dan si Jesus te, “Ahaa nu is menge sumusundan nu su edsupaken dan is insugù kenitew te Megbevayà su maan is midlegtey zan kayi te Andew te Kedhimeley.” ³Ne midtavak si Jesus te, “Kenà egkehimu he wazè niw mevasa ziyà te ingkesurat dengan kes mid-ulaula ni Hadì David. Sikandin wey is menge sundaru zin, nengevitil zan. ⁴Ne wazà sikandin mekesalà minsan te midseled diyà te Valey te Megbevayà ne sikandin wey is menge sakup din, migkaan

dan is egkeenen he insavuk diyà te etuvangan te Megbevayà. Ne supak te kesuguan haazà is kegkeena zan dutun su iyan dà ebpekekaan dutun he egkeenen is menge memumuhat. ⁵Kenà daan egkehimu he wazè niw mevasa ziyà te ingkesurat ni Moises he is menge memumuhat diyà te Valey te Megbevayà, emun Andew te Kedhimeley kenè dan edhimeley, ne minsan pa zutun kenè dan ebpekesalà. ⁶Tutuu heini is egkegiyen ku keniyu he zuen nekeuma kayi te keniyu he lavew pa kenà is Baley te Megbevayà. ⁷Duen daan insurat he Lalag te Megbevayà he egkagi te, ‘Kenà iyan mahal zini te gihinawa ku is menge pemuhat niw, kekenà, iyan is kegkehizu niw te zuma niw.’ ” Ne mid-uman megkagi si Jesus te, “Ke hustu is kedsevuta niw kayi te ingkesurat, wazè niw geina mesewayi is wazè din salà. ⁸Su siak is migeraran he Kakey te Menusiyà, iyan a zuen kegehem te egkagi ke hengkey is hustu he ed-ul-ulahan te etew emun Andew te Kedhimeley.”

Is Kebewii Zuen te Minatey is Menge Ugat Diyà te Zivaluy he Velad Din
(*Mateo 12:9-14; Marcos 3:1-6; Lucas 6:6-11*)

⁹Ne mid-awà si Jesus dutun, ne midhendiyà te sevaha he simbahan. ¹⁰Ne zutun te seled te simbahan, duen etew he minatey is menge ugat te zivaluy he velad din. Duen daan dutun menge etew he ebpen-ahà te paagi he ikesumbang dan si Jesus he nekesupak te kesuguan. Ne mid-insaan dan sikandin te, “Emun Andew te Kedhimeley, ke ebewian ta is egkezeruwan wey meulii, ebpekesupak ki ve te kesuguan?” ¹¹Ne midtavak si Jesus te, “Ke zuen kerehidu te minsan hentei kenitew ne egkeulug diyà te vitu te Andew te Kedhimeley, kenà egkehimu he kenè din igaun puun dutun te vitu minsan ke Andew te Kedhimeley. ¹²Ne is etew, lavew pa he mahal kenà te kerehidu. Ne tenged dutun kenè ki ebpekesupak te kesuguan ke edtevangangan ta is etew minsan ke Andew te Kedhimeley.” ¹³Ne zutun migkegiyan ni Jesus haazà is etew he minatey is menge ugat te zivaluy he velad din te, “Ketenga nu, Mama, is belad nu.” Ne migketeng dutun te etew is belad din ne zutundutun neulian haazà he wazà pigeyanan din iring dutun te zivaluy he velad din. ¹⁴Ne mid-awà dutun is menge Perisiyu ne mibpelelelagè dan ke hengkey is paagi he mehimu zan he mepatey si Jesus.

Si Jesus is Pinili te Megbevayà

¹⁵Ne hein netuenan ni Jesus is ed-isipen dutun te menge Perisiyu, mid-awà sikandin dutun, ne zuen mezakel he menge etew he nemenduma kandin. Ne neulian din is langun dutun he nengezeruwan, ¹⁶ne migkegiyan din sikandan he kenè dan tudtula te zuma haazà is mid-ulaula zin. ¹⁷Umba nekagi zin heini su egketuman sikan is Lalag te Megbevayà he netagnà dengan ni Esaias he edhenduen te,

- 18 “Iyan heini suluguen he pinili ku.
 Iyan sikandin utew ku minahal ne utew ku egkesuati is menge vaal zin.
 Ebpeulinan ku sikandin te Wagas he Mulin-ulin,
 ne is metazeng he kukuman ku,
 edtutulen din diyà te tivuuk he menusiya.
- 19 Ne kenà sikandin ebpekidlawan;
 kenà daan ebpemensag;
 kenà daan egkezineg sikandin he edikursu ziyà te menge kersada te inged.
- 20 Kenè din edlekaan is meluya is kedtuu zin kandin.
 Su edtevangen din is minsan hentei,
 minsan sikan is deisek is kedsarig din kandin.
 Kenà ed-engked ebpenudtul taman te ebpekeeneb diyà te minsan hendei is metazeng he ulaula.
- 21 Ne ebpekesarig kandin is menge etew ziyà te langun he menge nasud.”

Is Lavew ki Setanas

(*Mateo 12:22-32; Marcos 3:20-30; Lucas 11:14-23*)

22 Ne zutun duen nemekeuma he menge etew he zuen miduma zan he maama he nelakap wey neemew tenged te midsuukan sikandin te mezaat he mulin-ulin. Ne mibewian haazà ni Jesus ne segugunà nekekagi wey nekeahà. 23 Nengeinuinu is mezakel he menge etew zutun ne ke sikandan te, “Kela ke iyan sikandin kes netagnà he kevuwazan ni Hadì David.” 24 Ne zuen menge Perisiyu zutun ne hein nezineg dan haazà migkagi zan te, “Umba zuen gehem din he ebpekeulì te edlelungen te mezaat he mulin-ulin su iyan mibegey kandin te gehem si Endedaman, sikan is egalen te menge mezaat he mulin-ulin.” 25 Iyan, nesavut ni Jesus is diyà te isip dan, ne ke sikandin diyà te kandan te, “Ke zuen hadì, ne ebpetebtebekà is menge sakup din, megaan egkeawà is gehem din te kedhadì. Ne ke zuen edlingahaan te sengevelayan ne emun kenà ne sengezetuan, ne ebpekungkuntedahà haazà is menge sakup dutun ne egkevengkag haazà is edetuan din. 26 Umba, ke pinaagi te gehem ni Setanas egkezaag ku is gehem ni Setanas, egketebek din bes is menge sakup din ne egkezezetan din is gehem din. 27 Emun iyan ibpenegseg ku te menge mezaat he mulin-ulin is gehem he ebpuun diyà te ki Setanas ne hendei ves ebpuun is gehem te menge zuma niw he ebpenegseg te mezaat he mulin-ulin? Pinaagi te menge ulaula te menge sumusundan niw egketuusan he nengesayep kew. 28 Su heini is gehem ku te kebpmugew te mezaat he mulin-ulin, ne ziyà ebpuun te Wagas he Mulin-ulin he Megbevayà. Ne pinaagi kayi egketuusan he iyan en heini sikan is timpu te kedhadì te Megbevayà.

²⁹Nezaag ku en si Setanas umba igkepaawè ku is minge sakup din, su wazà minsan hentei he ebpekeseled te valey te mezesen he etew wey zin maagew is minge azen dutun te mezesen he etew, emun kenè din egkehunà egkevaku haazà is mezesen he etew. Kinahanglan he ebekusen din edhunai, ne human din egkeagew is minge azen dutun te mezesen he etew.

³⁰Sikan is kenè ku zuma, kuntada ku; sikan is kenà edtavang kedì, edsanggen kediey. ³¹Umba, egkegiyen ku keniyu he egkepesaylu pa is etew te minsan hengkey he salè din wey minsan hengkey he mezaat he egkegiyen din, iyan, sikan is edsumpalit te Wagas he Mulin-ulin, kenà egkepesaylu. ³²Sikan is edsumpalit kedì te Kakey te Menusiyà, egkepesaylu pa; iyan, sikan is edsumpalit te Wagas he Mulin-ulin, kenè en egkepesaylu te wazè din pidtemanan.

Is Begas te Pinemula

(Mateo 12:33-37; Lucas 6:43-45)

³³Is kayu he wazè din erat, ne meupiya is begas din. Ne is kayu he zuen din erat, ne mezaat is begas din. Egkekilala is kayu pinaagi te vegas din. ³⁴Iring din ded daan kayi te keniyu. Wazà meupiya he egkekagi niw su memezaat is ulaula niw. Iring kew te minge uled su ebpekekaid kew! Is diyà te gehinawa te etew, iyan edlepew ziyà te vèbè din. ³⁵Is etew he meupiya is ulaula zin, ne meupiya zaan is kebpechè din. Is etew he mezaat is ulaula zin, ne mezaat daan is kebpechè din.

³⁶Egkegiyen ku keniyu he zutun keuzemà te andew te kedsusi, ed-insaan te Megbevayà is minsan hentei, ke maan is nekekagi sikandin te wazà pulus he minge lalag. ³⁷Su pinaagi te minge lalag he nenggawas diyà te vèbè niw ne zutun egkeahà keuzemà ke egkesilutan kew ve wey ke kenà.”

Is Ebpen-ahà te Egkein-inuwan

(Mateo 12:38-42; Marcos 8:11,12; Lucas 11:29-32)

³⁸Ne zutun migkagi ziyà te ki Jesus is minge menunudlù te kesuguan wey minge Perisiyu te, “He Menunudlù, ipeehe key kenikew te singyal.” ³⁹Ne midtavak si Jesus te, “Sikiyu is minge etew guntaan, utew mezaat is minge ulaula niw. Wazè en diyà te gehinawa niw is kebmahala te Megbevayà. Maan is ed-ehè kew te singyal? Iyan dà singyal he ibpaahà keniyu is iring duen te singyal he impeulaula zuen te tipehuna he ebpeueven he si Jonas. ⁴⁰Su nekeseled si Jonas diyà te getek te zekelà he pait seled te tetelu he andew. Ne iring din ded daan, siak is Kakey te Menusiyà, ebpekeseled a ziyà te zizalem te tanà seled te tetelu he andew. ⁴¹Keuzemà te andew te kedhukum te Megbevayà, edsewayen kew is minge etew guntaan te minge tigNinivi zengan su hein nezineg dan is penurù ni Jonas, mid-iniyugan dan is memezaat he ulaula zan.

Ne guntaan duen ebpeneuven he lavew pa kenà si Jonas dini te keniyu, ne sikiyu mulà, wazè niw zewata is penurù din. ⁴²Keuzemà te andew te kedhukum edsewayen kew zaan duen te singyuda zengan he ziyà ebpuun te inged he Siba su utew meziyù is midhipenawan din te kebpemineg dà te penurù ni Hadì Sulumun te utew metau. Ne guntaan duen ebpenurù he lavew pa kenà si Sulumun dini te keniyu ne sikiyu mulà, wazè niw zewata is penurù din.

⁴³Ke ed-awà is mezaat he mulin-ulin he ebpuun diyà te etew he edlelungen din, diyà ebayà te memaza he tanà su ebpen-ahà te egkeubpaan din. Ne emun wazè din egkaahà, ⁴⁴egkagi si kandin te, 'Edlikù a nasi diyà te neubpaan ku.' Ne edlikù ne egkeehè din haazà is neubpaan din he wazà tagù ne midtines en is menge vutang dutun ne nepurung melumpiyuwi. ⁴⁵Ne zutun edlikù edhipanew su ebpengakat te pitu he zuma zin he menge mezaat he mulin-ulin he tuwas pa he memezaat kenà sikandin. Ne ed-ahuk dan ne ed-ubpè dan dutun te etew. Ne zutun ed-iseg pa ebmezaat is kebpekesavuk dutun te etew kenà te nehuna he kebpekesavuk din. Iring dutun is egkeulaula te menge etew guntaan su ed-iseg ebmezaat is kebpekesavuk dan."

Is Mesipeg Diyà te ki Jesus

(Mateo 12:46-50; Marcos 3:31-35; Lucas 8:19-21)

⁴⁶Ne te kemulu pa ebpekidlalag si Jesus dutun te menge etew, nekeuma is iney zin wey menge hazi zin he maama. Ne edtagad dan ki Jesus diyà te gawas su zuen egkegiyen dan kandin. ⁴⁷Ne migkegiyan si Jesus te etew zutun te, "Ahaa nu is iney nu wey menge hazi nu zutun su zuen dan kun egkegiyen kenikew." ⁴⁸Ne migkagi si Jesus te, "Duen ku pa ibpaahà keniyu he iney ku wey menge suled ku." ⁴⁹Ne zutun intezù din is menge sumusundan din te migkagi te, "Heini zed is iney ku wey menge suled ku. ⁵⁰Su is minsan hentei he edtuman te egkesuatan te Amey tew he ziyà te langit, iyan daan iney ku, menge suled ku he maama, wey suled ku he vahi."

Is Sempità Mehitenged te Veni

(Mateo 13:1-9; Marcos 4:1-9; Lucas 8:4-8)

13 ¹Ne zutun he andew mid-awà si Jesus diyà te valey, ne midhendiyà te ranew ne mibpinuu ziyà te veyvey zutun. ²Ne zuen mezakel he menge etew he midtigum diyà te kandin. Ne geina te utew zan mezakel, mid-untud si Jesus te avang ne zutun mebpinuu. Ne is menge etew, diyè dan dà te veyvey is ebpememineg kandin. ³Ne zutun mezakel is impenurù din kandan pinaagi te menge sempità.

Ke sikandin te, "Duen etew he midhendiyà te pemuleey zin su ebpemula. ⁴Ne zutun te kebpemula zin duen benì he nengeulug diyà

te zalan, ne heini migkaan te minge tagbis. ⁵Ne zuen daan benì he nengeulug ne nemekeuntud diyà te minge watu he utew zà menipis is tanà he nekeapid dutun te minge watu. Ne haazà petuluy zà midtuvù su menipis haazà is tanà. ⁶Asal hein mid-andew, negangu petuluy haazà is minge pinemula su mevavew zà is nesenevan te zalid dan. ⁷Ne zuen daan benì he nengeulug diyà te tanà he minge zugiyen is minge sagbet dutun. Ne mibmemelayat heini is sagbet ne mibpengulembezan dan haazà is pinemula. ⁸Ne zuen daan benì he ziyà mingeulug te meupiya he tanà ne nemegas mulà heini. Duen dutun minge pinemula he mibegas te tigketluan. Ne zuen daan dutun minge pinemula he mibegas te tigkeneman. Ne zuen daan dutun pinemula he mibegas te tignenggatus.” ⁹Ne mid-uman megkagi si Jesus te, “Sevuta niw heini is nezineg niw.”

Is Tuyù te Minge Sempità

(*Mateo 13:10-17; Marcos 4:10-12; Lucas 8:9,10*)

¹⁰Ne mid-uvayan si Jesus te minge sumusundan din, ke sikandan te, “Hengkey is ketezengan ke maan is migamit ka te minge sempità dutun te kebpenurù nu te minge etew?” ¹¹Ne midtavak kandan si Jesus te, “Sikan is in-eles dengan mehitenged te kedhadì te Megbevayà, impesavut en keniyu te minge sumusundan ku, iyan, is duma he minge etew, id-eles heini kandan. ¹²Su is etew he neketuu wey zuen kedsavut din, ed-umanan pa te Megbevayà te kedsavut su wey mehustu is kedsavut din. Iyan, sikan is kenà edtuu, id-awà te Megbevayà diyà te kandin sikan is deisey he nesavut din. ¹³Umba ebpenurù a kandan pinaagi te minge sempità. Su edtengteng dan, iyan, kenè dan ebpekeahà, he ke và dà egkegiya, ebpemineg dan, iyan, henduen be te wazè dan mekezineg su kenè dan edsevuten. ¹⁴Netuman en diyà te kandan kes insurat ni Esaias he migkagi te Megbevayà su ke sikandin te,

‘Ebpurung dan ebpemineg, iyan,
kenè dan ebpekesavut.

Ebpurung dan edtengteng,
iyan kenè dan ebpekeahà.

¹⁵Su heini he minge etew,
midmezesen is isip dan.

Edsebpengen dan is telinga zan,
edlipezenge dan is minge mata zan.

Su emun kenà,
ebpekeehè dan

ne ebpekezineg dan,
ne egkesavut dan

is hustu ne edsarig dan
kedì ne edlibriyen ku sikandan.’ ”

¹⁶Ne mid-uman mekgagi si Jesus te, “Iyan, sikiyu mulà, dekelà utew is kelipey niw su metau kew ed-ahà wey metau kew ebpeming. ¹⁷Isipa niw heini he zengan mezakel is ebpeneuven wey menge tumutuu te Megbevayà he egkesuat pezem he meehè dan heini is egkeehè niw wey mezing dan heini is egkezineg niw en, iyan, wazà itugut kandan.”

Is Kehulugan Duen te Sempità Mehitenged te Veni

(Mateo 13:18-23; Marcos 4:13-20; Lucas 8:11-15)

¹⁸Ne mid-uman mekgagi si Jesus te, “Pemineg kew wey niw mesavut is kebulugan kayi te sempità te keagi te etew he ebpemula. ¹⁹Ke zuen menge etew he egkezineg dan is lalag mehitenged te kedhadì te Megbevayà, iyan, kenè dan edsevuten, ne iring haazà te veni he ziyà mengeulug te zalan. Edlepew si Setanas ne ed-egawen din haazà is lalag he nezing dan. ²⁰Ne is benì he ziyà mengeulug te menipis he tanà he zivavew te vatu, ne iyan is Lalag te Megbevayà he is nemekezineg duen, ne utew zan egkesuati te ebpeming. ²¹Iyan, kenà egkeheget is kedtuu zan ne kenà egkeuget ke egkeumahan sikandan te samuk wey ke kemeresayan be tenged te kedewata zan te Lalag te Megbevayà, edlikù dan diyà te zaan he ulaula zan. ²²Ne sikan is benì he ziyà mengeulug te tanà he zugiyen is menge sagbet dutun, iyan is Lalag te Megbevayà he iyan nemekezineg duen is menge etew he ebpeming, iyan, egkelipatan dan tenged te menge seeng dan kayi te kelibutan wey tenged te kegkesuat dan te selapì. Ne tenged kayi is Lalag te Megbevayà, kenà ebplus diyà te kandan. ²³Ne sikan is benì he ziyà mengeulug te meupiya he tanà, ne iyan is Lalag te Megbevayà he is nemekezineg duen, nesavut dan, ne ebplus diyà te kandan. Is duma, ne ebplus te zeisek diyà te kandan; ne is duma, ne ebplus te malù dekelà; ne is duma, ebplus te utew zekelà diyà te kandan.”

Is Meupiya Wey Mezaat he Pinemula

²⁴Ne impenurù daan ni Jesus is selakew pa maan he sempità. Ke sikandin te, “Is kedhadì te Megbevayà, ne iring te etew he zuen impemula zin he meupiya he pinemula ziyà te pemuleey zin. ²⁵Ne sengekezukileman dutun te nekelipezeng sikandin, nekeuma is kuntada zin ne midsewezan dutun te kuntada zin haazà is pemuleey zin te menge vegas te mezaat he pinemula ne human med-ulì. ²⁶Ne hein midtuvù haazà is meupiya he pinemula, midtuvù daan haazà is mezaat he pinemula. ²⁷Ne zutun, is menge suluguen dutun te etew, midhendiyè dan te kandin ne ke sikandan te, ‘Datù, iyan tew impemula ziyà te pemuleey nu is meupiya he pinemula, ne hendei vuwa ebpuun heini is memezaat he pinemula?’ ²⁸Ne midtavak haazà is etew te, ‘Iyan mibpemula zuen sikan is kuntada ku.’ Ne ke sikandan te, ‘Ebpemezuten dey ve wey ke

kenà?’ ²⁹Ne ke sikandin te, ‘Kenè niw zè pa, su kela ke mekeragkes sikan is memeupiya. ³⁰Ebpesegdanen tew zè pa taman te egkeuma is tiragun, ne human ku ibpepemazut te ebpemenlegtey is memezaat he pinemula, ne ibpepemagkes ku kandan su ebinsulan. Ne is memeupiya he pinemula, ibpezerengdeng ku mulà is begas dan.’ ”

Is Ked-iseg Kebmahabet te Edhedian te Megbevayà
(*Mateo 13:31-35; Marcos 4:30-34; Lucas 13:18-21*)

³¹Ne impenurù en maan ni Jesus is selakew pa he sempità. “Is ked-iseg kebmahabet te edhedian te Megbevayà,” ke sikandin, “ne iring te pinemula he utew zeisek is lisu. ³²Ibpemula heini te etew ziyà te pemuleey zin ne ke edtuvù ne edekelà, egkehimu he iyan utew zekelà te langun he menge pinemula he edlumbayen. Iring kezekelà te kayu ne egkeletunan te menge tagbis ne egkeseselagan dan is menge subpang dutun.”

³³Ne impenurù ni Jesus kandan is selakew pa maan he sempità. Ke sikandin te, “Is kebmezakel te edhedian te Megbevayà, ne iring daan te tapey. Su ke zuen bahi he ebaal te supas egkuwaan din is tapey ne idsahug din te sengebisin he erina. Ne edtulin haazà is erina,” ke si Jesus.

³⁴Ne heini is langun, ne impenurù ni Jesus diyà te mezakel he menge etew pinaagi te menge sempità. Minsan hengkey he impenurù din kandan, ne pinaagi te sempità. ³⁵Umba neveelan din heini su egketuman kes netagnà dengan te ebpeneuven te Megbevayà he edhenduen te,

“Ibpenurù ku kandan is menge sempità.

Ibpenudtul ku kandan is in-eles dengan
puun pa te kedlimbaga te kelibutan
taman en guntaan.”

Is Kehulugan Duen te Meupiya wey Mezaat he Pinemula

³⁶Ne zutun mid-ewaan ni Jesus haazà is mezakel he menge etew ne midseled sikandin diyà te valey. Ne is menge sumusundan din, midtelukun dan kandin, ne ke sikandan te, “Luwasa nu kenami ke hengkey is kebulugan te menge mezaat he pinemula ziyà te kamet he zuen te sempità nu.” ³⁷Ne midtavak si Jesus te, “Siak is Kakey te Menusiyà, iyan a sikan is etew he ebpemula te meupiya he pinemula. ³⁸Haazà is pemuleey, ne iyan heini is kelibutan; ne haazà is menge meupiya he pinemula, ne iyan heini is menge etew he ebpahadi te Megbevayà; ne sikan is menge mezaat he pinemula, ne iyan is menge sakup ni Setanas. ³⁹Ne sikan is kuntada te etew, ne iyan en si Setanas. Ne is tiragun, iyan is ketepusan he timpu; ne sikan is ebpemenlegtey, iyan is menge velinsuguen te Megbevayà. ⁴⁰Ne haazà is ebezuten dan he menge mezaat he pinemula he ebinsulan dan, iyan haazà egkehitavù

keuzemà te ketepusan he timpu, ⁴¹su siak is Kakey te Menusiya, edsuguen ku is menge velinsuguen ku ne id-awè dan puun te ginhedian ku is ebpemenuley wey is ebpemen-ulaula te mezaat. ⁴²Ne zutun idtimbang sikandan diyà te hapuy ne zutun ebpemekekulahì dan ne ebpemekengingitel zan tenged te utew zan ebpemekedsendit. ⁴³Ne zutun, is menge metazeng mulà, iring te andew is anlag dan diyà te ginhedian te Amey zan he Megbevayà. Sevuta niw heini is nezineg niw.

⁴⁴Is kedhadì te Megbevayà ne iring daan te vulawan he inggadung diyà te pemuleey. Duen etew he neketuredu zutun ne midtembulan din umani he utew sikandin nelipey ne mid-ulì ne imbelegyè din is langun he menge azen din ne midlikù dutun ne mibpemasa zin haazà is pemuleey.

⁴⁵Is kedhadì te Megbevayà, ne iring daan te etew he ebpemasa te menge utew meupiya he mahal he ebeliegen he egngезanan te perlas. ⁴⁶Ne ke egkeehè din is sevaha he perlas he utew pa mahal, ibelegyè din is langun he azen din ne ebpemesahan din haazà.

⁴⁷Ne is kedhadì te Megbevayà he ziyà te langit, ne iring te laya he intaan diyà te ranew wey mekeutel te minsan hengkey he kelasi te pait. ⁴⁸Ne emun mezakel en he menge pait is ebpekeahuk dutun, eguyuzen te menge etew haazà diyà te geunan. Ne ebpiniu zan su ed-eramen dan is memeupiya zutun te pait ne id-ahuk dan diyà te menge ambung. Ne is kenà meupiya, idtimbang dan. ⁴⁹Ne keuzemà te ketepusan he timpu, iring kayi is egkeulaula su ebpenhipanew is menge velinsuguen te Megbevayà ne edtepizen dan is menge lalung wey menge metazeng he etew. ⁵⁰Ne is menge lalung, idtimbang dan diyà te hapuy. Ne sikan is menge lalung, ne ebpekekulahì dan wey ebpemekengingitel tenged te utew zan ebpemekedsendit.”

⁵¹Ne mid-insaan ni Jesus is menge sumusundan din te, “Egkesavut niw ve heini is egkegiyen ku?” “Uya, Datù, egkesavut dey,” ke sikandan. ⁵²Ne mid-uman megkagi si Jesus te, “Ne tenged kayi,” ke sikandin, “ke zuen menunudlù te kesuguan he nekesundan te hadì tew he Megbevayà, ebpekeiring sikandin te etew he zekelà is ketigeyunan din diyà te valey zin. Su kenà iyan dà igkepenurù din is kinezaan, kekenà, igkepenurù din daan is begu.”

Si Jesus Diyà te Neserit

(Mateo 13:53-58; Marcos 6:1-6; Lucas 4:16-30)

⁵³Ne hein nepasad ni Jesus haazà is kepnenurua zin kandan kayi te menge sempità, mid-awà sikandin dutun ne ⁵⁴mid-ulì diyà te inged din. Ne ziyà te simbahan mibpenurù din is menge etew zutun. Nengeinuinu is menge etew he mibpeming kandin. Ke sikandan te, “Hentei vuwa is nekepenurù kandin? Maan is metau sikandin ebaal te menge egkein-inuwan? ⁵⁵Anak dà sikandin te pandey. Ne si Maria is iney zin; ne menge

hazi zin, ensi Santiago, si Jose, si Simon, wey si Hudas. ⁵⁶Ne is menge etevey zin, ne zini zaan sikandan eppen-ubpà. Maan is metau sikandin wey maan is ebpekehimu sikandin te egkengein-inuwan he iring kayi?" ⁵⁷Ne tenged kayi wazè dan medtuu kandin. Ne zutun migkagi sikandin diyà te kandan te, "Is ebpeneuven te Megbevayà, kenà sikandin edtehuzen te menge etew ziyà te keugelingen din he inged; iyan, diyà te menge zuma he inged edtehuzen mulà sikandin," ke si Jesus. ⁵⁸Umba kenà mezakel is impeehè din dutun he egkein-inuwan su wazè dan kedtuu kandin.

Is Kebpatey ni Juan Megbebewtismu

(Mateo 14:1-12; Marcos 6:14-29)

14 ¹Ne zutun he timpu nezineg ni Hadì Hirudis is tudtul mehitenged te ulaula ni Jesus. ²Ne migkagi si Hirudis diyà te menge suluguen din te, "Heini si Jesus, siguradu he iyan ded si Juan Megbebewtismu he nevanhew, ne tenged kayi zuen din gehem wey zin meveeli is menge iring kayi he singyal," ke sikandin.

³⁻⁵Ne iyan hinungdan te kegkehimetayi ki Juan, su midsawey zin si Hirudis he migkagi te, "Nekesupak ka te kesuguan su mid-esawa nu si Hirudyas," ke sikandin. Ipag ni Hirudis si Hirudyas, su esawa te hazi zin he si Felipe. Ne tenged dutun te kedsewaya kandin ni Juan impezakep ni Hirudis si Juan ne mibpirisu zin. Edhimetayan din pezem si Juan, iyan, egkehandek te menge Huidiyu su netuenan dan he ebpeneuven si Juan te Megbevayà.

⁶Ne neuma is andew he edsilibrahan ni Hirudis is ked-enaka kandin, ne midseyawan te anak he raga ni Hirudyas is menge etew he nengetigum dutun. Ne utew nesuat si Hirudis tenged dutun. ⁷Ne mibpesarig din haazà is midsayew. Ke sikandin te, "Buyù ka te minsan hengkey, ne ibegey ku kenikew." ⁸Ne zutun tenged te impenurù te iney zin, migkegiyan din si Hirudis te, "Ivegey nu kedì kayi, guntaan dà, is ulu ni Juan Megbebewtismu he id-ahuk diyà te pinggan." ⁹Ne zutun utew neseeng haazà is hadì, iyan, tenged dutun te pesarig din he nezineg te langun he menge bisita zin, midtuman din haazà is mibuyù dutun te raga. ¹⁰Ne mibpepungelan din si Juan te ulu ziyà te pirusuwan. ¹¹Ne in-ahuk dan is ulu ni Juan te pelatu ne imbegey zan duen te raga. Ne haazà is ulu, imbegey zutun te raga ziyà te iney zin. ¹²Ne sikan is lawa ni Juan, mibeyaan te menge sumusundan din ne inleveng dan. Ne midhendiyè dan te ki Jesus su edtudtulan dan sikandin dutun te neulaula.

Is Kebpekeena te Lelima he Libu he Menge Etew

(Mateo 14:13-21; Marcos 6:30-44; Lucas 9:10-17; Juan 6:1-13)

¹³Ne hein netuenan eni Jesus is nehitavù ki Juan, mid-untud dan te avang ne mid-awè dan dutun te iyan dan dà su edhendiyè dan te wazà

duen etew. Iyan, hein netuenan te mezakel he minge etew, ne mid-awè dan diyà te minge inged dan is ebpemeyvey he edtelukun ki Jesus. ¹⁴Ne hein nekezunggù ensi Jesus, neehè din is mezakel he minge etew. Ne utew zin nengehizuwi sikandan ne mibewian din is egkengezeruwan dutun ne nengeulian.

¹⁵Ne hein mahapun en, mid-uvayan sikandin te minge sumusundan din ne ke sikandan te, “Mahapun en utew ne wazà minge inged kayi te uvey tew; deyzey ke ibpegenat nu en is minge etew wey zan mekehendiyà te minge inged ne egkepemasa zan is egkekaan dan.” ¹⁶Ne ke si Jesus te, “Iyan kew mebegey te egkekaan dan.” ¹⁷Ne ke sikandan te, “Es! Iyan dà naazen tew zini is lelima he vuuk he supas wey zezuwa he vuuk he pait.” ¹⁸Ne migkagi si Jesus te, “Uwita niw zini.” ¹⁹Ne zutun migkegiyan din is minge etew he mebpinuu zan diyà te tanà; ne migkuwa zin haazà is lelima he supas wey haazà is dezuwa he pait ne midlingahà diyà te langit ne mibpeselematan din te Megbevayà. Mibpenevitevì din is minge supas, ne imbegey zin diyà te minge sumusundan din. *Ne minsan pa zutun wazà maamin haazà is supas. Ne midtukid te minge sumusundan din pemegayi zutun is minge etew.* ²⁰Ne is kada sevaha zutun te minge etew, nekekaan ne nahantey. Ne haazà is egkeenen, nesemaan pa te sepulù wey zezuwa he vinevey is nehimes te minge sumusundan din he minge tevì te supas. ²¹Lelima he libu is kezakel zutun te minge maama he nekekaan ne wazà iragkes te ebilang is minge vahi wey minge vatà.

Is Kedhipanew ni Jesus Diyà te Wahig

(Mateo 14:22,23; Marcos 6:45-52; Juan 6:16-21)

²²Ne zutun impemeuntud ni Jesus te avang is minge sumusundan din wey zan mekehuna mekerapas pehendiyà te zehipag dutun te ranew su ibpemeulì din pa haazà is mezakel he minge etew. ²³Ne hein nemekehpanew en haazà is minge etew, midtekezeg si Jesus diyà te vuvungan te sebsevaha zin ne mid-ampù. Ne hein mezikilem en, kemulu pa zutun si Jesus te sebsevaha zin. ²⁴Ne haazà is nemen-untud te avang, diyè dan en te lawed te ranew ne neregenan sikandan te zekelà he vagel su egkesinugung dan is dekelà he keramag. ²⁵Ne hein megaan egkepawà, midhendiyà si Jesus te kandan he ziyà sikandin ebpenggiekgiek te zivavew zutun te wahig. ²⁶Ne te kegkeahaa kandin te minge sumusundan din, utew zan neherati. “Gimukud!” ke sikandan, ne nemekeerang dan is egkengehandek. ²⁷Ne zutun migkagi si Jesus diyà te kandan, “Sarig kew,” ke sikandin, “kenè kew mahandek su iyan a.” ²⁸Ne zutun migkagi si Pedro te, “He Zatù, ke tutuu he iyan ka heeyan, pengelinteuwi nu he mekehendiyàn a ne mekehpanew a kayi te zivavew te wahig.” ²⁹Ne ke si Jesus te, “Hendini ka.” Ne midrenà si Pedro puun dutun te avang ne

midhipanew zutun te zivavew te wahig pehendiyà te ki Jesus. ³⁰Ne hein negezam din he utew mevendes is keramag dutun, ne netik-ew sikandin mahandek ne idteledted en sikandin. Ne segugunà sikandin nekekulahi te, “Tevangi a!” ³¹Ne segugunà migewezi sikandin ni Jesus te egkagi te, “Maan is kenè ka ebpekesarig kediey? Maan is eduwazuwa ka?” ³²Ne mid-untud dan dutun te avang, ne mid-engked haazà is keramag. ³³Ne is minge zuma he minge sumusundan din dutun te avang, mid-azap dan ki Jesus he ke sikandan te, “Benar iyan he Anak ka te Megbevaya!”

Is Kebewii te Etew Ziyà te Giniserit

(Mateo 14:34-36; Marcos 6:53-55)

³⁴Ne hein nekeuma zan en diyà layun, nekezunggù dan diyà te inged he Giniserit. ³⁵Ne nekilala si Jesus te minge etew zutun. Ne impemetukew zan is egkengezeruwan diyà te minge siringan he inged dutun. Ne nemekeuma is ebpenhated diyà te ki Jesus te minge etew he zuen daru. ³⁶Ne midhangyù dan ki Jesus he itugut din he mekegawed dan te minsan sidsid dà te kumbalè din ne nengeulian is langun he nekegawed dutun.

Is Tulumanen te Minge Perisiyu

(Mateo 15:1-9; Marcos 7:1-13)

15 ¹Ne zutun, duen minge Perisiyu wey minge menunudlù te kesuguan he minge tigHiruselim he midhendiyà te ki Jesus. Mid-insè dan ki Jesus te, ²“Is minge sumusundan nu, maan is edsupaken dan is minge tuluuwen he imbilinbilin kenitew te lukes tew? Su is minge sumusundan nu, kenè dan ebpenlùlù te minge velad dan te hustu he paagi te kegkaan te kenè dan pa ebpuun egkaan.” ³Ne mid-insà daan si Jesus diyà te kandan te, “Ne sikiyu zaan, maan is, pinaagi te kedtumana niw te minge tuluuwen he imbilinbilin keniyu te minge apù niw, ne edsupaken niw is sugù te Megbevaya? ⁴Su migkagi is Megbevaya te, ‘Tehuza niw is amey niw wey iney niw.’ Ne migkagi zaan te, ‘Ke zuen edsulà te amey zin wey iney zin, ne kinahanglan he edhimetayan.’ ⁵Ne iyan keniyu he penurù is: ke zuen etew he zuen din igketavang te iney zin wey amey zin, idtugut niw he egkagi sikandin diyà te kandan te, ‘Heini is idtavang ku pezem keniyu, kenè ku igkevegey su imbuwis ku en heini te Megbevaya.’ ⁶Ne zutun,” ke si Jesus, “sumalà is penurù niw, wazè en kinahanglan he ebegayan din pa te tavang is ginikanaan din. Iyan heini paagi niw wey niw kenà metuman is Lalag te Megbevaya wey niw iyan metuman haazà is keniyu he penurù. ⁷Tarù is kedtuu niw te Megbevaya! Utew hustu is Lalag te Megbevaya he insurat te tipehuna he ebpeneuven he si Esaias. Netagnè kew zin, su ke sikandin te,

⁸‘Heini he minge etew, egkagi zan

he edtehuzen e zan,
 iyan, wazà kedtuu he neseled
 diyà te gehinawa zan.
 9 Wazà pulus te kedsimbaha zan kedi
 su zutun te kebpenurù dan,
 egkegiyen dan he minge sugù ku is kandan dà
 he ebpeveelan te minge etew.’ ”

Is Ibpekesalà te Etew

(Mateo 15:10-20; Marcos 7:14-23)

10 Ne zutun mid-umew ni Jesus is mezakel he minge etew zutun he med-uvey zan diyà te kandin. “Pmineg kew,” ke sikandin, “wey niw mesavut. 11 Is igkeepesi te Megbevayà te etew, ne kenà iyan sikan is egkeenen he id-ahuk dutun te etew ziyà te vèbè din, kekenà, iyan sikan is minge mezaat he lalag he egawas he ebpuun te vèbè dutun te etew.”

12 Ne mid-uvayan si Jesus te minge sumusundan din ne ke sikandan te, “Netuenan nu ve he nepeukan ka te minge Perisiyu tenged te minge lalag nu geina?” 13 Ne midtavak si Jesus te, “Ebezuten is minsan hengkey he pinemula he wazà ipemula te Amey ku he Megbevayà. 14 Bey-ani niw en is minge Perisiyu. Iring sikandan te minge lakap. Ne ke zuen lakap he ed-egaken din is sengelelakap, haazà is ebpeegakà, ne pudu egkeulug diyà te vitu.” 15 Ne zutun migkagi si Pedro te, “Luwasa nu kenami sikan is kehulugan te sempitè nu geina.” 16 Ne migkagi si Jesus te, “Kenè niw pe ves egkesavut? 17 Kenè niw ves egkeisip he is id-ahuk ta ziyà te vèbè ta, ne ebhendiyà te getek ta ne zutun egawas puun te lawa ta? Ne kenà iyan haazà igkeepes te Megbevayà. 18 Iyan, is minge mezaat he lalag he ziyà egawas te vèbà te etew, diyà ebpuun te gehinawa zin, ne iyan heini utew igkeepesi kandin te Megbevayà. 19 Su ziyà te gehinawa te etew ebpuun is minge meezaat he isip he utew igkeepes te Megbevayà iring te kebunù, kedhilavet te kenè din esawa, meremerik he ulaula, kebpenakew, kedtarùtarù diyà te hukmanan, wey is kebpenudtul zin te tarù wey mezeeti is dengeg te sengeetew. 20 Iyan heini minge ulaula he igkeepes te Megbevayà, iyan, kenè din igkeepes is kegkaan ta he wazè ki mekepenlùlù te velad ta sumalà is betasan te minge Perisiyu.”

Is Kedtuu te Vahi he Kenà Hudiyu

(Mateo 15:21-28; Marcos 7:24-30)

21 Ne mid-awà si Jesus dutun su edhendiyà te inged he uvey te minge inged he Tiru wey Sidun. 22 Ne zuen dutun nekeubpà he vahi he tigKenaan. Ne midtelavuk haazà ki Jesus su edhangyù, ke sikandin te, “He Zatù he kevuwazan ni Hadì David, kehizuwi a kenikew su zuen anak ku he vahi he egkerasey utew su edlelengen te mezaat he mulin-

ulin.” ²³Iyan, kenà edsegipaan ni Jesus. Ne zutun, mid-uvayan si Jesus te minge sumusundan din; ne midhangyù dan he ke sikandan te, “Ipeuli nu heeyan is bahi su kenà edsuwey kenitew he ebpekeuringer.” ²⁴Ne zutun migkegiyan ni Jesus haazà is bahi te, “Midsugù a te Megbevayà he iyan dà ibpetevangan kedì is kevuwazan ni Israyil he nengetazin iring te kerehidu.” ²⁵Ne zutun mid-uvey haazà is bahi ne midluhud diyà te etuvangan ni Jesus is edhenduen te, “Datù, tevangi a!” ²⁶Ne midtavak si Jesus te, “Kenà meupiya ke egkuwaan ta is egkeenen te minge vatà ne idsamak te minge asu.” ²⁷Ne migkagi haazà is bahi te, “Benar iyan, Datù, iyan, minsan ke asu ne ebpekekaan gihapun te minge mumu he egkengeulug puun te lemisahan te tegiasu kandin.” ²⁸Ne migkegiyan ni Jesus haazà is bahi te, “Bayi,” ke sikandin, “utew zekelà is kedtuu nu te Megbevayà. Ne ibegey ku kenikew is ebuyuen nu.” Ne zutundutun neulian haazà is anak dutun te vahi.

Is Kebewii te Mezakel he Minge Etew

²⁹Ne mid-awà si Jesus dutun ne mibpemeyvey te ranew he Geliliya. Midtekezeg sikandin diyà te vuvungan dutun ne mibpinuu. ³⁰Ne mibpenhendiyà te kandin is utew mezakel he minge etew. Mibpenduma zan is minge piang, minge pungkul, minge lakap, minge emew. Ne miduma zan is mezakel pa he egkengezeruwan. Ne insavuk dan haazà diyà te etuvangan ni Jesus ne nengeulian din is langun dutun te mibpevawì kandin. ³¹Ne utew nengeinuinu is minge etew zutun te nengeehè dan. Su ebpekekagi en sikan is emew; ne neulian en sikan is pungkul; sikan is piang, ne ebpekehipanew en; ne sikan is nengelakap, ne ebpekeehè en. Ne midalig dan dutun is Megbevayà he edsimbahan dan te minge kevuwazan ni Israyil.

Is Kebpekeena te Heepat he Libu he Minge Etew

(Mateo 15:32-39; Marcos 8:1-10)

³²Ne mid-umew ni Jesus is minge sumusundan din, ke sikandin te, “Kehizu kayi he minge etew su tetelu en he kezukileman is wazè dan medsuwey kediey, ne wazè dan en egkekaan. Kenà meupiya he ebpekeuli sikandan te wazè dan mekekaan su kela ke luyahi sikandan diyà te zalan.” ³³Ne migkagi haazà is minge sumusundan din te, “Meziyù heini te minge valey. Ne wazà kayi egkekuwaan ta te ibpekaan kenian te utew mezakel he minge etew.” ³⁴Ne mid-insà si Jesus te, “Pira he vuuk is supas niw?” Ne midtavak dan te, “Pitu he vuuk wey pira he legas he pait he zezeisek,” ke sikandan. ³⁵Ne migkegiyan ni Jesus he mebpinuu ziyà te tanà haazà is minge etew. ³⁶Ne zutun migkuwa zin haazà is pitu he supas wey minge pait ne mibpeselamatan din te Megbevayà. Ne mibpenevitevì din ne imbegey zin diyà te minge sumusundan din haazà

ne intukid te minge sumusundan din ipemegey haazà diyà te minge etew. ³⁷Ne nemekekaan is langun he minge etew zutun ne nengehantey. Ne pitu pa he vinevey is netigum te minge sumusundan ni Jesus he samà dutun te minge etew. ³⁸Heepat he libu is minge maama zutun te nekekaan ne wazà iragkes te ebilang is minge vahi wey minge vatà dutun.

³⁹Ne zutun impemeulì ni Jesus haazà is minge etew. Ne mid-untud sikandin te avang ne midhendiyà te inged he Megadan.

Is Kebpen-ahà te Singyal

(Mateo 16:1-4; Marcos 8:11-13; Lucas 12:54-56)

16 ¹Duen minge Perisiyu wey Sedusiyu he midhendiyà te ki Jesus su egezamen dan sikandin. Umba mid-insaan dan, ke sikandan te, “Ipeehè key te singyal he tuus he sugù ka te Megbevayà.” ²Iyan, midtavak si Jesus te, “Emun edsanlep en is andew ne ebpemurawag, egkagi kew te, ‘Meupiya is timpu keeselem.’” ³Ne ke egkepawà ne ebpemurawag ne zuen kivel, egkagi kew zaan te, ‘Edrendeng guntaan.’ Egketuusan niw is uzan tenged te gapun, iyan, kenè niw ves egketuusan is ed-ul-ulahan guntaan te Megbevayà. ⁴Sikiyu is minge etew guntaan, utew kew mezaat; wazè en diyà te gehinawa niw is kebmahala te Megbevayà! Maan is ed-ehè kew te singyal? Iyan dà singyal he ibpaahà keniyu is iring duen te singyal he neulaula zuen te tipehuna he si Jonas.” Ne zutun mid-ewaan din sikandan.

⁵Ne midlayun dutun te ranew is minge sumusundan ni Jesus, ne wazè dan mekeuwit te supas su nelipatan dan. ⁶Hein nekerapas dan en, duen sempità he impezineg kandan ni Jesus. Ke sikandin te, “Andam kew wey niw melikayi is tapey te minge Perisiyu wey Sedusiyu.” ⁷Ne wazè dan mesavut he kenà iyan is tapey te supas egkegiyen din, ne mibpelelelagè dan te, “Iyan ingkegiya zin kayi su wazè kiw mekeuwit te supas.” ⁸Ne nesavut ni Jesus is egkegiyen dan ne ke sikandin te, “Maan is egkesamuk kew te wazè kew mekeuwit te supas? Uteu meluya is kedtuu niw! ⁹Wazè bes meketagù diyà te isip niw he kenè ta igkesamuk is supas? Wazè niw ves metenuzi kes mibeelan ku hein mibpenevitevi ku kes minge supas wey mekekaan sikan is lelima he libu he minge maama? Wazè niw ves daan metenuzi sikan is minge vinevey he nengepenù te midhimes niw he nengesamè dan? ¹⁰Ne wazè bes daan diyà te isip niw kes pitu he vuuk he supas he impekaan ku zuen te heepat he libu he minge maama, wey sikan is minge vinevey he nehimes niw? ¹¹Maan is wazè niw mesavut he kenà supas is egkegiyen ku? Andam kew wey kew mekelikey te tapey te minge Perisiyu wey Sedusiyu.” ¹²Ne human mesavut te minge sumusundan din haazà he kenà iyan ebpelikayan din kandan is idtapey te supas, kekenà, iyan is ibpenurù te minge Perisiyu wey Sedusiyu.

Is Migkagi ni Pedro Mehitenged ki Jesus
(*Mateo 16:13-20; Marcos 8:27-30; Lucas 9:18-21*)

¹³Midhendiyà ensi Jesus te inged he uvey te inged he Sisarya Pilipus. Ne hein nekeuma zan en dutun, mid-insaan din is menge sumusundan din te, “Siak is Kakey te Menusiyà, hentei e kun sumalà te ked-isipa kediey te menge etew?” ¹⁴Ne midtavak dan te, “Is duma, ne iyan ke kun si Juan Megbebewtismu he nevanhew. Ne is duma, ke sikandan te, iyan ka si Elias. Ne egkagi is duma pa te si Jeremias ka, ne emun kenà, ne sevaha ka zuen te ebpemeneuven dengan te Megbevayà.” ¹⁵Ne ke si Jesus te, “Ne sikiyu zaan, hentei e man sumalà te ked-isipa niw kediey?” ¹⁶Ne zutun midtavak si Simon Pedro te, “Iyan ka sikan is mibpili te Megbevayà he ibpahadì din te menusiyà; iyan ka sikan is Anak te wazè din kemetayen he Megbevayà.” ¹⁷Ne migkagi si Jesus te, “Simon, anak ni Juan, midtuvazan ka te Megbevayà su wazè nu metueni heini pinaagi te etew, kekenà, impinted kenikew te Amey ku he ziyà te langit. ¹⁸Ne tenged kayi egeraran ku sikew ki Pedro, he ke vâ dà egkegiya, batu. Ne iring te vatu is edtukuzan ku te iglisya ku, *he ke vâ dà egkegiya, is menge etew he edtuu kediey. Ne minsan is gehem te kemetayen, ne kenà ebpekezaag kandan.* ¹⁹Ne idsarig ku kenikew is kebayàbayà emun edhadì is Megbevayà he ziyà te langit. Ne kinahanglan he is idawey nu zini te kelibutan, indawey en he zaan te Megbevayà he ziyà te langit; ne is idtugut nu zini te tanà, intugut en he zaan te Megbevayà he ziyà te langit.” ²⁰Ne zutun mibpekettelteleenan ni Jesus is menge sumusundan din he kenè dan tudtula ziyà te minsan hentei he iyan sikandin sikan is mibpili te Megbevayà he ibpahadì.

Is Kebpesevuta ni Jesus te Kemetayen Din
(*Mateo 16:21-28; Marcos 8:31-9:1; Lucas 9:22-27*)

²¹Ne puun dutun impesavut din te menge sumusundan din is imbanglis kandin. Ke sikandin te, “Kinahanglan he edhendiyà a te Hiruselim ne utew merasey is ed-ul-ulahan kedì te menge ebmegurangan te menge Hudiyu, menge punuan he memumuhat wey menge menunudlù te kesuguan. Edhimetayan e zan ne seled te tetelu he andew zutun, egkevanhew a.” ²²Ne zutun insivey sikandin ni Pedro, ne ke si Pedro te, “He Nengazen, berakat he kenà tumana te Megbevayà heini is migkagi nu.” ²³Ne midsinaru si Jesus diyà te ki Pedro is egkagi te, “Sikew is ed-iring ki Setanas, awè ka zini te kediey. Egkesanggan a kenikew su wazà diyà te isip nu is egkesuatan te Megbevayà, kekenà, iyan diyà te isip nu is egkesuatan te etew!”

²⁴Ne zutun migkagi si Jesus diyà te menge sumusundan din te, “Ke zuen egkesuat he edsundan kedì, kinahanglan he iawè din diyà te isip

din is kandin he egkesuatan he minge ulaula, ne tianga zin is krus din, *he ke và dà egkegiya, kinahanglan he edtumanen din is minge sugù ku minsan ke iyan ibpatey zin. Ne human ebpekesunud kedì.* ²⁵Su ke zuen etew he egkenugunan din is untung din, ebpatey gihapun. Iyan, ke zuen etew he edsunud kedì, minsan ke ibpatey zin pa, id-uli te Megbevayà diyà te kandin is untung din ne kenè en sikandin ebpatey te wazà pidtemanan. ²⁶Minsan ke maangken pa te etew is tivuuk he kelibutan, wazà pulus diyà te kandin ke kenà sikandin egkevegayan te untung he wazà pidtemanan, su wazà minsan hengkey he azen he igkeliwè din wey zin maangken is untung he wazà pidtemanan. ²⁷Su Siak is Kakey te Menusiyà, imbanglis kedì he mekelikù a keuzemà he edumahan te minge velinsuguen ku wey edsun-uzan ad te mekegegehem he anlag te Amey ku he Megbevayà. Ne zutun edsuhulan ku is langun he minge etew sumalà is mid-ulaula te uman sevaha. ²⁸Kenè niw heini lipati he zuen minge zuma tew kayi he kenà ebpatey taman te egkeehè e zan is Kakey te Menusiyà he ebpekeuma su edhadì.”

Is Kegkahalin te Zagwey ni Jesus

(*Mateo 17:1-13; Marcos 9:2-13; Lucas 9:28-36*)

17 ¹Neiwas is heenem dutun he andew ne miduma ni Jesus ensi Pedro, si Santiago, wey si Juan, sikan is hazi ni Santiago, ne midtekezeg dan te metikang he vuntut he iyan dan dà. ²Ne zutun te kedtengtengi zan ki Jesus, netik-ew mahalín is dagwey zin. Utew merayag is paras din iring te andew. Ne nengenamag is bisti zin te keputì. ³Ne zutun netik-ew zan daan maahà si Moises wey si Elias he ebpekidlalag ki Jesus. ⁴Ne migkagi si Pedro ziyà te ki Jesus te, “Uteu meupiya te zini key. Ke egkesuatan nu, ebeelan ku kayi is tetelu he lawig; sevaha is kenikew, sevaha zaan is ki Moises, wey sevaha is ki Elias.” ⁵Ne te kemulu pa heini is lalag ni Pedro, neselikuvungan sikandan te ebenganlag he gapun. Ne ebpuun dutun te gapun nezineg dan is midtik-ew megkagi te, “Iyan heini sikan is Anak ku he utew ku minahal; ingkesuat ku utew sikandin. Peminenga niw sikandin.” ⁶Ne hein nezineg heini zutun te minge sumusundan ni Jesus nekelangkeb dan su utew zan nengahandek. ⁷Ne mid-uvayan sikandan ni Jesus ne migewezan din sikandan ne ke sikandin te, “Enew kew, kenè kew mahandek.” ⁸Ne hein mid-enuw zan, ne iyan dan dà dutun maan naahà si Jesus.

⁹Ne zutun te edtupang dan, mibeleuzan sikandan ni Jesus te, “Heini is neehè niw, kenè niw tudtula ziyà te minsan hentei taman te kenè e pa is Kakey te Menusiyà egkevanhew.” ¹⁰Ne zutun mid-insaan si Jesus te minge sumusundan din te, “Maan is egkegiyen te minge menunudlù te kesuguan he kinahanglan he edhuna edlepew si Elias, sikan is ebpeneuven dengan, ne human sikan is edhadì he mibpilì te Megbevayà?”

¹¹Ne zutun midtavak si Jesus te, “Tutuu iyan he egkehuna ebpekeuma si Elias su ed-endamen din is langun. ¹²Iyan, egkegiyen ku keniyu he nekeume en iyan si Elias, iyan, wazà sikandin mekilala te menge punuan. Midrasey zan sikandin sumalà is egkesuatan dan he ed-ul-ulahan dan kandin. Ne iring ded dutun te kedresaya zan kandin is ed-ul-ulahan dan dini te kedì te Kakey te Menusiyà.” ¹³Ne human mesavut dutun te menge sumusundan ni Jesus he iyan egkegiyen din si Juan Megbebewtismu.

Is Kebugawa te Mevurut he Mezaat he Mulin-ulin
(*Mateo 17:14-21; Marcos 9:14-29; Lucas 9:37-43*)

¹⁴Ne hein neumahan dan sikan is mezakel he menge etew, ne zuen etew zutun he mid-uvay ziyà te ki Jesus ne midluhud diyà te etuvangan din. ¹⁵Ke sikandin te, “Datù, kehizuwi nu is anak ku. Ebevuyen sikandin ne utew merasey is egkeulaula zin su layun egkeulug diyà te hapuy wey ziyà te wahig. ¹⁶Impeehè ku ziyà te menge sumusundan nu, iyan, wazè dan meulii sikandin.” ¹⁷Ne zutun migkagi si Jesus te, “Sikiyu is menge etew guntaan, utew zekelà is menge sayep niw! Wazè niw iyan kedtuu! Utew ves egkeuget is kebpekiduma ku keniyu! Utew ves egkeuget is kebpekeantus ku keniyu ne human kew edtuu! Ihengkayi niw heeyan is batà.” ¹⁸Ne midawey ni Jesus is mezaat he mulin-ulin he edlalung dutun te vatà ne impeguwè din ne zutundutun neulian haazà is batà.

¹⁹Ne is menge sumusundan din, hein iyan dan dà engki Jesus, mid-uvayan dan sikandin. Ne ke sikandan te, “Maan is wazè dey meulii sikan is batà he edlelengen te mezaat he mulin-ulin?” ²⁰Ne midtavak si Jesus te, “Wazè niw meulii tenged te utew zeisek is kedtuu niw. Tentenuzi niw he ke zuen niw kedtuu, minsan utew zà deisek iring te lisu te mustasa, egkehimu he egkekegiyan niw heini is buvungan he medhalin, ne ebpemineg keniyu. Minsan hengkey, ne egkehimu niw. ²¹Iyan, sikan he kelasi te mezaat he mulin-ulin, igkepaawà pinaagi zà te ked-ampù wey pinaagi te kedsalang te kegkaan. Wazà дума he paagi.”

Is Ikezuwa he Kebpesevuta ni Jesus te Kemetayen Din
(*Mateo 17:22,23; Marcos 9:30-32; Lucas 9:44,45*)

²²Netigum is menge sumusundan din diyà te prubinsya he Geliliya. Ne zutun migkagi si Jesus diyà te kandan te, “Siak is Kakey te Menusiyà, duen timpu he ibpalad a ziyà te menge kuntada ku ne edhimetayan e zan, ²³nyan, seled te tetelu he andew zutun egkevanhew a.” Ne zutun utew nengeseeng is menge sumusundan din.

Is Bayad Para te Valey te Megbevayà

²⁴Nekeume en si Jesus wey menge sumusundan din diyà te inged he Kepirnaum. Ne mid-uvayan si Pedro te menge menunukut te ibayad

dutun te Valey te Megbevayà. Ne mid-insà sikandan te, “Is menunudlù niw, ebayad be sikandin te ebpeveyazan kandin te Valey te Megbevayà?”²⁵ Ne midtavak si Pedro te, “Uya, ebayad sikandin.” Ne hein mid-uli dutun si Pedro ziyà te valey, iyan si Jesus mid-insà kandin te, “Simon, hengkey is ked-isipa nu kayi? Penenglitan, kayi te kelibutan hentei is ebayad te sidula ziyà te hadi? Iyan be is menge mesipeg din wey ke iyan be is kenè din kezuzumahi?” Ne ke si Pedro te, “Iyan is kenè din kezuzumahi.”²⁶ Ne ke si Jesus te, “Ne emun iyan heeyan, ne kenè en ebpekevayad is menge mesipeg te hadi. Ne sikita is mesipeg diyà te Megbevayà, kenà daan kinahanglan he ebeyazan ta is ebpeveyazan te valey zin.”²⁷ Asal, kenà meupiya he mepauk kenita heini is menge menunukut te ibayad dutun te Valey te Megbevayà. Hendiyè ka te ranew ne pemunuwit ka. Ne zutun te vèbà te pait he egkehuna nu egkeutel, egkeehè nu is selapì. Kuwaa nu haazà is selapì ne ivayad nu kayi te edsukuten kenita he ibayad te Valey te Megbevayà.”

Is Lavew Zuen te Menge Etew he Edhedian te Megbevayà

(Mateo 18:1-5; Marcos 9:33-37; Lucas 9:46-48)

18¹ Ne zutun he timpu midhendiyà te ki Jesus is menge sumusundan din ne mid-insè dan te, “Hentei is lavew te menge etew he edhedian te Megbevayà?”² Ne mid-umew ni Jesus is batà ne impeteliwazè din dutun te menge sumusundan din.³ Ne ke si Jesus te, “Kenè niw lipati heini: kinahanglan he ed-ewaan niw ziyà te isip niw is kebpelavew ne iringi niw heini is batà, *su nelevawan sikandin te langun. Su emun kenè niw ed-iringan heini, ne kenè kew egkehedian te Megbevayà.*⁴ Su is etew he ed-engkezan din is kebpelavew ne ed-iringan din heini is batà, iyan sikandin lavew te langun he edhedian te Megbevayà.⁵ Is etew he tenged te kedtuu zin kedì edewaten din ne ebpurungan din is minsan hentei he vatà he iring kayi, ne nezawat e zin en daan.

Is Ebpekeawà te Kedsarig

(Mateo 18:6-9; Marcos 9:42-48; Lucas 17:1,2)

⁶ Minsan hentei he etew he pinaagi kandin egkeawà is kedsarig kediey te sevaha he vatà, meupiya pa zutun he etew ke edhiketan is lieg din te zekelà he gelingan he watu ne id-agbur ziyà te lawed te zagat kenà is silut kandin ke pinaagi kandin egkeawà is kedsarig te sevaha he vatà he iring kayi.⁷ Kehizu te menusiya, su zuen iyan menge ebpekeawà te kedsarig te menge etew. Layun egkehita vù is iring kayi, iyan, kehizu utew te etew he pinaagi kandin egkeawà is kedsarig kediey te minsan hentei he midtuu kedì su utew mevegat is silut kandin te Megbevayà.

⁸ Emun iyan ebpekeawà te kedsarig nu kediey is belad nu, emun kenà, ne paa nu, tempeza nu wey itimbag! Su meupiya pa ke pungkul ka is

ebegayan te untung he wazà pidtemanan, kenà te zezuwa is belad nu wey paa nu he idtimbang ka ziyà te hapuy he wazà pidtemanan. ⁹Ne emun iyan ebpekeawà te kedsarig nu kediey is mata nu, lugita nu wey itimbang su meupiya pa ke sevaha zà is mata nu ke ebegayan ka te untung he wazà pidtemanan, kenà te zezuwa is mata nu ne idtimbang ka pehendiyà te hapuy te Impirnu.

Is Netazin he Kerehidu

(Mateo 18:10-14; Lucas 15:3-7)

¹⁰Ne is minge etew he iring kayi te minge vatà, kenè niw lupigi is minsan sevaha kandan su venar is egkegiyen ku keniyu he is minge velinsuguen te Megbevayà he ebantey kandan, kenà ed-awà diyà te etuvangan te Amey ku he Megbevayà he ziyà te langit. ¹¹Su siak is Kakey te Menusiyà, iyan impekehendini ku te kelibutan su wey ku melibri is menusiyà wey kenà sikandan mesiluti tenged te minge salè dan.

¹²Ke zuen etew he nenggatus is minge ayam din he kerehidu ne egketazin is sevaha zutun, hengkey is ed-ul-olahan din? Iyan ed-ul-olahan din is ed-ewaan din haazà is kesiyawan wey siyew he wazà metazin he ebpemenabtab diyà te kelendigan, ne ebpen-ahaan din haazà is sevaha he netazin. ¹³Egkegiyen ku keniyu he ke egketuredu zin haazà, utew sikandin egkelipey zutun te sevaha kenà dutun te kesiyawan wey siyew he wazà metazin. ¹⁴Iring din ded daan is Amey tew ziyà te langit su kenè din egkesuatan he zuen minsan sevaha zà kayi te minge vatà he kenà egkelibri te silut.

Is Etew he Nekesalà

¹⁵Ne emun duen tumutuu he nekesalà kenikew, hendiyè ka te kandin ne kegiya nu ziyà te kandin is salè din kenikew. Iyan, kinahanglan he itavis nu kandin. Ne emun ebpekidhusayà sikandin, ebpeked-uliey kew te meupiya he gehinawa. ¹⁶Iyan, ke kenà ebpekidhusayà, peng-ehè ka te sevaha, ne emun kenà, ne zezuwa pa he tumutuu su wey mepirmahi zutun te zezuwa, emun kenà, ne tetelu haazà is kebitiyara niw. ¹⁷Ne emun kenè pa sikandin ebpekidhusayà, tudtula nu ziyà te nengetigum he minge zuma niw he tumutuu. Ne emun kenè pa ebpekidhusayà dutun, isipa niw sikandin he iring te etew he kenà tumutuu te Megbevayà wey isipa niw zaan sikandin he iring te sevaha zuen te limbungan he menunukut te vuhis.

¹⁸Ne egkegiyen ku keniyu he kinahanglan he is idawey niw zini te tanà, indawey en he zaan te Megbevayà he ziyà te langit ne is idtugut niw zini te tanà, intugut en he zaan te Megbevayà he ziyà te langit.

¹⁹Ne heini zaan is ipesavut ku keniyu: ke zuen minsan hengkey he ebuyuen niw ziyà te Megbevayà he neuyunan te minsan dezuwa zà

keniyu zini te tanà, ibegey heini keniyu te Amey ku he Megbevayà he ziyà te langit. ²⁰Su ke zuen minsan dezuwa, ne emun kenà, ne tetelu, he egkekevurun su ed-azap dan kediey, ne zutun a zaan te kandan.”

Is Kenà Kebpeseylu

²¹Ne zutun mid-uvayan si Jesus ni Pedro te egkagi te, “Nengazen, kepipira ebpekesalà is дума ku zini te kediey ne ebpeseyluwen ku pa? Kepipitu zè be?” ²²Ne midtavak si Jesus te, “Kenà kepipitu zà, kekenà, kepipitu egkekekepituwán. ²³Su is kedhadì te Megbevayà he ziyà te langit, ne iring te hadì he edsusiyen din is minge utang kandin te minge suluguen din. ²⁴Ne zutun te kebpuuni zin pa te kedsusi kayi, mid-uwit dan diyà te kandin is sevaha he nekeutang diyà te kandin te sepulù he libu he libu he pisus. ²⁵Ne haazà, kenà ebpekevayad ne tenged dutun insugù dutun te hadì he ivelegyà haazà is etew wey meuripen ragkes is esawa zin wey minge anak din wey langun he azen din wey meveyazi haazà is utang din. ²⁶Ne zutun midluhud diyà te etuvangan te hadì haazà is suluguen he edhangyù, ke sikandin te, ‘Ipaakul a kenikew; begayi e pa te timpu su edleguzan ku heini is bayad ku kenikew ne ebeyazan ku is langun.’ ²⁷Ne nehizuwan haazà is etew zutun te hadì ne mibpesaylu zin ne wazè din en ipevayad dutun te utang din diyà te kandin. Ne impeulì din.

²⁸Ne zutun mid-awà haazà is suluguen ne neuma zin is suluguen daan dutun te hadì he utangan diyà te kandin haazà is iring din he suluguen te pira zà he pisus. Ne migewezan din haazà ne mibpekel zin te egkagi te, ‘Beyazi nu kes utang nu kedì!’ ²⁹Ne midluhud haazà diyà te etuvangan din is edhangyù diyà te kandin te, ‘Ipaakul a kenikew; begayi e pa te timpu su wey ku meleguzi is bayad ku kenikew.’ ³⁰Iyan, wazà mesuat haazà is etew, ne impepirisu zin haazà is utangan kandin taman te kenè pa ebpekevayad. ³¹Ne hein netueanan te minge zuma zin he suluguen haazà is mid-ulaula zin dutun te utangan kandin ne nengepauk dan ne midhendiyè dan te egalen dan he hadì ne midtudtul zan haazà is langun he mid-ulaula zin. ³²Ne impetawag dutun te hadì haazà he suluguen, ne migkegiyan din te, ‘Uripén ka he lalung! Mibpesaylu ku sikew ne in-awè kud diyà te kenikew is utang nu tenged dà te midhangyù ka kediey. ³³Ne maan is wazè nu mehizuwi kes дума nu he suluguen iring te kegkehizuwi ku kenikew?’ ³⁴Ne utew nererengiti haazà is hadì ne impepirisu zin haazà is etew su edsilutan taman te kenè pa sikandin ebpekevayad dutun te langun he neutang din. ³⁵Ne,” ke si Jesus te, “iring ded daan kayi is ed-ul-ulahan te Amey ku he ziyà te langit diyà te uman sevaha keniyu emun kenà tutuu is kebpesaylu niw te minsan hentei he zuma niw.”

Is Ketudluanan Mehitenged te Kebpeengkeza

(Mateo 19:1-12; Marcos 10:1-12)

19 ¹Ne hein ingkepenurù en ni Jesus haazà is langun, mid-awà sikandin diyà te prubinsya he Geliliya ne midhendiyà te Hudiya,

diyà layun te wahig he Hurdan. ²Utew mezakel he minge etew is nemenduma kandin, ne mibewian din is egkengezeruwan dutun ne nengeulian.

³Duen minge Perisiyu zutun he midhendiyà te kandin su ebpengahaan dan te paagi sikandin wey zan ikesumbung. Ne mid-insaan dan sikandin te, “Intugut be te kesuguan is ked-engkezi ta te esawa ta minsan ke wazè ta utew ketezengan?” ⁴Ne midtavak si Jesus te, “Wazè niw ves mevasa sikan is insurat he Lalag te Megbevayà ⁵he edhenduen te, ‘Dengan te kedlimbaga te Nengazen te langun, mibeelan din is maama wey vahi. Tenedg kayi ed-ewaan te maama is amey zin wey iney zin ne ebpengesawa te vahi ne zutun egkesevaha sikandan.’ ⁶Ne tenedg kayi,” ke si Jesus, “kenè en maan dutun dezuwa he etew haazà is teleesawa, kekenà, sevaha zà, ne tenedg kayi zaan kenà egkehimu he ipedsuwey te etew is midsevaha te Megbevayà.” ⁷Ne mid-uman med-insà is minge Perisiyu te, “Ne maan is intugut ni Moises diyà te maama he vegayi zin dà is esawa zin te kemetuuzan te kebpekidsuwey emun egkesuatan din he meengkezi zin haazà is esawa zin?” ⁸Ne midtavak si Jesus te, “Intugut ni Moises is kedsuwayi niw te esawa niw su geina te edsumpeliten niw is penurù, iyan, dengan te kedlimbaga te langun, wazà itugut heini te Megbevayà is kebpekedsuwey te teleesawa. ⁹Ne tenedg kayi egkegiyen ku keniyu he ke zuen maama he ed-engkezan din is esawa zin he wazà sikandin is maama selselai zutun te esawa zin ne ed-uman ebpengesawa, ne haazà he maama, ebpekesalà dutun te nehuna he esawa zin tenedg dutun te kebpingesawa zin.”

¹⁰Ne zutun migkagi is minge sumusundan ni Jesus te, “Emun iyan bes heini egkeulaula te telteleesawa meupiya pa ke kenà ebpees-eseweey is etew.” ¹¹Ne midtavak si Jesus te, “Duen minge etew he imbanglis kandan te Megbevayà is kenà ebpekesawa emun maama, ne kenà egkeesawa emun bahi; ne meupiya iyan haazà diyà te kandan, iyan, kenà meupiya te langun. ¹²Su kenè en ed-iring-iring is ketezengan te etew ke maan is kenè dan ebpengesawa wey egkeesawa. Is duma, kenà ebpekesawa wey egkeesawa su iyan en haazà kegkeetew-etew zan; ne is duma zaan tenedg te migkapun; ne is duma pa, kenà ebpekesawa wey egkeesawa su wey zan metuman is insugù kandan te Megbevayà tenedg te kedhadi din. Sikan is ebpekezawat te kenè din kebpingesawa, wey ke kenè din kebpeesawa, ne meupiya ke edewaten din en.”

Si Jesus wey kes Dezeisey he Menge Vatà

(Mateo 19:13-15; Marcos 10:13-16; Lucas 18:15-17)

¹³Duen minge vatà he mid-uwit te minge etew ziyà te ki Jesus wey zin mezepeneti te palad din wey mepenubtuvazi. Ne midawey heini te minge sumusundan din. ¹⁴Iyan, migkagi si Jesus dutun te, “Iphendini

niw te kediey heeyan is menge vatà; ne kenè niw zewaya su is etew he zuen din kedsarig he iring te kedsarig te vatà ne iyan ebpekepahadi te Megbevayà.” ¹⁵Ne midepenetan din haazà is menge vatà ne mibpenubtuvazan din ne hein nepasad din haazà, ne mid-awà dutun.

Sikan is Sepian he Etew

(Mateo 19:16-30; Marcos 10:17-31; Lucas 18:18-30)

¹⁶Duen menguhed he etew he mid-uvey ziyà te ki Jesus he ed-insà te, “He Menunudlù, hengkey is meupiya he ed-ul-ulahan ku wey a mevegayi te untung he wazà pidtamanan?” ¹⁷Ne midtavak si Jesus te, “Maan is id-insè nu kedì is meupiya he ed-ul-ulahan he sebevaha zè man is ed-ulaula te meupiya ne wazè en дума, kekenà, iyan dà is Megbevayà. Ke egkesuat ka he mevegayi ka te untung he wazè din pidtamanan, tumana nu is menge sugù te Megbevayà.” ¹⁸Ne mid-insà haazà is etew te, “Hengkey he menge sugù?” Ne midtavak si Jesus te, “Kenè ka mebunù; kenè nu selselai is esawa nu; kenè ka penakew; kenè ka tarùtarù; ¹⁹tehuza nu is amey nu wey iney nu; wey purungi nu is дума nu; isipa nu sikandin he iring te kenikew en he gehinawa.” ²⁰Ne migkagi haazà is etew te, “Is langun kenian, ne mibentayan ku; hengkey pa is kurang ku he ebpeveelan kedì?” ²¹Ne migkagi si Jesus te, “Emun edhegeten nu pa, uli ka ne ivelegyè nu is langun he menge azen nu, ne is halin, ibpemegey nu ziyà te menge egkengeayuyau, ne edsepian ka ziyà te langit. Ne ke egkeipus nu heeyan likù ka zini wey ka mekesundan kediey.” ²²Ne hein nezineg heini zutun te menguhed he etew, ne mid-uli he utew mibmesakit is gehinawa zin su utew zekelà is ketigeyunan din.

²³Ne zutun migkagi si Jesus diyà te menge sumusundan din te, “Utew meregen te sepian he etew is kebpesakup din te Megbevayà wey mehedii sikandin. ²⁴Egkegiyen ku keniyu he kenè din egkehimu. Melemu pa te kemilyu is kedseled din diyà te vudsi te ragam kenà te sepian he etew is kebpesakup din te Megbevayà wey sikandin mehedii.” ²⁵Ne hein nezineg heini te menge sumusundan din utew zan neinuinu, ne ke sikandan te, “Emun kenà egkehimu te sepian, ne kenè bes egkehimu te minsan hentei is ked-angken te untung he wazà pidtamanan.” ²⁶Ne zutun midtengtengan sikandan ni Jesus te egkagi te, “Kenà iyan egkehimu te etew; iyan, egkehimu mulà te Megbevayà he ibpaangken din is etew te untung he wazà pidtamanan su egkehimu zin is langun.”

²⁷Ne zutun migkagi si Pedro te, “Ahaa nu man, mid-ewaan dey is langun he menge azen dey wey key mekesunud kenikew. Ne hengkey is idsuhul kenami?” ²⁸Ne midtavak dutun si Jesus te, “Benar heini is egkegiyen ku, siak is Kakey te Menusiyà, mekegegehem a keuzemà te kedhadì ku emun egkevegu en is langun; ne sikiyu is menge sumusundan ku, egkehedian niw zaan is menge kevuwazan te sepulù wey zezuwa he

anak ni Israyil. ²⁹Ne is minsan hentei he mid-ewaan din is baley zin, menge suled din, amey zin, iney zin, anak din, wey tanè din su edsunud sikandin kediey, egkezawat din is kenenggatus egketakep haazà is mid-ewaan din ne liyu zutun ibegey kandin is untung he wazà pidtemanana. ³⁰Iyan, mezakel is menge etew guntaan he henduen be te zekelà is pid-etawan dan, iyan, utew minus is pid-etawan dan keuzemà. Ne mezakel zaan is etew guntaan he utew minus is pid-etawan dan, iyan, keuzemà, utew zekelà is pid-etawan dan,” ke sikandin.

Is Menge Sinuhulan

20 ¹Ne migkagi si Jesus te, “Is kedhadi te Megbevayà he ziyà te langit, iring te etew he zuen din menge pinemula he gawed he egngезanan te paras. Ne midselemselem haazà is etew mebpengahà te etew he edsuhulan din he ibpeterebahu zin dutun te perasan din. ²Is aney he nengeehè din, mid-uyun dan he ebeyazan din is uman sevaha kandan te sengeelad he pelata su iyan haazà neleyaman he suhul te sevaha he etew te sengeandew. Ne zutun impepuun din en haazà is menge etew he edsuhulan din ipeterebahu zutun te perasan din. ³Ne hein liwazè en ebpemenahik is andew zutun, midlikù sikandin mebpengahà te etew. Ne ziyà te tiyenggiyan neehè din dutun is menge etew he wazà mibpeterebahu kandan. ⁴Ne migkegiyan din haazà is menge etew te, ‘Terebahu kew ziyà te perasan ku ne edsuhulan ku sikiyu te hustu.’ ⁵Ne midtereбahu haazà is menge etew. Ne hein neudtu en is andew zutun, midlikù en maan haazà is etew pehendutun te tiyenggiyan. Ne iring din ded hein liwazà ebpenaug is andew. ⁶Ne hein megaan en edsanlep is andew, midlikù en maan sikandin dutun te tiyenggiyan. Ne neehè din dutun is menge etew he wazè dan terebahu, ne migkegiyan din te, ‘Maan is tekew kew en kayi ed-uubpaubpà te egkehepunan en ne kenè kew edtereбahu?’ ⁷Ne midtavak dan te, ‘Geina te wazà ebpeterebahu kenami.’ Ne migkagi haazà is etew te, ‘Terebahu kew ziyà te perasan ku.’

⁸Ne hein mezukilem en migkegiyan dutun te etew is sinerigan din te, ‘Umawa nu sikandan is ebpemenerebahu ne suhuli nu. Iyan nu hunai te edsuhul sikan is nengehuziyan, ne human sikan is nengehuna.’ ⁹Ne sikan is nemekepuun meketerebahu hein megaan en edsanlep is andew, midsuhulan din te tigsengeelad he pelata. ¹⁰Ne hein iyan en edsuhulan sikan is nengehuna zutun, nekeperateng dan he lavew pa te insuhul zutun te utew nengehuziyan he neketerebahu is idsuhul kandan, iyan, tigsengeelad ded daan he pelata is insuhul kandan. ¹¹Umba hein edewaten dan en haazà is suhul kandan, ne neepes dan ne migkegiyan dan haazà is etew he mibpeterebahu kandan te, ¹²‘Sengeuras dà is kedtereбahu kayi te nengehuziyan, ne sikami, ne tivuuk he andew is ked-antus dey te utew meinit, ne imped-iiring nu zà is suhul zey te langun!’

¹³Ne migkegiyan dutun te etew is sevaha kandan te, ‘Geli, wazè ku sikiyu lupigi. Su is mid-ulaula ku ne iyan neuyunan tew he tigsengeelad he pelata is idsuhul ku te uman sevaha keniyu. ¹⁴Dewata niw en heeyan is idsuhul ku keniyu ne uli kew su egkesuatan ku he mesuhuli heini is nengehuziyan te iring te suhul ku keniyu. ¹⁵Kenè be egkehimu he iyan a ebayàbayà te kediey he selapi? Egkesina kew ve kandan tenged te ketulanged ku?’” ¹⁶Ne migkagi si Jesus te, “Is egkengehuziyan guntaan ne iyan egkengehuna keuzemà, ne sikan is egkengehuna guntaan ne iyan maan egkengehuziyan keuzemà.”

Is Iketelu he Kebpesevuta ni Jesus te Kemetayen Din
(*Mateo 20:17-19; Marcos 10:32-34; Lucas 18:31-34*)

¹⁷Ne te kedtekezeg eni Jesus diyà te Hiruselim, migkegiyan din sikan is sepulù wey zezuwa he sumusundan din he medtapid sikandan su zuen egkegiyan din kandan dutun te ziyè dan pa te zalan. ¹⁸Ne ke sikandin te, “Netuenan niw he edhendiyè kiw te Hiruselim. Ne emun ebpekeuma kiw zutun, siak is Kakey te Menusiyà, ibpalad a ziyà te menge punuan he memumuhat wey menge menunudlù te kesuguan. Ne egkeuyun dan he ebpehimentayan a, ¹⁹ne ibpalad e zan daan diyà te menge etew he kenà menge Hudiyu. Ne is menge etew he kenà menge Hudiyu, ne ed-iringen e zan te velvelayen, ebugelen e zan, ne idransang e zan te krus su edhimentayan a. Ne seled te tetelu he andew zutun, ebenhawen a te Megbevayà.”

Is Kedhangyù te Iney ni Santiago wey ni Juan
(*Mateo 20:20-28; Marcos 10:35-45*)

²⁰Ne zutun mid-uey ziyà te ki Jesus is esawa ni Sibidiyu zuma is dezuwa he anak din he maama. Midluhud sikandin diyà te etuvangan ni Jesus su zuen ebuyuen din. ²¹Ne mid-insaan ni Jesus te, “Hengkey is egkesuatan nu?” Ne midtavak haazà is bahi te, “Heini is dezuwa he anak ku he sumusundan nu, egkesuatan ku he, keuzemà ke ebpinuu ke en diyà te pinuwè nu te kedhadì, ibpepinuu nu zaan sikandan, is sevaha ziyà dapit te egkekewanan nu, ne is sevaha, diyà dapit te egkegivang nu.” ²²Ne migkegiyan ni Jesus haazà is dezuwa te, “Wazè niw mesavut ke hengkey is edhengyuen niw. Egkeantus niw ve is merasey he ibpaantus kedi?” Ne midtavak dan is dezuwa te, “Uya, egkeantus dey.” ²³Ne ke si Jesus te, “Benar iyan he ibpaantus keniyu is iring te ibpaantus kedi, iyan, kenà a iyan ebpili ke hentei is ibpepinuu ziyà te zapit te egkekewanan ku wey ziyà te zapit te egkegivang ku, su iyan dà ebpekepinuu zutun sikan is etew he midtegenahan te Amey ku he Megbevayà.”

²⁴Ne hein nezineg haazà duen te zuma zan he sepulù he sumusundan, wazè dan ikesuat is mibeelan dutun te zezuwa he telehazi. ²⁵Ne tenged

dutun mid-umew ni Jesus sikandan langun ne ke sikandin te, “Netuenan ta he is menge punuan te menge inged, ne utew zan memevurut wey is menge zatù dan ne edatùdatù dà sikandan is layun ebmandar te menge etew. ²⁶Iyan, sikiyu mulà, kenà egkehimu is iring kayi ziyàn te keniyu. Su ke zuen sevaha keniyu he egkesuat he mekelavew, kinahanglan he suluguen sikandin te langun he menge zuma zin; ²⁷ne emun duen sevaha keniyu he egkesuat he iyan sikandin ebpeketikangen te langun keniyu, kinahanglan he iyan sikandin mebbekevavà te langun. ²⁸Su iring te siak, is Kakey te Menusiyà, kenà iyan inhendini ku te kelibutan is wey a metevangi te menge etew, kekenà, wey a meketavang ne wey a zaan mekepehimatey wey ku mevelukasi is mezakel he menge etew.”

Is Kebewii te Zezuwa he Lakap

(Mateo 20:29-34; Marcos 10:46-52; Lucas 18:35-43)

²⁹Ne hein ed-awè dan en diyà te inged he Hiriku utew mezakel he menge etew is nemenduma ki Jesus. ³⁰Ne zuen dezuwa he lakap he ebpimpinuu diyà te kilid te zalan. Ne hein netuenan dan he edsagad si Jesus dutun, mid-umew zan is egkagi te, “He Zatù, kehizuwi key kenikew su iyan ka sikan is netagnà he kevuwazan ni Hadì David!” ³¹Ne nepeukan sikandan te menge etew zutun ne migkegiyan sikandan te menge etew he med-engked dan he ebpengumew. Iyan, nasi en mesugù sikandan is ebpengumew te, “He Nengazen he kevuwazan ni David, kehizuwi key!” ³²Ne zutun midteren si Jesus ne migkagi ziyà te kandan te, “Hengkey is kinahanglan niw he ed-ul-ulahan ku keniyu?” ³³Ne midtavak dan te, “Datù, iyan kinahanglan dey is mekeehè key.” ³⁴Ne nehizuwan sikandan ni Jesus ne midampè din is menge mata zan. Ne zutundutun nepuwasan is ked-ehè dan, ne miduma zan ki Jesus.

Is Kedhendiyà ni Jesus te Hiruselim

(Mateo 21:1-11; Marcos 11:1-11; Lucas 19:28-40; Juan 12:12-19)

21 ¹Ne hein uvey zan en diyà te inged he Hiruselim su uvey zan te inged he Bitpagi, ne uvey zaan te vuvungan he egngезanan te Ulivuwan, migkegiyan ni Jesus is dezuwa zutun te sumusundan din, ²ke sikandin te, “Hendutun kew te inged he egkeumahan tew. Ne egkeehè niw zutun is intagkes he asnu he zuen din nati. Hekazi niw ne uwita niw zini zuma is nati zin. ³Ne ke zuen ed-insà keniyu ke maan is edhekazan niw, ne ke sikiyu te, ‘Egkinehenglanen heini te egalen tew he si Jesus.’ Ne segugunà idtugut dutun te ed-insà keniyu he uwita niw haazà is asnu zuma is nati zin,” ke si Jesus.

⁴Umba egkeaula heini is migkagi ni Jesus su egketuman kes netagnà te ebpeneuven te Megbevayà dengan he edhenduen te,

⁵“Tudtuli niw is menge meginged

diyà te Siyun te,
 ‘Ebpekeume en guntaan is hadì niw.
 Kenà meinit is kedhadì din keniyu
 ne ed-untud sikandin te nati te asnu;’ ”
 iyan heini lalag dutun te ebpeneuven.

⁶Ne migenat haazà is midsugù ni Jesus ne mid-ulaula zan is insugù din. ⁷Ne hein neuwit dan en haazà diyà te ki Jesus is asnu wey nati zin, mibelhenan dan te minge kumbalè dan ne mid-untud dutun si Jesus. ⁸Ne is utew mezakel he minge etew zutun, tenged te zekelà is kedtahud dan ki Jesus impendempas dan is impenampud dan diyà te ibayà ni Jesus. Ne is duma zutun, mibpenamped dan te minge zehunen he rasang ne in-eneb dan ipendempas dutun te zalan he ibayà ni Jesus. ⁹Ne mezakel he minge etew is midhuna ki Jesus, ne mezakel zaan is ebpemeninundug kandin, ne ke sikandan is ebpemengulahì te, “Edtehuzen tew is kevuwan ni Hadì David. Deliga is nekeuma he midsugù te Nengazen. Sikiyu is diyà te langit, tehuza niw zaan sikandin!”

¹⁰Ne hein nekeuma si Jesus diyà te Hiruselim, mibmegurub is minge meginged dutun. Ebpein-inseey zan ke, “Hentei sikandin?” ¹¹Ne midtavak is mezakel he minge etew he nemenduma ki Jesus te, “Iyan sikandin sikan is ebpeneuven te Megbevayà he si Jesus he tigNeserit diyà te Geliliya.”

Is Kedseled ni Jesus Diyà te Valey te Megbevayà

(Mateo 21:12-17; Marcos 11:15-19; Lucas 19:45-48; Juan 2:13-22)

¹²Ne midseled si Jesus diyà te Valey te Megbevayà ne mibpenegseg din dutun is minge limbungan he etew zutun he ebpememelegyà wey ebpememasa. Mibpemiley zin is minge lemisahan te ebpemenliwà te minge selapè wey is minge pinuuwà te minge ebpememelegyà te ibpemuhat he merepatik. ¹³Migkagi sikandin diyà te kandan te, “Duen insurat he Lalag te Megbevayà he edhenduen te, ‘Is baley ku, ne eggezanan he valey he elempuanan.’ Ne sikiyu,” ke si Jesus, “nasì niw veeli he ubpeey te ebpemenlimbung.”

¹⁴Ne nemenelavuk kandin dutun te Valey te Megbevayà is minge lakap wey minge piang ne nengeulian din sikandan is langun. ¹⁵Nengepauk is minge lavew he memumuhat wey minge menunudlù te kesuguan dutun hein neehè dan is egkengein-inuwan he mibeelan ni Jesus wey nezineg dan is minge vatà diyà te Valey te Megbevayà he ebpemenhabet egkagi te, “Tehuza is kevuwan ni Hadì David!” ¹⁶Ne tenged dutun migkagi zan diyà te ki Jesus is egkengepauk te, “Egkezineg nu ve heini is egkegiyen dan?” Ne midtavak si Jesus te, “Egkezineg ku. Wazè niw ves mevasa sikan is insurat he tagnà te ebpeneuven te Megbevayà he edhenduen te, ‘Mibpenurù nu is minge vatà wey mehustu is kedeliga zan kenikew.’ ”

¹⁷Ne mid-ewaan din sikandan ne mid-awà sikandin dutun te inged he Hiruselim ne midhendiyà te inged he Bitanya, ne zutun medhizegà.

Is Kegkegangu te Kayu he Igira

(Mateo 21:18-22; Marcos 11:12-14,20-24)

¹⁸Ne te nepawà dutun te ziyà ensi Jesus te zalan su edlikù dan diyà te Hiruselim, egkevital sikandin. ¹⁹Ne te uvey zutun te zalan neehè din is kayu he igira. Mibeyaan din haazà, iyan, wazà begas he neehè din su menge zahun dà. Ne migkegiyan din haazà is kayu te, “Kenè ke en mebegas minsan keenu.” Ne wazà metegtegaad nelay-ub haazà is kayu. ²⁰Nengeinuinu utew is menge sumusundan ni Jesus dutun hein neehè dan is nehitavù dutun te kayu. Ne ke sikandan te, “Maan is segugunà nelay-ub heini is kayu he igira?” ²¹Ne midtavak si Jesus te, “Tipigi niw heini ziyà te isip niw he ke edsarig kew te Megbevayà te kenà duwazuwa, egkehimu niw heini is midhimu ku kayi te kayu he igira. Ne kenà kayi zà taman su minsan pa ke ekegiyan niw heeyan is buntud te, ‘Med-awè ka kenian ne agbur ka ziyà te zagat,’ ne ebpemingegen kew zin. ²²Emun edsarig kew te Megbevayà, ke ed-ampù kew, egkezawat niw is ebuyuen niw.”

Is Ketenged ni Jesus

(Mateo 21:23-27; Marcos 11:27-33; Lucas 20:1-8)

²³Midlikù si Jesus diyà te simbahan he Valey te Megbevayà ne mibpenurù din is menge etew zutun. Ne nemekeuma is menge lavew he memumuhat wey menge ebmegurangan te menge Hudiyu zutun ne mid-insè dan ki Jesus te, “Heini is langun he ed-ul-ulahan nu zini te simbahan, duen nu ve ketenged te ked-ulaula kayi, wey hentei is mibegey kenikew te ketenged wey nu meulaula heini?” ²⁴Ne midtavak si Jesus te, “Duen daan id-insè ku keniyu, ne emun edtevaken a keniyu, edtevaken ku zaan sikiyu ke hengkey is kediey he ketenged te ked-ulaula ku kayi te langun. ²⁵Hentei is mibegey ki Juan Megbebewtismu te ketenged din te kebpmewtismu? Megbevayà be wey ke etew zà?” Ne zutun mibpein-inseey sikandan is egkagi te, “Emun egkegiyen tew he Megbevayà, ed-insà sikandin ke maan is wazè tew tuuwi si Juan. ²⁶Ne emun egkegiyen ta he etew zà, ebpemiligru ki te menge etew su midtuu zan he ebpeneuven si Juan te Megbevayà.” ²⁷Umba, iyan tavak dan dutun ki Jesus is, “Hanew ta.” Ne migkagi si Jesus diyà te kandan te, “Kenè ku zaan egkegiyen keniyu ke hengkey is ketenged ku te kebaal kayi te langun,” ke sikandin.

Is Dezuwa he Midsugù

²⁸Ne mid-uman megkagi si Jesus diyà te kandan te, “Hengkey is isip niw kayi? Duen etew he zezuwa is anak din he maama. Mibeyaan din

is kakey ne migkegiyan din te, ‘Diyè ka guntaan, Mama, terebahu te perasan.’ ²⁹Ne midtavak haazà is anak din te, ‘Es! kenà a egkesuat.’ Asal netegtegaad dutun neisip-isip din haazà, ne mibmezaat is gehinawa zin dutun te keberawa zin te amey zin ne zutun midtuman din haazà is ebpevelan kandin. ³⁰Ne mibeyaan daan dutun te etew is hazi ne iyan ded daan insugù din haazà is insugù din duen te sevaha he anak din. Ne mid-uya haazà is hazi zutun te migkagi kandin, iyan, wazè din beeli haazà is ebpevelan kandin.” ³¹Ne ke si Jesus te, “Hentei zutun te zezuwa he telesuled is hustu he neketuman te sugù te Amey zan?” Ne ke sikandan diyà te ki Jesus te, “Iyan haazà is kakey.” Ne ke si Jesus dutun te, “Benar iyan he edhuna keniyu is menge mezaat he etew iring te menge menunukut te vuhis wey is menge vahi he ibpenapì dan is dengge dan su edewaten sikandan te Megbevayà wey zin mehedii kenà sikiyu. ³²Su nekeuma si Juan, ne impeehè din keniyu is paagi wey kew mebmetazeng ne wazè niw sikandin tuuwi, iyan, midtuuwan mulà sikandin te menge limbungan he menunukut wey menge vahi he ebpenapì te zengeg dan. Ne minsan te netuenan niw heini, wazè niw iniyugi is memezaat he ulaula ne wazè kew zaan medtuu kandin.”

Is Sempità Mehitenged te Impeelima te Perasan
(*Mateo 21:33-46; Marcos 12:1-12; Lucas 20:9-19*)

³³Ne migkagi si Jesus te, “Peminega niw is selakew pa he sempità he egkegiyen ku keniyu mehitenged te ed-ul-ulahan te Megbevayà. Duen etew he zuen din pemuleey he mibpemulaan din te menge gawed he paras. Mid-alad din haazà, ne mibudsiyan din te meluag is dekelà he watu su ebeelan din he keresà te wahig dutun te vegas te paras. Ne midlelawig sikandin te ebpeubpaan din te ebantey zutun te perasan. Ne mibpeelimahan din haazà is perasan ne zutun midhendiyà te sengeginhedian. ³⁴Ne hein tiragun en dutun, midsugù din is menge suluguen din he ibpekuwa te vahin din dutun te perasan din. ³⁵Ne hein nemekeuma haazà is menge suluguen din, mibpemugel zutun te impemeelima zin te perasan is sevaha zutun. Ne is sevaha, midhimetayan dan, ne is sevaha pa zutun, midtuleng dan te watu. ³⁶Ne mid-uman medsugù heini is etew te mezakel pa kenà is nengehuna he midsugù din. Iyan, iyan ded gihapun mid-ulaula zutun te impemeelima zin te perasan is mid-ulaula zan dutun te nengehuna he sugù din. ³⁷Ne te ketepusan, midsugù kayi te etew is anak din, su egkeisip din is, ‘Kenà egkehimu he kenè dan edtehuzen is anak ku,’ ke sikandin. ³⁸Iyan, hein naahà dutun te impemeelima zin te perasan haazà is anak din, migkagi zan te, ‘Na, iyan en heini sikan is anak din; kuwa kew en su edhimetayan tew ne egkeangkan tew en heini is perasan din.’ ³⁹Ne migewezan dan haazà ne intimbang dan diyà te gawas dutun te perasan ne midhimetayan dan.”

⁴⁰Ne ke si Jesus te, “Emun ebpekeuma sikan is tegigaked dutun te perasan, hengkey is ed-ul-olahan din dutun te impemeelima zin dutun te perasan?” ⁴¹Ne midtavak dan te, “Iyan is: ebpenhimetayan din haazà is impemeelima zin ne ebpeelimahan din maan haazà is perasan te selakew en he menge etew he ebegey mulà te vahin ke egkeuma is tiragun.” ⁴²Ne migkagi si Jesus te, “Siguradu nevasa niw en sikan is insurat he Lalag te Megbevayà he edhendien te,

‘Sikan is batu he himan te valey,
mid-engkezan te menge pandey
su kunaan dan ke wazè din pulus.
Ne heini, nehimu en guntaan he watu
he iyan dà ebpekepurung te valey.
Ulaula heini te Nengazen,
ne igkeinuinu tew utew.’

⁴³Umba,” ke si Jesus, “benar iyan he kenè kew en maan is menge Hudiyu edhedian te Megbevayà su iyan din edhedian is menge etew he edtuman te egkesuatan din. ⁴⁴Ne haazà he watu, *ke và dà egkegiya, iyan sikandin kes mibpili he hadi, ne emun egkeulugan te etew haazà, egkepurung egkerupet is egkeulug dutun. Iyan, ke zuen etew he egkeulugan dutun te watu ne egkepurung egkeapug is lawa zutun te egkeulugan.*”

⁴⁵Ne heini is menge sempità ni Jesus, nezineg te menge Perisiyu wey menge lavew he memumuhat ne nesavut dan he iyan din sikandan egkegiyen. ⁴⁶Iyan, hein ed-isipen dan en edekepa si Jesus, kenè dan egkehimu su egkehandek dan te mezakel he menge etew su midtuu is menge etew he ebpeneuven si Jesus te Megbevayà.

Is Sempità Mehitenged te Keemuran

(Mateo 22:1-14; Lucas 14:15-24)

22 ¹Ne mid-uman mebpenerù si Jesus te menge etew pinaagi te menge sempità. ²Ke sikandin te, “Is kedhadì te Megbevayà he ziyà te langit, ne iring te hadi he midtukud te zekelà he keemuran su ebpengesawa is anak din. ³Midsugù din is menge suluguen din he ibpetukew sikan is menge etew he migkegiyan he zaan he ipetelavuk dan en dutun te keemuran. Iyan, is menge etew, wazè dan itetepian haazà is menge suluguen. ⁴Ne mid-uman medsugù haazà is hadi te selakew en he menge suluguen din ne ke sikandin te, ‘Kegiya niw sikan is menge etew he nelapè ku en is menge vaka wey menge impemelambù ku he nati, ne nelemise en is egkeenen. Ne medhendini en sikandan.’ ⁵Iyan, henduen be te wazà mekezineg haazà is menge etew. Wazè dan iniyugi is menge vaal zan. Is sevaha, ne ziyà te pemuleey zin ne is sevaha, ne ziyà te tindakan din. ⁶Ne is duma he etew zutun, migewezan dan haazà is midsugù te hadi, ne mibpemugel zan ne human dan himetayi. ⁷Ne zutun

utew nepauk haazà is hadi. Midsugù din is minge sundaru zin ne sikan is nemumunù, mibpenhimetayan te minge sundaru ne mibinsulan dan is inged dutun te mibpenhimetayan dan. ⁸Ne midtigum te hadi is minge suluguen din ne ke sikandin te, 'Nelemise en is keenen, iyan, sikan is ibpemetelavuk ku, kenè bes dait kayi te keemuran ku. ⁹Umba, ikula niw is minge kersada he mezakel is minge etew zuen, ne minsan pira he etew is egkeehè niw ne ipehendini niw.' ¹⁰Ne migenat haazà is minge suluguen din ne mid-ikul zan is minge kersada, ne is langun he etew he neuma zan, meupiya is ulaula zin se mezaat is ulaula zin, ne mid-umbita zan. Ne nepenù haazà te etew is turugan te hadi.

¹¹Ne zutun te kedseled te hadi su ed-ahaan din is nengetigum he etew, neehè din dutun is etew he wazà medsun-ud te bisti te eseweey. ¹²Ne ke sikandin te, 'He Mama, maan is nekeaku ka he edtelavuk kayi te keemuran he wazè ka medsun-ud te bisti te eseweey?' Iyan, wazà igketavak dutun te etew. ¹³Ne insugù dutun te hadi te minge suluguen din te, 'Bekusa niw is minge velad wey paa zin ne itimbag niw sikandin diyà te gawas, diyà te merusirem he utew meziyù. Ne zutun sikandin ebpekengingitel ne ebpekekulahì tenged te utew sikandin ebpekendsendit.' ¹⁴Ne mid-uman mekgagi si Jesus te, "Mezakel he minge etew is midtawag te Megbevayà wey zin egkehedii, iyan, mezelang dà is egkepili din."

Is Kebayad te Vuhis Diyà te Hadì te Ruma
(*Mateo 22:15-22; Marcos 12:13-17; Lucas 20:20-26*)

¹⁵Ne zutun mid-ewaan si Jesus te minge Perisiyu su ed-uyunan dan ke hengkey is kegkepulutikahi zan ki Jesus wey mehimu he ikesumbung dan. ¹⁶Ne midsugù dan diyà te ki Jesus is minge sumusundan dan wey minge sakup te upakat he midtukud ni Hirudis. Ne haazà is midsugù dan, migkagi ziyà te ki Jesus te, "Menunudlù, netuenan dey he metazeng ka he etew; su ibpenurù nu is tutuu he ebpevelan kenitew te Megbevayà, ne is lalag te minge etew, kenà ebpekehalin te ibpenurù nu tenged te wazè nu ibpelavi he minsan hentei. ¹⁷Umba, kegiyi key kenikew, ke ebpekesupak ki ve te kesuguan tew ke ebayad ki te vuhis diyà te hadi tew he ziyà te inged he Ruma?" ¹⁸Ne netuenan ni Jesus ke hengkey is mezaat he ziyà te gehinawa zan ne ke sikandin te, "Teruen kew, maan is egezaman a keniyu? ¹⁹Ipeehè niw kediey is selapì he ibayad niw te vuhis." Ne impeehè dan kandin is selapì. ²⁰Ne mid-insà si Jesus te, "Hentei ki zagwey wey ngazan heini is nekesurat kayi?" ²¹Ne ke sikandan te, "Dagwey wey ngazan te hadi diyà te Ruma." Ne migkagi si Jesus te, "Ne emun kandin, ne iyan egkesuatan din, ivegey niw ziya te kandin, ne ivegey niw zaan diyà te Megbevayà is kandin he azen," ke sikandin. ²²Ne hein nezineg dan haazà is lalag ni Jesus, utew zan nengeinuinu ne mid-ewaan dan si Jesus ne migawas dan dutun.

Is Ketudluanan Mehitenged te Kegkevanhew
(*Mateo 22:23-33; Marcos 12:18-27; Lucas 20:27-40*)

²³Ne netegtegaad dutun, duen menge Sedusiyu he midhendiyà te ki Jesus. Is menge Sedusiyu, ne iyan is menge Hudiyu he edtuu he kenà egkengevanhew keuzemà is minsan hentei. ²⁴Ne migkegiyan dan si Jesus te, “Menunudlù, impenurù dengan ni Moises he emun duen maama he zuen din esawa ne ebpatay haazà is maama, kinahanglan he ebpemeluwen te suled dutun te maama haazà is ipag din su wey mevuwad haazà is minatey pinaagi zutun te suled din. ^{25,26}Ne zengan duen dini pitu he menge maama he teltelehazi. Mibpengesawa is kakey, iyan, minatey he wazà med-anak. Ne mibpemalu haazà is bahi te hazi zutun te minatey. Ne minatey zaan haazà is hazi he wazà mevuwad; ne haazà is bahi, mibpemalu en maan te hazi zutun te minatey. Ne iring din ded daan, minatey haazà is mibpemalu zutun te vahi he wazà mevuwad. Ne henduen dà duen su pudu nekeesawa zutun te vahi haazà is teltelesuled he pudu zin ingkevalu, iyan, nemematey zan maamin he wazà mevuwad. ²⁷Ne te ketepusan, minatey zaan haazà is bahi. ²⁸Ne keuzemà te andew ke egkengevanhew en is langun, hentei is hustu he tegiesawa zutun te vahi? Su pudu nekeesawa kandin haazà is teltelesuled.”

²⁹Ne midtavak kandan si Jesus te, “Nengesayep kew utew! Iyan is wazè niw mesavut sikan is ingkengesurat he menge Lalag te Megbevayà ne wazè niw zaan mesavut he mekegegehem is Megbevayà te kebpemanhew te menge minatey. ³⁰Su emun egkengevanhew en is menge minatey ne iring en sikandan te menge velinsuguen te Megbevayà he ziyà te langit he kenà ebpees-esewey is menge maama wey vahi. ³¹Eguguzan ku sikiyu wey kew mevenari he egkevanhew is menge minatey. Wazè niw ves mevasa sikan is insurat he Lalag keniyu te Megbevayà? ³²Su minsan te minatey en dutun si Abraham, si Isaak, wey si Hakub, migkagi is Megbevayà te, ‘Iyan a Megbevayà he ed-ezapen ni Abraham wey ni Isaak wey ni Hakub,’ *he ke va dà egkegiya, kemulu zan pa ed-azap te Megbevayà; su is ed-azap kandin, minsan ke ebpatay, duen din pa untung.*” ³³Ne hein nezineg heini te menge mezakel he etew, nengeinuinu zan utew zutun te kebbenurù din.

Is Utew Lavew he Sugù
(*Mateo 22:34-40; Marcos 12:28-34; Lucas 10:25-28*)

³⁴Ne hein netuenan dutun te menge Perisiyu he wazà nehimu te menge Sedusiyu ziyà te ki Jesus he igkepezekepa zan kandin, midtigum sikandan. ³⁵Ne is sevaha zutun, menunudlù te kesuguan. Ne migezaman din dekepa is ketezengan ni Jesus pinaagi te menge insà. ³⁶“Menunudlù,”

ke sikandin, “hengkey is lavew he sugù duen te kesuguan?” ³⁷Ne midtavak si Jesus te, “Kinahanglan he iyan nu mahala ziyà te gehinawa nu is Megbevayà he Nengazen tew. Iyan nu sikandin mahala ziyà te gehinawa nu, isip nu, wey kedsavut nu. ³⁸Iyan heini lavew he sugù he edhuna te langun. ³⁹Ne iring din ded daan is ikezuwa he iyan heini: ‘Kinahanglan he mahala nu is duma nu; isipa nu sikandin he iring te kenikew en he gehinawa.’ ⁴⁰Is tivuuk he kesuguan he imbilinbilin kenitew ni Moises wey is menge penurù te menge ebpeneuven dengan te Megbevayà, kayi ebpun te zezuwa he sugù,” ke sikandin.

Is Hadì he Mibpilì te Megbevayà he Kevuwazan ni David
(*Mateo 22:41-46; Marcos 12:35-37; Lucas 20:41-44*)

⁴¹Ne hein midtigum is menge Perisiyu, mid-insaan sikandan ni Jesus te, ⁴²“Hengkey is isip niw? Kes mibpilì te Megbevayà he ibpahadì, hentei ki kevuwazan sikandin?” Ne midtavak dan te, “Kevuwazan sikandin ni Hadì David.” ⁴³“Ne emun iyan heeyan,” ke si Jesus, “maan is migkagi si David, pinaagi te ked-ulini kandin te Wagas he Mulin-ulin, he Nengazen din sikan is mibpilì te Megbevayà? Su migkagi zengan si David te, ⁴⁴‘Migkagi is Megbevayà diyà te Nengazen ku te, “Kayi ka pinuu te zapit te egkekewanan ku taman te kenè ku pa ibpeluhud diyà te kenikew is menge kuntada nu.” ’” ⁴⁵Ne ke si Jesus diyà te kandan te, “Emun migkagi ni David he Nengazen din sikan is ebperetengen he ibpahadì, egkehimu ve he kevuwazan dà duen ni David?” ⁴⁶Ne wazà neketavak ki Jesus dutun te minsan hengkey he menge insè din, ne puunè dà dutun wazè en maan nekeaku he ebpenginginsè pa maan kandin.

Is Ikemekehihizu te Menge Punuan
(*Mateo 23:1-39; Marcos 12:38-40; Lucas 11:37-54; 20:45-47*)

23 ¹Ne zutun migkagi si Jesus diyà te mezakel he menge etew wey ziyà te menge sumusundan din te, ²“Is menge menunudlù te kesuguan wey menge Perisiyu, insarig kandan is kebpenurù te kesuguan he imbilinbilin ni Moises. ³Umba, kinahanglan he ebentayan niw wey edtumanen niw is minsan hengkey he penurù dan keniya. Iyan, kenè niw iringi mulà is ulaula zan su kenè dan edtumanen is ibpenurù dan keniya. ⁴Utew mezakel is meregen he tulumanen he ibpetuman dan te menge etew, iyan, wazà minsan hengkey he idtavang dan dutun te menge etew wey meketuman haazà is etew zutun te ibpetuman dan. ⁵Mezakel is ed-ul-ulahan dan wey sikandan mezalig te menge etew su ibpeehè dan he edtumanen dan is sugù te Megbevayà pinaagi zà te ebped-eepizen dan he insurat he Lalag te Megbevayà he ibedbed dan diyà te velad dan wey ziyà te vuked dan, wey pinaagi te utew meluag he sidsid te kemisula zan. ⁶Iyan egkesuatan dan he utew zan tehuza ke edtelavuk

dan te keemuran; ne emun diyè dan te simbahan, egkesuatan dan he iyan sikandan ibpepinuu ziyà te ebpepinuuwan te lavew he menge etew. ⁷Utew ibmeupiya te gehinawa zan ke edtehuzen sikandan te menge etew ziyà te tiyenggiyan wey ke ed-umawen sikandan he ‘menunudlù.’ ⁸Kenè niw itugut he iyan id-umew keniyu is ‘menunudlù’ su teltelesuled kew is langun ne sebsevaha zà is menunudlù niw he iyan a. ⁹Kenè niw zaan gerari te ‘amey’ is minsan hentei kayi te kelibutan su sebsevaha zà is Amey niw he iyan is Megbevayà diyà te langit. ¹⁰Kenè niw zaan itugut he iyan id-umew keniyu is ‘egalen’ su siak is mibpilì te Megbevayà, iyan e zà egalen niw. ¹¹Ne is ed-isipen niw he lavew ziyà te keniyu, kinahanglan he egkehimu sikandin he sulugen niw te langun. ¹²Sikan is ebpelavew, edhimuwen te Megbevayà he egkelevawan sikandin te langun. Ne sikan is ed-isipen din he lavew kandin is minsan hentei keniyu, edhimuwen sikandin te Megbevayà he lavew te minsan hentei keniyu.

¹³Kehizu niw te menge menunudlù te kesuguan wey sikiyu is menge Perisiyu su tarù is kedtuu niw te Megbevayà! Su ke zuen etew he ibegey zin pezem is gehinawa zin diyà te hadi tew he Megbevayà, kenè niw edtugutan, ne kenè niw zaan ibpeveyveyaan is gehinawa niw te Megbevayà.

¹⁴Kehizu niw te menge menunudlù te kesuguan wey sikiyu is menge Perisiyu su tarù is kedtuu niw te Megbevayà! Edlimbungan niw is menge valu he vahi wey niw maangken is baley zutun te edlimbungan niw. Ne utew melugayad is ked-ampù niw he iyan paagi te kedtembuni niw te mezaat he mibeelan niw. Tenged kayi utew zekelà is silut keniyu te Megbevayà.

¹⁵Kehizu niw te menge menunudlù te kesuguan wey sikiyu is menge Perisiyu su tarù is kedtuu niw te Megbevayà! Edlayun kew te zagat ne edhipenawen niw is meluag he tanà wey niw mekabig is etew; ne is egkekabig niw, edhimuen niw he tuwas pa he zait sikandin he edsilutan diyà te Impirnu, kenà sikiyu.

¹⁶Kehizu niw, su iring kew te lakap he ed-agak te sengelelakap. Ibpénurù niw he ke zuen etew he ebpenaad ne ibpengumew-umew zin duen te zekelà he simbahan, egkehimu he kenè din edtumanen haazà he penaad. Ne ibpenurù niw zaan he emun iyan din ebpengum-umawen sikan is bulawan duen te simbahan, kenà egkehimu ke kenè din edtumanen haazà is penaad din. ¹⁷Menge lakap kew he tulebung! Su iyan bes lavew sikan is bulawan duen te Valey te Megbevayà! Kenà egkehimu! Su sikan is bulawan, iyan igketegui zin te gehem te Megbevayà su geina te nekeseled duen te Valey te Megbevayà. ¹⁸Ne ibpenurù niw zaan he ke zuen etew he ebpenaad, ne ke ibpengumew-umew zin duen te vangkù he ebpemuhatan diyà te Valey te Megbevayà, egkehimu he kenè din edtumanen is penaad. Iyan, emun iyan din ebpengum-umawen

sikan is impemuhat he ziyà mekesavuk te vangkù ne kenà egkehimu ke kenè din edtumanen is penaad din. ¹⁹Utew kew nelakap su iyan bes lavew is impemuhat? Kenà egkehimu, su iyan igketegui zin te gehem te Megbevayà sikan is bangkù he ebpemuhatan. ²⁰Ne tenged dutun, ke zuen ebpenaad, ne ebpengum-umawen din sikan is bangkù duen te seled te Valey te Megbevayà, kenà iyan dà sikan is bangkù egkeambit din, kekenà, elin sikan is impemuhat he zuen mekesavuk te vangkù. ²¹Iring din ded daan ke zuen etew he ebpengum-umawen din is Baley te Megbevayà, kenà iyan sikan is baley egkeambit din, kekenà, iyan is Megbevayà he zutun ed-ubpà. ²²Ne ke zuen etew he ebpenaad ne ebpengum-umawen din is langit, iyan tutuu he egkeumew zin sikan is pinuuwà te Megbevayà, ne emun egkeambit din sikan is pinuuwà te Megbevayà, iyan tutuu he egkeambit din is Megbevayà.

²³Kehizu niw te minge menunudlù te kesuguan wey sikiyu is minge Perisiyu, su tarù is kedtuu niw te Megbevayà! Ibegey niw te Megbevayà is ikepulù he vahin minsan te minge perehemut te egkeenen iring te yirbebuyna, anis, wey kuminu, iyan, kenè niw edtumanen is minge lavew pa he sugù iring te ked-ula-ula te metazeng, kegkehizu te zuma niw, wey kedtumana niw te minge penaad niw. Kinahanglan he ibegey niw is ikepulù, iyan, kenè niw zaan tegaka heini is minge lavew pa he sugù. ²⁴Iring kew te lakap he ed-agak te sengelelakap. Kenè niw egkeaku te ebaal is utew zeisey he salà, iyan, egkeekuwan niw mulà te ebaal is utew zekelà he salà.

²⁵Kehizu niw te minge menunudlù te kesuguan wey sikiyu is minge Perisiyu su tarù is kedtuu niw te Megbevayà! Ebpurangan niw ebentayi is minge vetasan niw, iyan, diyà te isip niw wey gehinawa niw ne zuen keheheramham wey kelelalung. Iring kew te vasu wey pinggan he nelumpiyuwan diyà te gawas, iyan, meremerik is diyà te seled. ²⁶Iring kew te lakap is minge Perisiyu! Lumpiyuwi niw hunai is idseled niw zutun ne human egkelumpiyu is tasa niw wey pinggan niw.

²⁷Kehizu niw, te minge menunudlù te kesuguan wey sikiyu is minge Perisiyu, su tarù is kedtuu niw te Megbevayà! Iring kew te valey he watu he iyan lungun he mibpintalan te meputi he zutun idsavuk is lawa te nemematey. Meupiya he ed-ahaan diyà te gawas, iyan, dutun te seled din ne minge tulan te minatey he nengeredak en. ²⁸Iring kew zutun su emun ed-ahaan kew te etew henduen be te meupiya is ulaula niw, iyan, diyà te gehinawa niw, dutun is kedtarùtarù wey kedsupak te sugù te Megbevayà.

²⁹Kehizu niw te minge menunudlù te kesuguan wey sikiyu is minge Perisiyu su tarù is kedtuu niw te Megbevayà! Midezeyanan niw is minge valey he watu he iyan inlungun niw te minge lawa te nemematey zengan he minge metazeng wey ebpemeneuven te Megbevayà. ³⁰Ne egkagi kew te, 'Angin ke neetew kiw en dutun te timpu te minge kepuun tew he

mibpenhimetayan dan sikan is ebpemeneuven dengan te Megbevayà su kenè kiw mulà dutun edtampu te mibeelan dan.’ ³¹Ne venar ves iyan he iyan kew sikan is menge kevuwazan te menge etew zengan he nekevunù te ebpemeneuven te Megbevayà su iring kew kandan. ³²Himesaza niw en is mezaat he ulaula he wazà mepasad te menge kepuun niw! ³³Iring kew te menge uled wey menge anak te uled su utew mezaat is ulaula niw. Ebmenmenuwen niw te kedlikey is silut keniyu ziyà te Impirnu? ³⁴Su egkegiyen ku keniyu he ibpehendiyen ku pa te keniyu is ebpemeneuven te Megbevayà, wey menge etew he mibegayan te Megbevayà te ketau, wey menge menunudlù. Ne edhimetayan niw is duma kandan. Ne is duma, idransang niw ziyà te krus ne ebpemugelen niw is duma ziyà te seled te menge simbahan niw ne ed-elawen niw sikandan diyà te minsan hendei he inged he egkepeveyaan dan te ebpemelaguy. ³⁵Tenged kayi, iyan kew edsilutan te kepemunua te langun he menge metazeng he nevunù puunè dà dutun te kedhimetayi ki Abel he metazeng he etew zengan, taman te kedhimetayi te anak ni Berekias he si Zacarias he mibunù niw ziyà te pid-elangan te Valey te Megbevayà wey vangkù he pemuhatà. ³⁶Egkegiyen ku keniyu he sikiyu is menge etew guntaan, elin kew zaan edsilutan tenged te kegkengevunù kayi te langun.”

Is Hizu ni Jesus te Menge TigHiruselim

(Mateo 23:37-39; Lucas 13:34,35)

³⁷Ne zutun netenuzan ni Jesus is menge ulaula te menge meginged te Hiruselim ne ke sikandin te, “Igkeseeng ku sikiyu is menge meginged diyà te Hiruselim su ebpemunuen niw is ebpemeneuven te Megbevayà, ne is menge suluguen te Megbevayà he ibpehendiyen, ebpenulengen niw te watu he edhimetayan niw. Utew zekelà is suat ku pezem he ed-uyemuwen ku sikiyu; ke vâ dà manuk, iring a te upa he edlekupan din is menge piyak din, ne kenè kew ebpelekup. ³⁸Ne guntaan, utew mekebulungbulung heini is simbahan niw su mid-iniyugan kew en te Megbevayà. ³⁹Su egkegiyen ku keniyu he kenè ad maan keniyu egkeahà taman dutun te timpu keuzemà he ebpekekagi kew te, ‘Deliga is nekeuma he midsugù te Nengazen.’ ”

Is Egkeuma he Menge Pesipala

(Mateo 24:1-28; Marcos 13:1-23; Lucas 21:5-24)

24 ¹Ne migawas si Jesus puun dutun te Valey te Megbevayà. Ne te ked-awè din dutun, mid-uvayan sikandin te menge sumusundan din su ibpeehè dan kandin is Baley te Megbevayà wey is menge valey he ziyà te uvey zutun. ²Ne migkagi kandan si Jesus te, “Tengtengi niw heini is langun su egkegiyen ku keniyu he heini is menge watu he imbevaley zan kayi, wazà minsan sevaha keuzemà he ebpekeuntud diyà te sevaha su egkewagey heeyan is langun.”

³Ne netegtegaad dutun mibpinuu si Jesus diyà te vuvungan he egngezanan te Uliwuwan. Ne mid-uvayan en maan sikandin te minge sumusundan din te wazè dan duma su iyan dan dà. Ne ke sikandan te, “Kegiyi key ke keenu egkehitalvù heini is langun, wey ke hengkey is egkeulaula he tuus wey zey metueni he iyan en kedlikù nu wey kegketapus kayi te timpu?” ⁴Ne midtavak si Jesus te, “Andam kew wey kenè kew mekesundan te teruen he etew. ⁵Su mezakel is ebpenlepew he egamit te ngazan ku ne egkagi is kada sevaha zutun he iyan sikandin sikan is mibpilì te Megbevayà he ibpahadì! Ne mezakel is ebpeketuu te minge tarù dan. ⁶Egkezineg niw ziyà te uvey niw is megurub tenged te gira ne egkezineg niw zaan is tudtul te minge gira ziyà te meziyù he tanà. Iyan, kenè kew mahandek su kinahanglan he egkeulaula is iring kayi te kenè pa edtepusen heini is timpu. ⁷Ebpekidtebek is sengeinged te zuma zin he inged; ne egira is sengeginhedian te zuma zin he ginhedian. Egkehitalvù is bitil wey minge linug diyà te minsan hendei. ⁸Iyan, heini he egkehitalvù, ne iring te ed-anak he sikan pa ebpuunà is belilit din.

⁹Egkuntedahan kew te tivuuk he menusiya tenged te minge sumusundan ku sikiyu. Ne edekepen kew te minge etew ne ibpalad kew zan diyà te edrasey keniyu ne is duma keniyu edhimetayan dan. ¹⁰Dutun he timpu, mezakel is egkepenulayan ne ibpalad te kada sevaha zutun is duma zin he tumutuu wey mehimentayi ne ebpekunkuntedehè dan. ¹¹Ne zutun ebpemenlepew is mezakel he teruen he etew he egkagi is uman sevaha kandan he ebpeneuven sikandin te Megbevayà. Ne mezakel is egkelimbangan dan. ¹²Ne tenged te kebpekeeneb te kelelalung te menusiya egkeawà diyà te gehinawa te kezekelan dutun is kebmahala zan te zuma zan. ¹³Iyan, sikan is kemulu pa edtuu ke egkeuma haazà is ketepusan te minge kemeresayan, iyan ebegayan te untung he wazè din pidteman. ¹⁴Ne idsangyew ziyà te tivuuk he kelibutan heini is Meupiya he Tudtulanen te keagi te kedhadì te Megbevayà wey metueni heini te tivuuk he menusiya. Ne emun egkepasad en haazà ne iyan en ketepusan.

¹⁵Si Daniel, sikan is ebpeneuven te Megbevayà dengan, netagnè din is egngezanan te melimezang he ebpekekaid. (Is ebpekevasa kayi te netagnè din, kinahanglan he sevuta zutun te nekevasa haazà is nevasa zin.) Ne emun egkeehè niw he ziyè en heini ebpekehitindeg te Valey te Megbevayà, ¹⁶mebpelaguy zan is diyà te prubinsya he Hudiya pehendiyà te minge vuvungan. ¹⁷Sikan is etew he egkeserengà diyà te gawas te valey zin, kenè en med-usik-usik pa te timpu te kedseled diyà te valey he egkuwa te minsan hengkey te azen din. ¹⁸Sikan is etew he ziyà egkeserengà te pemuleey zin, kenè en med-ulì te kegkuwa te malung din. ¹⁹Ne zutun he andew, kehizu utew te minge vahi he mememingey wey ebpemenlegimu su utew zan egkengeregenan he ebpelaguy! ²⁰Hamen kew he ed-ampù diyà te Megbevayà he kenà heini meserengà

is kebpelaguy niw zutun te timpu te megenew wey zutun te Andew te Kedhimeley. ²¹ Su utew mepait is kemeresayan dutun he timpu. Wazè pa meulaula is iring kayi puun pa te kedlimbaga te kelibutan. Ne emun egkehita vù heini kenè en maan egkehita vù is iring din te minsan keenu. ²² Iyan, midterinan en te Megbevayà is timpu zutun te kemeresayan su emun wazà, egkelimas dutun is tivuuk he menusiya. Iyan, tenged te egkehizuwan din is menge pinili din he etew, midterinan din is timpu zutun te kemeresayan.

²³ Ne ke zuen egkagi ziyà te keniyu te, 'Ahaa niw; heini en is hadi he mibpili te Megbevayà,' wey ke zuen be egkagi te, 'Heeyan en sikandin,' kenè kew mebpemineg dutun te egkagi. ²⁴ Su zuen ebpemenlepew he menge teruen. Ne egkagi is kada sevaha kandan te, 'Iyan a sikan is hadi,' ne emun kenà, ne ke sikandin te, 'Ebpeneuven a te Megbevayà.' Ne ebpemeehè dan te egkein-inuwan wey menge singyal su ibpetuu zan pezem te menge tarù dan, ke egkehimu, is menge pinili te Megbevayà. ²⁵ Kenè niw heini lipati su mibpetizeenan ku sikiyu he zaan.

²⁶ Ne emun duen egkagi te, 'Ahaa niw, su is hadi he mibpili te Megbevayà, diyè en sikandin te tanà he wazà duen ed-ubpà he etew,' ne haazà is etew he egkagi, kenè niw peminega. Ne emun duen daan egkagi te, 'Kayi sikandin med-eles,' haazà is egkagi, kenè niw zaan tuuwi. ²⁷ Su siak is Kakey te Menusiya, iring is kedlikù ku te kilat he idtik-ew ibmerayag te tivuuk he langit puun te edsilaan pehendiyà te edsenlepan. Egkeahà heini te langun.

²⁸ Iyan, ke hendei is egkemahù, kenà egkehimu he kenà dutun daan is menge uwak he edhurun, *he ke và dà egkegiya, kenà egkehimu he kenà egkehita vù heini is langun.*

Is Kedlikù ni Jesus

(Mateo 24:29-44; Marcos 13:24-37; Lucas 21:25-33)

²⁹ Ne emun egkeiwas haazà is timpu te kemeresayan, kenè en edsilà is andew ne kenè en daan ed-anlag is bulan. Egkengeulug is menge vituen diyà te langit, ne egkengewaleng is menge kedesenan diyà te hewhewanan. ³⁰ Ne zutun, siak is Kakey te Menusiya, egkeahà diyà te langit is tuus te kebpekeuma ku. Ne zutun utew egkengeseeng is langun he menge etew zini te kelibutan. Ne egkeehè e zan is Kakey te Menusiya diyà te menge gapun su ebpekeuma a. Ne utew zekelà is gehem ku wey utew merayag is ked-anlag ku. ³¹ Ne zutun edsuguen ku is menge velinsuguen ku ziyà te heepat he pesagi kayi te kelibutan ne ibpezaging is budyung ne edtigumen dan is menge pinili ku he etew he ebpemuun diyà te minsan hendei kayi te tivuuk he kelibutan.

³² Isipa niw is ibpenurù ku keniyu pinaagi te sempità he kayu he igira. Dini te kenita, emun ebpeneringsing en is subpang dutun he kayu

ne ebpenlumbey en, egketuenan ta he megaan en is gulavung. ³³Iring din ded daan, emun egkeehè niw he egkengetuman en is langun kayi te migkagi ku, egketuenan niw he megaan a ebpekelikù. ³⁴Tenuzi niw is egkegiyen ku keniyu: emun egkeehè niw he egkengetuman en heini kenè kew pa egkeamin ebpatay taman te kenè pa egkengetuman heini is langun. ³⁵Egkehanew is langit wey tanà, iyan, heini is migkagi ku, kenà mulà egkehanew te minsan keenu.

³⁶Is Amey tew he Megbevayà, iyan dà nesayud ke keenu egketuman heini is langun. Ne gawas kandin wazè en nesayud te andew wey uras ke keenu heini egkehitavù. Is menge velinsuguen te Megbevayà diyà te langit, wazè dan mesayud, wey minsan siak is Anak te Megbevayà, wazà a zaan mesayud. ³⁷Ne siak is Kakey te Menusiyà, keuzemà te timpu te kedlikù ku zini te kelibutan, ebpekeiring is menge ulaula te menge etew zutun duen te menge ulaula zengan te menge etew zuen te timpu ni Noe. ³⁸Su te wazè pa medlapey is dagat, wazà diyà te isip dan ke hengkey is egkehitavù. Iyan dà neisip te menge etew is kegkebibu ne migkaan dan ne mid-inum dan ne mibpees-eseweey zan taman te midseled en si Noe te zekelà he avang he eggezanan te arka. ³⁹Ne wazà diyà te isip te menge etew sikan is egkehitavù kandan taman te midlapey is dagat ne nengelened sikandan. Ne iring ded dutun kegaan is kegketikew te kedlikù ku te Kakey te Menusiyà keuzemà. ⁴⁰Dutun he timpu zuen dezuwa he maama he ziyà te pemuleey su edterebahu; egkuwaan te menge velinsuguen ku is sevaha zutun ne egketagak is sevaha. ⁴¹Ne zutun duen daan dezuwa he vahi he ebpeugupà te kebpenggaling; ne egkuwaan te velinsuguen ku is sevaha ne egketagak is sevaha. ⁴²Purungpurung kew su kenè niw egketuenan ke keenu he andew is kedlikù ku te Nengazen niw. ⁴³Kenè niw heini lipati he emun egketuenan te tegigaked te valey ke keenu ebpekeuma is tekawen dutun te valey zin, ne kenà sikandin edlipezeng. Ne zutun, kenà egkeselezan te tekawen haazà is baley. ⁴⁴Iring din ded daan, layun kew andam su ebpekeuma a is Kakey te Menusiyà te uras he kenà a keniyu ebperetengen.

Is Menge Suluguen

(Mateo 24:45-51; Lucas 12:41-48)

⁴⁵Sikan is suluguen he uluwanen wey metinumanen, iyan ibpevayàbayà te egalen din te menge zuma zin he suluguen. Ne iyan ebpekaan te menge zuma zin he suluguen dutun te uras te kegkaan. ⁴⁶Emun ed-ulì haazà is egalen din, utew zekelà is kelipey zutun te suluguen ke egkeahà te egalen din he midtuman din en is langun he ebpeveelan kandin. ⁴⁷Egkegiyen ku keniyu he is suluguen he metinumanen, idsarig kandin is langun he menge azen te egalen din. ⁴⁸Iyan, kehizu zin ke iyan diyà te isip din is egkeuget pa ed-ulì haazà is

egalen din, ⁴⁹ne ebpemugelen din is menge zuma zin he suluguen; ne egkaan wey ed-inum duma te menge lelenguten. ⁵⁰Su zutun he andew te wazè din peebuta wey zutun te uras he wazè din metueni, ebpekeuli haazà is egalen din. ⁵¹Ne haazà he suluguen, edsilutan sikandin dutun te egalen din ne ebeelan diyà te kandin is iring te ebeelan daan diyà te menge etew he tarù is kedtuu zan. Ne zutun ebpekekulahì sikandin ne ebpekengitel tuus te utew zin kebpekedsendit.”

Is Sepulù he Menge Raga

25 ¹“Dutun te kedlikù ku, is kedhadì te Megbevayà, ne iring te sempità he sepulù he raga he netukid te sulù su edsinugungen dan is ebpengesawa. ²Is lelima kandan, ne tulebung; ne is duma zan he lelima, ne memetau. ³Haazà is menge tulebung, mid-uwit dan is menge sulù dan, iyan, wazà gas he mid-uwit dan he tegana ke egkeamin is gas dutun te seled te sulù dan. ⁴Ne haazà is memetau, kada sevaha kandan mid-uwit te sulù lapik is gas he intagù te butilya he tegana ke egkeamin is gas dutun te sulù dan. ⁵Ne geina te neuget mekeuma sikan is ebpengesawa, ebpemekezungkàdungkè dan en dutun is edtagad he ebpemekelipezeng.

⁶Ne hein metaneb en dutun is kezukileman ne nezineg dan is ed-umew te, ‘Heini en sikan is ebpengesawa; sinugunga niw en sikandin.’ ⁷Ne nepukew haazà is sepulù he raga ne midsusi zan is menge sulù dan ne mibpurungan dan. ⁸Ne zutun migkagi haazà is menge tulebung dutun te menge memetau te, ‘Begayi key te gas su egkengeevukan en is kenami he menge sulù.’ ⁹Ne midtavak haazà is memetau te, ‘Kenà egkehimu su kenà egkampet kenitew te langun is gas he neuwit dey. Hendiyè kew te tindahan wey kew mekepemasa te gas.’ ¹⁰Ne zutun migenat haazà is menge tulebung su ebpemasa zan te gas, ne hein nehaus dan en nekeuma sikan is ebpengesawa. Ne haazà is lelima he menge raga he memetau, miduma zan kandin te edseled dutun te valey he zutun is eseweey. Ne hein nekeseled dan en dutun ne midlekevan haazà is baley.

¹¹Ne netegtegaad dutun nekeuma zaan haazà is menge zuma zan he raga; ne ziyè dan dà te gawas is egkagi te, ‘He Nengazen, he Nengazen, puwasi key.’ ¹²Ne midtavak haazà is ebpengesawa te, ‘Kenè ku sikiyu egkekilala.’” ¹³Ne ke si Jesus te, “Iring dutun, kinahanglan he andam kew su wazè niw metueni ke hengkey he andew wey ke hengkey he uras is kedlikù ku.

Is Tetelu he Sinerigan

(Mateo 25:14-30; Lucas 19:11-27)

¹⁴Is kedhadì te Megbevayà ne iring daan te etew he edhipanew. Te wazè pa sikandin megenat, midtigum din is menge suluguen din su

idsarig din kandan is selapì din wey zan ikepetigayun. ¹⁵Mibahin din kandan sumalà is egkeveleveg te uman sevaha kandan te ebpetigayun. Is sevaha, mibegayan din te lelima he libu he pisus; ne is sevaha, mibegayan din te zezuwa he libu; ne is sevaha pa, nengkelibu he pisus is imbegey zin dutun. Ne zutun migenat haazà is etew he edhipanew. ¹⁶Ne sikan is suluguen he mibegayan te lelima he libu he pisus, impetigayun din haazà is kandin, ne netigayun te lelima pa he libu. ¹⁷Iring din ded daan sikan is suluguen he mibegayan te zezuwa he libu he pisus, su netigayun daan te zezuwa pa he libu. ¹⁸Iyan, sikan is suluguen he mibegayan te nengkelibu he pisus, mid-awà dutun ne inleveng din diyà te tanà haazà is selapì dutun te egalen din.

¹⁹Ne hein neuget dutun, mid-ulì haazà is egalen dan su edsusiyen din haazà is selapì din. ²⁰Ne midtelavuk kandin sikan is suluguen din he mibegayan te lelima he libu he pisus ne indata zin haazà is selapì ragkes sikan is genansya he lelima he libu. Ne ke sikandin te, 'Mibegayan a kenikew te lelima he libu he pisus; ne heini zed is genansya he lelima he libu he pisus.' ²¹Ne migkagi haazà is egalen din te, 'Uteu meupiya is baal nu! Metinumanen ka he suluguen! Ne geina te egkeserigan ka te zeisey he selapì idsarig ku kenikew is dekelà. Seled ka zini wey ka mekeambit te kelipey ku.' ²²Ne midtelavuk daan kandin sikan is mibegayan din te zezuwa he libu he pisus ne ke sikandin te, 'Datù, mibegayan a kenikew te zezuwa he libu he pisus. Ahaa nu, heini zed daan is genansya he zezuwa he libu he pisus.' ²³Ne migkagi haazà is egalen din te, 'Uteu meupiya is baal nu! Metinumanen ka he suluguen! Geina te egkeserigan ka te zeisey he selapì, idsarig ku kenikew is dekelà. Seled ka zini wey ka medlipey te kelipey ku.' ²⁴Ne midtelavuk daan sikan is suluguen he mibegayan din te nengkelibu he pisus. Ke sikandin te, 'Datù, netuenan ku he wazè nu kehizu su edregunen nu is kenè nu pinemula, ne ebpenggenansya ka te wazè nu ipetigayun. ²⁵Ingkehandek ku sikew umba inleveng ku ziyà te tanà is selapì nu. Ahaa nu; heini zed sikan is selapì nu.' ²⁶Ne midtavak haazà is egalen din te, 'Uteu mezaat is baal nu! Pegulen ka he suluguen! Netuenan nu ves he edregunen ku is kenè ku pinemula ne ebpenggenansya a te wazè ku ipetigayun? ²⁷Maan is wazè nu ipeutang heeyan is selapì ku wey mepursintuwi wey medekelà is bali zin wey ku mezawat kayi te kedlikù ku?' ²⁸Ne zutun migkagi sikandin diyà te selakew en he suluguen te, 'Kuwa nu heeyan is nengkelibu he pisus keniyan te kandin ne ivegey nu ziyà te nekekuwa te sepulù he libu. ²⁹Su sikan is egkeserigan te insarig kandin, ed-umanan pa. Iyan, sikan is kenà egkeserigan, edhewien diyà te kandin minsan is deisek he insarig kandin. ³⁰Ne heini is wazè din pulus he suluguen, itimbag niw ziyà te merusirem he utew meziyù diyà te gawas. Dutun ne ebpekekulahì wey ebpekeningitel tenged te utew ebpekedsendit.'

Is Igkehukumi te Keet-etawan

³¹ Siak is Kakey te Menusiyà, dutun te kedlikù ku he utew zekelà is gehem te ked-anlag ku wey edumahan ad te langun he menge velinsuguen ku, ebpinuu ad is edhadì. ³² Ebpekeetuvang kedì is tivuuk he menusiyà. Ne zutun edtepizen ku sikandan te zezuwa he vahin iring te kedtepiza te bekidu zuen te menge kambing wey menge kerehidu. ³³ Idtapid ku is iring te menge kerehidu ziyà te zapit te egkekewanan ku, ne sikan is iring te menge kambing, idtapid ku ziyà te zapit te egkegivang ku. ³⁴ Ne zutun, siak is hadì, ekegiyan ku is menge etew ziyà te zapit te egkekewanan ku te, ‘Sikiyu is midtuvazan te Amey ku he Megbevayà, kayi kew su iyan kew edhedian ku. Su is kedhadì ku keniyu, integana en dengan puun pa te kedlimbaga te kelibutan. ³⁵ Su hein nevitil a, impekaan a keniyu; ne hein nemezahan a, impeinum a keniyu; minsan wazà a keniyu mekilala, midawat a keniyu ziyàn te valey niw. ³⁶ Hein wazè ku ugelingen mibegayan a keniyu; hein nezeruwan a, mid-elimahan a keniyu. Hein nepirisu a, midlauy a keniyu.’ ³⁷ Ne ed-insaan a zutun te menge etew he metazeng he ziyà te zapit te egkekewanan ku te, ‘Nengazen, keenu zey sikew maahà he nevitil wey nemezahan ne impekaan dey wey impeinum dey sikew? ³⁸ Keenu zey sikew zewata ziyà te valey zey te wazè dey sikew mekilala? Keenu ka megkinahanglan te ugelingen nu, ne mibegayan dey sikew? ³⁹ Keenu zey sikew melauy he egkezeruwan wey ziyà te pirusuan?’ ⁴⁰ Ne zutun, siak is hadì, edtavak a te, ‘Egkegiyan ku keniyu he ke mid-ulaula niw heini ziyà te minsan sevaha kayi te menge suled ku, *he ke và dà egkegiya, menge tumutuu kedì, minsan ke utew minus is pid-etawan din, neulaula niw en heini ziyà te kedì.*’

⁴¹ Ne zutun ekegiyan ku is menge etew he ziyà te zapit te egkegivang ku te, ‘Sikiyu is midrewakan te Amey ku he Megbevayà, awè kew kayi! Su zutun kew te regreg he wazè din pidtemanan he integana he zaan ki Setanas he iyan idsilut kandin duma te menge velinsuguen din! ⁴² Su zengan nevitil a, iyan, wazà a keniyu ipekaan; nemezahan a, ne wazà a keniyu ipeinum. ⁴³ Wazè ku egkepemenehkan ne wazà a keniyu zewata ziyà te valey niw. Egkinahanglan a te ugelingen, iyan, wazà a keniyu mevegayi. Nezeruwan a, ne ziyà a te pirusuan, iyan, wazà a keniyu leuya.’ ⁴⁴ Ne ed-insè dan te, ‘Nengazen, keenu zey sikew maahà he egkevital, ebpekeinum, wazà egkepemenehkan, wazà ugelingen, nezeruwan, wey ziyà te pirusuan ne wazè dey sikew metevangi?’ ⁴⁵ Ne zutun edtavak a is hadì te, ‘Egkegiyan ku keniyu he ke wazè niw tevangi is minsan sevaha kayi te utew minus is pid-etawan din, siak is wazè niw metevangi.’ ⁴⁶ Ne heini he menge etew,” ke si Jesus, “id-awà kayi su edsilutan sikandan te silut he wazè din pidtemanan; iyan, is menge metazeng mulà, ebegayan sikandan te untung he wazè din pidtemanan.”

Is Bitiyara Mehitenged te Kedekepa ki Jesus

(Mateo 26:1-5; Marcos 14:1,2; Lucas 22:1,2; Juan 11:45-53)

26 ¹Ne hein nepasad ni Jesus haazà is kepbenurù din dutun te langun, migkagi sikandin diyà te menge sumusundan din te, ²“Netuenan niw he mekezuwa zà guntaan ne egketuman en sikan is pista he egngезanan te Pista te Kedlevayi. Ne zutun, siak is Kakey te Menusiyà, ibpalad a ziyà te menge etew wey e zan ikeransang te krus,” ke sikandin. ³Ne zutun is menge punuan he memumuhat wey is ebmegurangan te menge Hudiyu, midtigum dan diyà te turugan ni Keyipas he lavew he memumuhat ⁴su ebpengahaan dan is paagi wey zan mezakep si Jesus he kenà egketuenan te mezakel he menge etew. ⁵“Deyzey nasi,” ke sikandan, “ke kenè tew sikandin edekepen dutun te timpu te pista su kela ke edsinamuk is menge etew.”

Is Kebpetigis te Pehemut

(Mateo 26:6-13; Marcos 14:3-9; Juan 12:1-8)

⁶Ne hein diyà si Jesus te inged he Bitanya, diyà sikandin te valey ni Simun te it-iten he neulian en. ⁷Ne mid-uvey ziyà te kandin is bahi he zuen din pelenahan he mibeelan puun te watu he egngезanan te elebastru he midteguan haazà is pelenahan te mehemut he agwa he utew mahal. Ne impetigis din haazà is agwa ziyà te ulu ni Jesus te kemulu pa zutun egkaan si Jesus. ⁸Ne hein naahà haazà dutun te menge sumusundan din ne nengepauk dan. Ke sikandan te, “Maan is mid-us-usikan din heeyan is agwa? ⁹Meupiya pa ke imbelegyè din heeyan te utew mahal wey ikevegey is halin diyà te egkengeayuayu!” ¹⁰Ne netuenan ni Jesus haazà is migkagi zan, ne ke sikandin te, “Pesegdana niw en heini is bahi. Uteu meupiya heini is mid-ulaula zin dini te kedì. ¹¹Layun niw egketevangi is egkengeayuayu su kenè niw mulà sikandan egkesuwey, iyan, siak, megaan ku en sikiyu egkesuwey. ¹²Mid-egwahan e zin su wey metegana is lawa ku zutun te kedlevenga kedì. ¹³Tenuzi niw he kenà sikandin egkelipatan. Su minsan hendei idsangyew heini is Meupiya he Tudtulanen dini te tivuuk he kelibutan, egketudtul zaan heini is mid-ula-ula zin dini te kedì.”

Is Paagi te Kedekepa ki Jesus

(Mateo 26:14-16; Marcos 14:10,11; Lucas 22:3-6)

¹⁴Ne te iyan daan haazà he timpu, sevaha zuen te sepulù wey dezuwa he sumusundan, sikan is migngезanan ki Hudas he tigKeriyuti, midhendiyà sikandin te menge punuan he memumuhat. ¹⁵Ke sikandin diyà te kandan te, “Pira is idsuhul niw kedì ke pinaagi kedì igkepalad diyà te keniyu si Jesus?” Ne mibilang dan dutun is ketluan he elad he

pelata ne imbegey zan diyà te ki Hudas. ¹⁶Ne puun dutun mibpeng-ahà si Hudas te paagi ke ebmenmenuwen din te ed-akal si Jesus su wey mezakep dutun te menge etew.

Is Kedseulug ni Jesus Duma te Menge Sumusundan Din

(*Mateo 26:17-25; Marcos 14:12-21; Lucas 22:7-14,21-23; Juan 13:21-30*)

¹⁷Ne zutun te nehuna he andew te Pista te Kegkeena te Supas he Wazè Din Tapey, mid-uvayan si Jesus te menge sumusundan din ne ke sikandan te, “Hendei is baley he egkesuatan nu he edhilituan dey wey metegana is idlavung nu kayi te Pista te Kedlevayi?” ¹⁸Ne zutun migkagi si Jesus he medhendiyè dan te inged, diyà te etew he zaan he migkagi zin kandan ne kegiyi zan haazà is etew he egkagi is menunudlù tew te, “Megaan en is kebpatay ku; dini key edlavung te menge sumusundan ku su Pista te Kedlevayi heini.”

¹⁹Ne mid-ulaula te menge sumusundan ni Jesus haazà is insugù din kandan ne midtegana zan is idlavung dan dutun te Pista te Kedlevayi.

²⁰Ne te kegkezukilem dutun, si Jesus wey sikan is sepulù wey zezuwa he menge sumusundan din, diyè dan te lemisahan. ²¹Ne hein egkaan dan en dutun migkagi si Jesus te, “Duen egkegiyen ku keniyu. Iyan is: sevaha kayi te keniyu is ed-akal kedì wey a mehimetayi.” ²²Ne utew nengeseeng haazà is menge sumusundan din, ne zutun mid-insà kandin is kada sevaha zutun te, “Nengazen, iyan e ve egkegiyen nu?” ²³Ne midtavak si Jesus te, “Sevaha kayi te edtugen kedì iyan ed-akal kedì. ²⁴Siak is Kakey te Menusiyà, ebpatay a sumalà te netagnà duen te insurat he Lalag te Megbevayà, iyan, kehizu utew zuen te etew he ed-akal kedì. Meupiya pa ziyà te kandin ke wazè en sikandin ianak.” ²⁵Ne zutun migkagi si Hudas, kes ed-akal kandin te, “Menunudlù, iyan e ve ed-akal kenikew?” Ne ke si Jesus te, “Uya, iyan ka.”

Is Kedlavung te Nengazen

(*Mateo 26:26-30; Marcos 14:22-26; Lucas 22:15-20; 1 Kurintu 11:23-25*)

²⁶Ne zutun te kemulu zan pa egkaan, mid-amì si Jesus te supas, ne mibpeselematan din te Megbevayà ne mibpenevitevi din ne impemegey zin diyà te menge sumusundan din. Ke sikandin te, “Iyan heini lawa ku; dewata niw wey keena niw.” ²⁷Ne zutun mid-amì din is tasa he midteguan te vinu te paras, ne mibpeselematan din daan te Megbevayà ne induwal zin diyà te kandan. Ke sikandin te, “Pudu kew kayi inum. ²⁸Su lengesa ku heini he ibpetigis wey mepelisi is mezakel he menge etew wey mepesaylu is menge salè dan. Tuus heini te paagi te kegkelibri he midtukud te Megbevayà. ²⁹Egkegiyen ku keniyu he kenè ku en maan ed-inumen is binu taman dutun te timpu keuzemà he ed-iinumey kiw te

vegu en he vinu emun edhadi en is Amey ku he Megbevayà.” ³⁰Ne zutun migkanta zan te kedalig te Megbevayà ne hein nepasad haazà migawas dan ne midhendiyè dan te vuvungan he egnezanan te Ulivuwan.

Is Kegkegiya ni Jesus te Kebarew ni Pedro

(Mateo 26:31-35; Marcos 14:27-31; Lucas 22:31-34; Juan 13:36-38)

³¹Ne zutun migkagi si Jesus diyà te kandan te, “Is langun te sikiyu, ne edluyahan is kedsarig niw kediey guntaan te mezukilem tenged te egkehita vù kedì; su zuen insurat he Lalag te Megbevayà he edhenduen te, ‘Edhimetayan ku is ed-elima te menge kerehidu ne ebpekedusuwey is menge kerehidu.’ ³²Iyan, emun egkevanhew ad, edhuna a keniyu ziyà te prubinsya he Geliliya.” ³³Ne zutun migkagi si Pedro ziyà te kandin te, “Minsan ke edluyahan is kedsarig kenikew kayi te langun he menge zuma ku ne kenà mulà edluyahan is kedì, minsan egkemenumenu.”

³⁴Ne zutun migkagi si Jesus diyà te ki Pedro te, “Benar is egkegiyen ku kenikew he te kenè pe kan ebpengukarà is manuk, ne ketetelu ke en ebpekekagi he kenà a kenikew egkekilala!”

³⁵Ne migkagi si Pedro te, “Minsan pa ke edhimetayan a zuma kenikew kenà a egkagi he wazè ku sikew mekilala!” Ne iring ded daan dutun is menge pesarig dutun te zuma he menge sumusundan ni Jesus.

Is Ked-ampù ni Jesus Diyà te Gitsimèni

(Mateo 26:36-46; Marcos 14:32-42; Lucas 22:39-46)

³⁶Ne kebpekeuma zutun eni Jesus diyà te Gitsimèni, migkegiyan din is menge sumusundan din te, “Kayi kew zà pinuu su edlaus key ziyà su ed-ampù a.” ³⁷Ne miduma zin si Pedro wey sikan is dezuwa he anak ni Sibidiyu. Ne zutun utew neseeng sikandin wey mibmesakit utew is gehinawa zin. ³⁸Ne migkagi sikandin diyà te kandan te, “Ute w mesakit is gehinawa ku. Henduen be te egkevidte w en. Kayi kew zà ne kenè kew medlizepeng.” ³⁹Ne midlaus si Jesus diyà te uvey zà dutun ne midlangkeb sikandin ne mid-ampù, ke sikandin te, “Amey ku, ke egkehimu zà ne kenè nu en kediey ipesegazi heini is merasey he imbanglis nu kediey, iyan, kenà egkesunud is kediey he egkesuatan, kekenà, iyan egkesunud is kenikew he egkesuatan.”

⁴⁰Ne hein midlikuan din haazà is tetelu he menge sumusundan din, nekelipezeng dan, ne migkegiyan din si Pedro te, “Wazè niw ve metigker he kenè kew medlizepeng te minsan sengeuras dà? ⁴¹Kenè kew lipezeng, kekenà, ampù kew wey kew mekelikey te menge penggezam keniyu. Edsunud is gehinawa niw, iyan, is lawa niw ne meluya.”

⁴²Ne midlikù si Jesus ne mid-ampù med-uman, ke sikandin te, “Amey ku, emun kenè en egkehimu he id-awà sikan is kedresaya kedì ne iyan egkesunud is kenikew he egkesuatan.” ⁴³Ne zutun midlikuan din sikan is menge sumusundan

din ne neehè din he nemekelipezeng dan en maan su wazè dan maantus is kebpemetpetayi kandan te tuzug. ⁴⁴Ne midlikù si Jesus ne mid-ampù med-uman te iketelu ne in-uman din in-ampù kes in-ampù din. ⁴⁵Ne zutun midlikuan din sikandan ne migkagi te, “Kemulu kew ves nehurep he ebpmenhidhizegà? Siak is Kakey te Menusiyà, iyan en heini timpu he ibpalad a ziyà te minge lalung he etew. ⁴⁶Enew kew su heini en sikan is etew he ed-akal kedì. Kuwa kew en, su edsinugungen tew.”

Is Kedekepa ki Jesus

(Mateo 26:47-56; Marcos 14:43-50; Lucas 22:47-53; Juan 18:3-12)

⁴⁷Ne te kemulu pa zutun egkagi si Jesus, nekeuma si Hudas is sevaha zuen te sepulù wey zezuwa he epustul. Duma zin is mezakel he minge etew he nengegumeenan te minge ubpit wey minge lagkut. Minge sugù haazà te minge punuan te memumuhat wey minge ebmegurangan te minge Hudiyu. ⁴⁸Si Hudas, is giya zan pehendiyà te ki Jesus, migkagi zin he zaan ke hengkey is tuus te kegketuèni zan ki Jesus. Ke sikandin te, “Is etew he edhezekan ku, ne iyan en ebpen-ahaan niw. Ne zekepa niw en.” ⁴⁹Ne hein nekeuma si Hudas, segugunè din mid-uvayi si Jesus ne migkagi te, “Na! Menunudlù!” Ne zutun midhezekan din si Jesus. ⁵⁰Ne migkagi si Jesus diyà te kandin te, “Pekezilepeti nu, Mama, is ed-ul-olahan nu.” Ne midakep dutun te minge etew si Jesus ne mibpekehehemenan dan te egawed. ⁵¹Ne sevaha zutun te zuma ni Jesus, nekehulavut te sundang din, ne midtibas din is suluguen te lavew he memumuhat ne netenaan haazà diyà te telinga, ne nesapla haazà is telinga zin. ⁵²Ne migkegiyan ni Jesus haazà te, “Igumè nu heeyan is ubpit nu su sikan is utew megaan he ebpenggumaan, gumaan daan is ibpatey zin. ⁵³Wazè nu ve metuèni he emun ebpetavang a te Amey ku he Megbevayà ne edlibibuwen is ibpehendini zin he velinsuguen din? ⁵⁴Iyan,” ke si Jesus, “emun ebpetavang a kandin ne kenà egketuman sikan is nengetagnà dengan dutun te insurat he Lalag te Megbevayà; ne kinahanglan he egkeulaula haazà sumalà is netagnà,” ke sikandin.

⁵⁵Ne zutun migkegiyan ni Jesus haazà is minge etew te, “Tulisan e ve? Su maan is negumeenan kew te minge ubpit wey minge lagkut is edakep kedì? Kada andew ne egkeahà a keniyu is ebpenurù te minge etew ziyà te Valey te Megbevayà, ne maan is wazà a keniyu zutun dà dekepa? ⁵⁶Iyan, guntaan, human en egkeulaula heini is langun kayi su egketuman sikan is minge tagnà he insurat dengan te ebpmeneuven te Megbevayà.” Ne hein nekagi en ni Jesus haazà, mid-ewaan sikandin dutun te minge sumusundan din su nemelaguy zan is langun.

Is Ked-imbistigaha ki Jesus te Minge Punuan

(Mateo 26:57-68; Marcos 14:53-65; Lucas 22:54,55,63-71; Juan 18:13,14,19-24)

⁵⁷Ne zutun, haazà is minge etew he midakep ki Jesus, mid-uwit dan sikandin diyà te ki Keyipas he lavew he memumuhat. Ne zutun,

daan en he netigum is minge menunudlù te kesuguan wey is minge ebmegurangan te minge Hudiyu. ⁵⁸Si Pedro, midtinundug, asal kenà utew ed-uvey ne zutun te nekeuma zan en diyà te valey te lavew he memumuhat ne ziyè dà medtaman si Pedro te lama. Ne hein nekeleed en sikandin dutun te lama, mibpesahugsahug sikandin mebpinuu zuen te minge guwardya su ed-ahaan din ke hengkey en is egkeulaula ki Jesus. ⁵⁹Ne is minge punuan te memumuhat wey is langun he nengetigum he ebmegurangan te minge Hudiyu, ebpen-ehè dan te salà he id-ulug dan ki Jesus su wey zan mehimetayi. ⁶⁰Iyan, minsan pa te mezakel is teruen he ebpenistigus te minge ulaula ni Jesus ne wazè dan dutun egkeahà he zait he igkehimetayi kandin. Ne hein neuget, duen dezuwa he mid-etuvang ⁶¹he egkagi te, “migkagi heini he etew te, ‘Egkerundus ku is dekelà he simbahan te Megbevayà ne seled te tetelu he andew ne igkepehitindeg ku.’”

⁶²Ne zutun midhitindeg sikan is lavew he memumuhat dutun ne migkegiyan din si Jesus te, “Tutuu ve heini is minge sumbung dan mehitenged kenikew? Hengkey is igketavak nu?” ke sikandin. ⁶³Ne wazà medtavak si Jesus. Ne mid-uman megkagi haazà is lavew he memumuhat te, “Tangdù ka su kayi ka te etuvangan te Megbevayà he wazè din kemetayen. Emun iyan ka sikan is Anak te Megbevayà, sikan is mibpili din he ibpahadi, kegiya nu,” ke sikandin. ⁶⁴Ne midtavak si Jesus te, “Iyan heeyan sumalà is migkagi nu ne ekegiyan ku sikiyu is langun he siak is Kakey te Menusiyà, keuzemà egkeahà a keniyu is diyà ebpinuu te zapit te egkekewanan te Megbevayà. Ne egkeahà a zaan keniyu ziyà te minge gapun is ebulus he ebpuun diyà te langit,” ke sikandin. ⁶⁵Ne haazà is lavew he memumuhat, mibpemindas din is kumbalè din he tuus te utew sikandin nepauk dutun te migkagi ni Jesus, ne ke sikandin te, “Uvag en kun Anak te Megbevayà! Nekesupak en heini te Megbevayà! Wazè en kinahanglan he zuen pa tistigus su sikiyu is langun, nezineg niw en heini is minge lalag din he utew supak te Megbevayà! ⁶⁶Hengkey is hukum niw?” Ne midtavak is minge zuma zin te, “Dekelà is salè din; kinahanglan he edhimetayan.”

⁶⁷Ne zutun mibpengilevan dan is ulu ni Jesus; ne mibugel zan. Ne is duma, midtabpi kandin ⁶⁸he egkagi te, “Sikew is mibpili bes te Megbevayà, tegnaa nu ke hentei is neketabpi kenikew,” egkagi zan.

Is Kebpewarew ni Pedro
(*Mateo 26:69-75; Marcos 14:66-72; Lucas*
22:56-62; Juan 18:15-18,25-27)

⁶⁹Ne si Pedro, diyà te lama is ebpinpinuu. Ne zuen suluguen he vahi he mid-uvey ziyà te kandin is egkagi te, “Sikew, duma ka zaan ni Jesus he tigGeliliya.” ⁷⁰Iyan, mibarew haazà ni Pedro is migkagi zutun te vahi,

ne nekezineg dutun is langun te kebarew zin. Ke sikandin te, “Kenè ku egkesavut heeyan is egkegiyen nu.” ⁷¹Ne migawas si Pedro pehendiyà te pultahan dutun te lama. Ne zuen sevaha pa he suluguen he vahi he nekeahà kandin ne migkagi haazà is bahi ziyà te menge etew zutun te, “Duma heini ni Jesus he tigNeserit!” ⁷²Ne utew mezesen is kebarew zutun ni Pedro. Ke sikandin te, “Kenè ku egkekilala heeyan he etew.” ⁷³Ne hein netegtegaad dutun, mid-uvayan si Pedro zuen te menge etew he nerivurun dutun, ke sikandan te, “Tutuu iyan he zuma ke zin daan su egketuasan tenged te kegkagi nu.” ⁷⁴Ne zutun mid-amin-amin si Pedro te sapà, ke sikandin te, “Siluti a te Megbevayà ke tarù heini is lalag ku he kenè ku egkekilala heeyan he etew.” Ne zutundutun, mid-ukarà is manuk. ⁷⁵Ne human metenuzi ni Pedro sikan is migkagi kandin ni Jesus he, “Te kenè pe kan ebpengukarà is manuk, ne ketetelu ke en ebpekekagi he kenà a kenikew egkekilala.” Ne zutun migawas si Pedro ne nekelelendag.

Is Kedheteza ki Jesus Diyà te ki Pilatu

(Mateo 27:1,2; Marcos 15:1; Lucas 23:1,2; Juan 18:28)

27 ¹Ne hein nepawà dutun is langun he menge punuan te menge memumuhat wey menge ebmegurangan te menge Hudiyu, mid-uyunan dan ke ebmenmenuwen dan is paagi wey iketugut kandan is kedhimetayi ki Jesus. ²Mibakus dan si Jesus te kedina ne inhaled dan sikandin diyà te ki Pilatu he iyan gubirnedur zutun.

Is Kebpekedsendit ni Hudas

(Mateo 27:3-10; Nengeulaula 1:18,19)

³Ne si Hudas, sikan is mid-akal ki Jesus, utew nekedsendit hein netuenan din he edhimetayan duen te menge etew si Jesus su nekagi zan he zait is ulaula ni Jesus he igkehimetayi kandin. Ne midhendiyà sikandin te menge punuan he memumuhat wey menge ebmegurangan te menge Hudiyu su id-ulì din pezem sikan is ketluan he vuuk he selapì. ⁴“Nekesalà a,” ke sikandin, “su sikan is etew he migkagi niw he zait is ulaula zin he igkehimetayi kandin, wazè din salà ne iyan a mibpalad kandin diyan te keniyu.” Ne midtavak dan te, “Wazè dey lavet keniyang; kenikew zà heeyan he samuk.” ⁵Ne haazà is selapì, insimbura ni Hudas dutun te simbahan ne mid-awà dutun su netagù diyà te gehinawa zin is kedhiket, ne zutun mibitey sikandin.

⁶Ne is menge punuan te memumuhat, hein nekuwa zan sikan is selapì, migkagi zan te, “Ebpekesupak kiw te kesuguan ke id-ulug tew heini ziyà te teleguey te selapì kayi te simbahan su imbayad heini wey mehimetayi is etew.” ⁷Ne tenged dutun mibivitiyara zan ke hengkey is ed-ul-olahan dan dutun. Ne zuen tanà he migngezanan te tanà te ebpendiyun, ne mibpemasas zan haazà dutun te selapì su wey mehimu he penlevengà te

menge etew he kenà Hudiyu. ⁸Ne tenged kayi migngезanan dan haazà he tanà te Tanà te Lengesa, *he ke và dà egkegiya, tanà he nepemasa te selapì he imbayad te kedhimetayi te etew.* ⁹Ne netuman dutun sikan is netagnà dengan te ebpeneuven te Megbevayà he si Jeremias su ke sikandin te, “Nekuwa zan kes ketluan he vuuk he selapì he iyan bali zin he neuyunan te menge etew he kevuwazan ni Israyil. ¹⁰Ne impemasa zan te tanà te ebpendiyun sumalà is intelaan kedì te Nengazen.” Iyan heini nekagi zengan ni Jeremias.

Is Ked-imbistigaha ni Pilatu ki Jesus

(*Mateo 27:11-14; Marcos 15:2-5; Lucas 23:3-5; Juan 18:33-38*)

¹¹Ne zutun hein diyè en si Jesus te etuvangan te gubirnedur is ed-imbistigahan, mid-insà ki Jesus haazà is gubirnedur te, “Hadì ke ve te menge Hudiyu?” Ne midtavak si Jesus te, “Uya, iyan is migkagi nu.” ¹²Iyan, dutun te migkagi en te menge punuan te menge memumuhat wey menge ebmegurangan te menge Hudiyu ziyà te ki Pilatu is sumbung dan mehitenged ki Jesus ne wazà haazà tevaka ni Jesus. ¹³Umba mid-insaan sikandin ni Pilatu te, “Maan is wazè nu tevaka heini is langun he menge sumbung dan mehitenged kenikew?” ¹⁴Iyan, wazà medtavak si Jesus te minsan hengkey; ne tenged kayi neinuinu utew is gubirnedur.

Is Kedhukumi ki Jesus te Kemetayan

(*Mateo 27:15-26; Marcos 15:6-15; Lucas 23:13-25; Juan 18:39–19:16*)

¹⁵Ne iyan neleyaman ni Pilatu is: kada tuig, emun Pista en te Kedlevayi, edlibriyen din is sevaha he pirusu ke edhengyuen te menge etew. ¹⁶Ne zuen nevantug he etew he mibpirisu he egngезanan ki Berabas. ¹⁷Ne hein nevrurun en dutun is menge etew, ne mid-insà si Pilatu te, “Hentei zapit is egkesuatan niw he edlibriyen ku, iyan be si Berabas wey ke iyan be si Jesus he migeraran he Pinilì te Megbevayà?” ¹⁸Su netuenan ni Pilatu he iyan hinungdan ke maan is insumbung si Jesus te menge punuan is kegkesina zan kandin.

¹⁹Ne te kemulu pa si Pilatu ebpimpinuu zutun te valey he ebpenhusayan, nekeuma is surat te esawa zin he egkagi te, “Kenè nu hileveti heeyan he etew su wazè din salà. Nerasey a utew geina te mezukilem su mideetan a tenged kandin,” ke sikandin.

²⁰Iyan, is menge punuan he memumuhat wey is menge ebmegurangan, migkegiyan dan is menge etew zutun he iyan dan hengyua he melibri si Berabas ne si Jesus, ibpohimetayan. ²¹Ne mid-uman med-insà kandan haazà is gubirnedur te, “Hentei zapit kayi te zezuwa is egkesuatan niw he edlibriyen ku?” Ne ke sikandan te, “Iyan si Berabas.” ²²Ne migkagi si Pilatu te, “Ne emun iyan heeyan, ebmenmenuwen ku si Jesus he migeraran he Pinilì te Megbevayà?” Ne migkagi sikandan is langun

te, “Iransang te krus!” ²³Ne ke si Pilatu te, “Maan? Duen be mezaat he mid-ulaula zin?” Iyan, mid-iseg dutun is kegurub dutun te menge etew he ebpememensag te, “Iransang te krus!” ²⁴Ne zutun nesavut ni Pilatu he wazè en pulus te menge lalag din su ebpuunè en edsinamuk is menge etew, ne tenged dutun, migkuwa sikandin te wahig ne mibpenlùlù te velad din dutun te etuvangan te menge etew, ne ke sikandin te, “Keniyu he salà heini. Is lengesa kayi te etew, ne ziyè dà te keniyu he velad; lumpiyu is kedì.” ²⁵Ne midtavak is langun he menge etew te, “Uya, kenami en he salà is kedhimetayi kayi wey salà daan te menge kevuwazan dey!” ²⁶Ne zutun midlibri ni Pilatu si Berabas. Ne impevugel zin si Jesus ne insugù din te menge sundaru he iransang dan si Jesus diyà te krus.

Is Kebpesipelahi ki Jesus te Menge Sundaru
(*Mateo 27:27-31; Marcos 15:16-20; Juan 19:2,3*)

²⁷Ne zutun impeseled si Jesus te menge sundaru zutun te turugan te gubirnedur. Ne netigum diyà te kandin is tivuuk he kumpeniya te menge sundaru. ²⁸Midlevasan dan si Jesus ne migkumbelaan dan sikandin te merigà he kumbalà su uvag kun hadì. ²⁹Ne zutun mibengkulè dan te zugiyen he gawed he igkuruna zan ki Jesus ne insuup dan haazà diyà te ulu zin. Ne is kewanan he velad din, impegawed dan te tuked ne midluhud dan diyà te etuvangan din is edtahud kun uvag kandin. Ne ke sikandan te, “Kumusta, Hadì te menge Hudiyu!” ³⁰Ne mid-ilevan dan ne midsekelew zan haazà is tuked ne imbadas dan diyà te ulu zin. ³¹Ne hein nepeze dan en he ebaleyvaley kandin midluwasan dan duen te kumbalà he merigà ne insun-ud dan kandin is daan he kumbalè din. Ne zutun miduwit dan sikandin su idransang dan diyà te krus.

Is Kedrensanga ki Jesus Diyà te Krus
(*Mateo 27:32-44; Marcos 15:21-32; Lucas 23:26-43; Juan 19:17-27*)

³²Ne ziyà te zalan he ibayè dan nesinugung dan is etew he tigSirini he egngезanan ki Simon. Ne mibpeges dan haazà ipetiang duen te krus he edtiangen ni Jesus. ³³Ne nekeuma zan diyà te migngезanan te Gulguta, he ke vā dà egkegiya, Tulan te Ulu. ³⁴Ne ibpeinum dan pezem si Jesus te vinu he mid-emuan te utew mepait, iyan, hein negezaman din en haazà ne wazè din leusa te ed-inum. ³⁵Ne inransang dan sikandin diyà te krus; ne zutun midripa zan ke hentei is ebpekeangkèn te menge ugelingen din.

³⁶Ne te kegkepasad dan dutun mibpinuu zan su ed-ahaan dan sikandin ke egkemenumenu. ³⁷Ne ziyà te zivavew te ulu zin, impezeket dan is surat he iyan sikan is hinungdan te insumbunga kandin he edhenduen te, “Iyan heini si Jesus, sikan is Hadì te menge Hudiyu.” ³⁸Ne zuen dutun dezuwa he tulisan he inransang dan daan. Impasek is krus te sevaha

zutun diyà dapit te egkekewanan din, ne impasek is krus te sevaha ziyà te egkegiving din.

³⁹Ne is menge etew zutun he sumesegazà, ebpemenangàtangà is ed-engitan dan si Jesus. ⁴⁰Ke sikandan te, “Na! Kunaan nu ke egkegeve nu sikan is simbahan he Valey te Megbevayà ne egkevangan nu te seled te tetelu he andew. Libriya nu kun is keugelingen nu. Emun tutuu ka he Anak te Megbevayà, penaug ka kenian te krus.” ⁴¹Ne iring din ded daan is mid-ulaula kandin te menge punuan te memumuhat wey menge menunudlù te kesuguan su mibaleyvaley zan sikandin, ⁴²ke sikandan te, “Nelibri zin is duma, iyan, is keugelingen din, kenè din egkelibri. Hadi bes sikandin te menge tig-Israyil. Ipepenaug kenian te krus ne egkesundanan human. ⁴³Edsarig kun sikandin te Megbevayà ne egkegiyen din daan he Anak sikandin te Megbevayà. Ed-ahaan ta guntaan ke edlibriyen sikandin te Megbevayà ke tutuu he igkesuat sikandin te Megbevayà,” ke sikandan. ⁴⁴Ne minsan sikan is menge tulisan he inransang diyà te pesikilizè din, ne midsumpalit dan daan sikandin.

Is Kebpatey ni Jesus

(Mateo 27:45-56; Marcos 15:33-41; Lucas 23:44-49; Juan 19:28-30)

⁴⁵Ne te neudtu en is andew zutun, midtik-ew mebmerusirem is tivuuk he kelibutan seled te menge tetelu he uras. ⁴⁶Ne hein liwazè en he ebpenaug is andew, ingkulahì ni Jesus is utew mezaging he lalag he edhenduen te, “Ili, Ili, lama sebekhani?” he ke vâ dà egkegiya, “He Megbevayè ku, maan is ed-iniyugan a kenikew?” ⁴⁷Ne zutun, is duma he etew he ebpemenhithitindeg dutun te uvey, hein nezineg dan haazà, ke sikandan te, “Pemineg kew su ebpengumawen din si Elias, is sevaha zuen te ebpeneuven dengan te Megbevayà.” ⁴⁸Ne sevaha zutun te menge etew is migaanggaan megkuwa te ispungha ne intereb din diyà te sukà ne midtiyuk din te zeisek he kayu ne impaahuk din diyà te vèbà ni Jesus wey zin haazà mesupsup. ⁴⁹Iyan, migkagi is menge zuma zutun te etew te, “Pesegdana nu su ed-ahaan ta ke edlepew si Elias su edlibriyen sikandin.” ⁵⁰Ne zutun, migkulahì si Jesus med-uman ne naawà is gehinawa zin.

⁵¹Ne zutundutun, is manggad he utew mekepal he ingkurtina ziyà te seled te simbahan he Valey te Megbevayà, neliwazà mevindas puun te zivavew pehendiyà te zizalem. Ne midlinug ne mibpemeka is dezekelà he watu. ⁵²Ne zuen menge surung he penlevengà he zutun nengepuwasan, ne nengevanhew is mezakel he menge tumutuu te Megbevayà, ⁵³ne mid-awè dan dutun te penlevengà. Ne zutun te kegkevanhew zaan ni Jesus, nemenrigurigu haazà is nengevanhew ziyà te inged he Hiruselim ne mezakel is nemekeahà kandan dutun te kepbenrigurigu zan.

⁵⁴Sikan is minge sundaru wey sikan is kepitan dan he mibantey ki Jesus, hein midtik-ew medlinug wey hein nengeehè dan is duma pa he nengehitavù dutun ne nengehandek dan. Ke sikandan te, “Tutuu ves iyan he Anak sikandin te Megbevayà!” egkagi zan.

⁵⁵Ne zuen daan dutun mezakel he minge vahi he ebantey ziyà te meziyù dutun. Minge tigGeliliya sikandan he miduma ki Jesus pehendiyà te Hiruselim su edtavang dan kandin. ⁵⁶Ne zutun si Maria Megdelina, wey si Maria, sikan is iney ni Santiago wey ni Jose, ne elin daan sikan is esawa ni Sibidiyu.

Is Kedlevenga ki Jesus

(Mateo 27:57-61; Marcos 15:42-47; Lucas 23:50-56; Juan 19:38-42)

⁵⁷Ne hein mahapun en dutun, nekeuma is sepian he ebpuun te Erimetiya. Iyan ngazan din si Jose; ne sumusundan daan sikandin ni Jesus. ⁵⁸Midhendiyà sikandin te ki Pilatu is edhangyù he egkuwaan din is lawa ni Jesus. Ne zutun insugù ni Pilatu is lawa ni Jesus he ikevegey ziyà te ki Jose. ⁵⁹Ne migkuwa haazà ni Jose ne mibukusan din te vegu he malung he meputi. ⁶⁰Ne zuen surung he penlevengà ni Jose he sikan pa mepasad he ingkalut diyà te kelendigan te pagang. Ne zutun iseled ni Jose is lawa ni Jesus. Ne midlekevan din haazà is surung te zekelà he vatu ne mid-ewaan din. ⁶¹Ne si Maria Megdelina, wey sikan is sevaha he Maria, dutun dan ebpimpinuu is ebantey zutun te surung.

Is Kebentayi Zuen te Leveng

⁶²Ne zutun te sunud he andew he Sebadu, midhendiyà te ki Pilatu is minge punuan he memumuhat wey is minge Perisiyu. ⁶³Ne ke sikandan diyà te kandin te, “Datù, netenuzan dey he migkagi zuen te teruen he etew hein uuyag pa, he emun ebpatay, egkevanhew zed seled te tetelu he andew. ⁶⁴Umba, meupiya ke ebpeventayan nu te minge sundaru sikan is surung taman te iketelu he andew su kela ke tekawa is lawa zin te minge sumusundan din, ne egkegiyen dan diyà te minge etew he nevanhew sikandin. Ne ed-iseg ebmezaat is ebpekesunud he kedlimbungi zan te minge etew.” ⁶⁵Ne midtavak si Pilatu te, “Egkehimu. Dumaha niw pehendutun is minge sundaru, ne purungi niw peventayi haazà is surung.” ⁶⁶Ne mibeyaan dan haazà ne midtuusan dan sikan is inlekeb he vatu zutun wey metuusi zan ke edwelengen te minsan hentei. Ne intagak dan haazà is minge sundaru zutun he ibpevantey zan.

Is Kegkevanhew ni Jesus

(Mateo 28:1-10; Marcos 16:1-10; Lucas 24:1-12; Juan 20:1-10)

28

¹Ne hein neiwas haazà is Andew te Kedhimeley te megaan egkepawà dutun te andew he Duminggu, midhendiyà te

penlevengà ensi Maria Megdelina wey kes duma zin, he Maria zaan is ngazan, su ed-ahaan dan sikan is surung. ²Ne zutun netekewtekew medlinug te utew mezesen. Ne zuen ebpuun diyà te langit he velinsuguen te Nengazen. Ne mibpenaug haazà ne in-awè din kes batu he inlekeb dutun te surung ne mid-untuzan din. ³Is dagwey zin, ne ebpekesirang su utew merayag, ne utew zaan meputi is ugelingen din. ⁴Ne nengehandek utew sikan is ebantey zutun he minge sundaru ne nengetentanan dan is wazà memekewaleng he ebpengerkeren.

⁵Ne sikan is minge vahi, migkegiyan sikandan dutun te velinsuguen te, “Kenè kew mahandek. Netuenan ku he ebpen-ahaan niw si Jesus, sikan is inransang te krus. ⁶Wazè en dini su nevanhew en sumalà is migkagi zin keniyu. Hendini kew wey niw ahaa is midsevukan kandin. ⁷Ne gègaani niw veyai is duma he minge sumusundan din. Ne kegiya niw ziyà te kandan he nevanhew en sikandin ne edhuna keniyu ziyà te Geliliya ne ziyè niw sikandin egkeuma. Ne kenè niw lipati heini is migkagi ku keniyu,” ke sikandin.

⁸Ne zutun, migaanggaan haazà is minge vahi med-awà dutun te surung. Nengehandek dan, iyan, nepenù is gehinawa zan te kelipey. Ne ebpelelaguy zan su ibpenudtul zan diyà te minge sumusundan he zuma. ⁹Ne netekewtekew zan te nesinugung sikandan ni Jesus. Ne ke sikandin te, “Mebmelinawen kew.” Ne mid-uvey zan diyà te kandin. Ne mid-azap dan kandin is egawed te paa zin. ¹⁰“Kenè kew egkehandek,” ke si Jesus, “beyai niw is minge suled ku ne kegiyi niw he medhendiyè dan te Geliliya ne ziyè e zan egkeuma,” ke sikandin.

Is Tudtul te Impemevantey

¹¹Ne hein neipus haazà is minge vahi, migenat daan is duma zutun te minge sundaru he impevantey zutun te surung. Midhendiyè dan te inged ne midtudtul zan ziyà te minge punuan he memumuhat is langun he neulaula. ¹²Ne is minge punuan, mibpekibityara te minge ebmegurangan. Ne zutun mibegayan dan haazà is minge sundaru te zekelà he selapì. ¹³Ne migkegiyan dan te, “Iyan niw tudtula te minge etew is: hein mezukilem nekelipezeng kew ne nekeuma is minge sumusundan ni Jesus ne midtakew zan is lawa zin. ¹⁴Ne emun egkezineg heini te gubirnedur, edlelagan dey para kenè kew zin mepeuki.” ¹⁵Ne midawat te minge sundaru haazà is selapì, ne midtuman dan haazà sumalà is migkagi kandan. Ne kemulu guntaan iyan edtudtulen te minge Hudiyu haazà is impepenudtul te minge punuan diyà te kandan.

Is Menge Telaan ni Jesus

(Mateo 28:16-20; Marcos 16:14-18; Lucas 24:36-49; Juan 20:19-23; Nengeulaula 1:6-8)

¹⁶Ne haazà is sepulù wey sevaha he minge sumusundan ni Jesus, midhendiyè dan te Geliliya, duen te vuvungan he migkagi kandan

ni Jesus. ¹⁷Ne zutun neehè dan sikandin. Ne minsan te nezuwazuwa is duma kandan he edtuu mehitenged te kegkevanhew zin, dutun te kegkeahaa zan kandin, mid-azap dan kandin. ¹⁸Ne mid-uvayan sikandan ni Jesus, ne ke sikandin te, “Imbegey kedi is ke gehem te kebayaàbaya diyà te langit wey zini te tanà. ¹⁹Umba, penhipanew kew en diyà te minsan hendei wey niw metukid te ebpesavut is langun he menge etew ziyà te langun he menge inged. Ne penurua niw he medsundan dan kedi. Pemewtismuwi niw sikandan wey metueni he nekidsevaha zan te Amey tew he Megbevaya, wey siak is Anak din, wey is Wagas he Mulin-ulin. ²⁰Penurua niw sikandan he tumana zan sikan is langun he insugù ku keniyu. Ne kenè niw lipati he layun a eduma keniyu taman te kenè pa egketapus heini is timpu.”